

倪雲林先生詩集目錄

卷之一

四言

義興異夢篇

至正十年十月廿三日余以事來荆溪重
居寺主邀余寓其寺之東院凡四閱月
待遇如一日余將歸乃命大覺懺除垢
業使悉清淨乃爲寫寺南山画已因画
說偈

題画上

五言古詩

春日雲林齋居

次韻懷張外史

雨中寄孟集

聽袁子方彈琴

贈天寧福上人

十一月十七日過與之洛澗山居畱宿忽大雪作及明起視戶外巖岫如玉琢削

竹樹壓倒逕無行踪飄瞥竟日至暮未已雪深尺餘因賦詩畱別

爲方厓画山就題

奉謝張天民先生

夜泊芙蓉洲走筆寄張鍊師

蕭閒道館聽袁南宮彈琴是日風雨蕭然有感而作

送高太守之秦郵

蕭閒館夜坐

和荅吳寅夫對雨見懷

走筆次陶蓬韻送葉參謀歸金華

雙寺精舍新秋追和戎昱長安秋夕

偶成

次韻曹都水

贈錢鍊師

送甘允北上京師

寄段吉甫

送韋鍊師并寄鄭有道

玄文館讀書

有引

述懷

題驪山圖

蛛絲網落花

冬日窗上水影

雪泉爲王光大賦

丙子歲十月八日夜泊閩門將還溪上有

懷友仁陸徵君

聽袁員外彈琴一首

有引

早春對雨寄懷張外史

懷寄強行之常州學官

三月六日同李徵士遊禪悅僧舍禮上人

出柯博士所賦詩以示僕而博士君歿

已二年展誦爲之悽斷因次第其韻於

後

戊寅十二月丹丘柯博士過林下賦詩次

韻酬荅

己卯正月十八日與申屠彥德遊虎丘得

客字

古詩二首奉送友仁賢良之京師

江陰袁仲徵作軒名篔簹林日夕嘯咏其下

至正十二年二月廿四日訪余南蘭陵

寓舍徵僕賦詩遂走筆成書不能盡道

軒中清事也

杜真人聽松軒

擬陰常侍一首奉寄劉祕監趙員外

玉壺中挿瑞香水仙梅花戲咏一首

秋夜賦

述懷

泊舟一首

贈王光大

次韻荅友生

次韻姑蘇錢塘懷古六首

贈惟寅

送惟寅

貞松白雪軒分韻賦

有引

對春樹

送致用游閩

送馬生

寄楊廉夫

寄李隱者

寄韓介石

次韻呈張德常

朱火

黃本中書齋爲寫寄傲窗圖

爲徐有常畫葉湖別墅

寄穹窿主者

題原道西溪草堂

煮石山房

画竹贈以中

題墨竹送顧克善府判之高郵

入郭

聽錢文則彈琴

題画贈岳道士

贈王仲和

訓張德機見贈

贈張士行

贈友生

九日過彥行用韻一首

又賦

画竹贈徐季明

對酒

贈野處民

龍門茶屋圖

靈鶴辭

畫贈呂志學

畫竹贈志學

荅張鍊師

畫竹寄友人

陸德中祈雨有感

臥病

次韻全希言

次韻張伯琦

酬友生

贈陸有恒

尋友人不遇

啄木

次張仲舉韻

薛常州讓田詩

贈友

潘公鳴皋軒

西老圖

爲張來儀賦匡山讀書處

吾友陸友仁甫舊得古銅印一紐以示余

辨之文曰陸定之印以名其子而字之

曰仲安友仁旣沒仲安求爲賦焉

惻惻行

有引

瞻雲軒

有引

張尊師祠醮感致瑞鶴

題趙若巖龍山精舍

池蓮詠

送陳惟允之金陵

徐氏南園對雨

題画贈九成

早春對雨寄張外史

正月廿五日賦

貽張玄度林宗道

次韻別鄭明德

重改春日雲林齋居

卷之二

七言古詩

送徐君玉

寄張徐二秀才

十二月七日岳季堅夜坐走筆書贈

爲曹僉事画溪山春曉圖因題

奉道曹文貞公墓道奉先亭

古意一首次韻荅曹德昭

歲巳酉八月十四日寓甫里之野人居劉

君元暉邀余酌酒快雪齋中對月理詠
因賦長句

劉君元暉八月十四日邀余玩月快雪齋

中命余詩因賦

苦雨行

延陵道

餘不溪詞二首 有引

醉題許生敗壁

陸隱者禱雪獲應

醉歌行酬李徵君春日過草堂賦贈有引

送潭州魯總管

題曹雲西画松石

趙千里扇上寫山用鄭山人韻題

鄭有道隱居梁鴻山因寄

題柯敬仲竹

江南曲

賦耕雲

汎滄浪

對梓樹花

恒德堂

画竹

贈季丙卿

題王元用秋水軒

賦清隱閣

題画

画竹贈王允剛

次韻鶴詩

寫墨竹贈顧友善

賦翠濤硯

康素子雜言一首

一画寄王雲浦

趙榮祿馬圖

贈丁醫士

寄徐元度

送錢成大赴淮南

奉寄沈理問

蟬竦一首

題画贈呂彥貞

賦許君震杏林小隱

郭文顯善推人禍福神驗賦贈

姚節婦詩

李徵君將還揚州因言沈郎官吳中賦此
以寄

送潘生適越

秋鶴軒

送顧生歸四明

題陳氏齋壁

宿薩判官家聽琴

十一月廿三日率性德原共載過林下而
余適不在遂返棹竟還明日詩來因次
韻重邀之

至正十三年三月四日同章鍊師過張先
生山齋壁間見柯敬仲墨竹因懷其人
其詩文書画鑒賞古跡皆自許爲當代

所少狂逸有高海岳之風但目力稍怨
耳今日乃可得耶

贈陸子華

贈顧定之

贈丘氏兄弟及周生

贈陶得和製墨

丙午十一月十九日避泖上丁未十二月
十六日始去此至陳溪分湖間矣因寫
喬柯竹石并詩

卷之三

五言律詩

與張貞居雲林堂宴集分韻得春字

用虞道園韻奉贈謝長源

題張德常良常草堂二首

贈王生蒙泉

俞子中見過

賦平野

對雨次張貞居韻

奉荅明卿先生

題張氏藁竹軒

遊善權洞

贈簡上人

友人期過寺中不至

義興吳國良用桐烟製墨黑而有光膠法

又得其傳將遊吳中以求售輒賦詩以

速其行云

贈墨生

題方厓墨蘭

送徐元度還江西

秋日贈張茂實

悼朱高士

雲槎軒

寄王叔明

悼項山清上人

賦德機徵君荆南精舍圖

追次唐綦母潛宿龍興寺詩韻寄方厓

又贈道益

又贈道益并似陸明本

送宗天章歸廬山

贈公遠

贈道士王宗晉

贈剡九成

邀張彥高

用韻重寄

寄張德常

三月十日義興王子明送竹筩賦詩

高進道水竹居

張天民溪亭

送王叔明

積雨

賦雪蓬

孤雲用王叔明韻

二月十六日賦

寫山陰丘壑圖寄趙士瞻

賦雪舟

題李遵道山居圖

寫秋林遠岫圖贈約齋因題

次韻酬荅謝參軍王長史二首

贈友生

題画

荒村

七月十四日對雨一首

寄虞子賢

贈沈文舉

爲文舉画泖山圖因題

己酉八月廿三日雨至廿六日乃開霽賦

五言呈德常

徐伯樞歸耘軒

用彝齋韻張韓二君

賦謝王彝齋

次韻酬彝齋見詒二首

画竹寄王彝齋

聽雨

画寄王雲浦

雨几

題丘氏壁

三芳圖

画江天晚色贈志學

桂花

荅雲浦

題墨竹贈李文遠

送僧

垂虹亭

三月四日邂逅德方郎官九成緣史於荆溪之上相從及旬而別因九成徵余画并賦詩爲贈

又題画贈九成

暮春期潘徵君不至

寄徐仲清

送李徵君遊荆溪因寄王司丞

題画贈張玄度

爲唐景玉画丘壑圖并賦

稽山草堂爲韓致因賦

五雲書屋

画竹贈王光大

題漁樵友卷

題画贈王仲和

荅光大

画竹寄張天民

題元朴上人壁

挽張德常

寄章心遠

寄張景昭

寄東白上人

畫吳松山色贈潘以仁

贈友

贈陸隱君

卷之四

七言律詩

北里

山園

林下

林下遣興

春日

二月十日玄文館聽雨

對雨寄張伯雨

雪後過陳子貞隱居

吳門賦謝陸繼之黃柑紫蟹之貺

送甘允從

送徐元度

寄鄭徵士

荆溪卽事

奉懷張外史

次韻薩天錫寄張外史

送張外史還山

次韻陳子貞見示

寄郊九成

顧仲贄來聞徐生病差

雨後

以龍尾硯寄錢徵士

鶴溪爲張天民賦

聽秋軒

次韻重居寺壁間柯博士舊題

初書記以詩來別且諄諄開諭深見方外

之情因走筆次韻奉謝併期面別

鄭明德新居

悼項山清上人

晨起一首寄丹丘

寄張貞居

送貞居還山

再用韻寄貞居及柳太常鄭有道

次韻郊九成見寄

題米南宮石刻遺像

賦居延王孫德新小隱軒

送浙憲掾劉彥文并簡張貞居

寄吳孟思并懷貞居

寄王叔明

戲題嚴錄事所集書畫藪

薩仲明爲丞相府掾時僦居京師名其軒

曰半野後買宅延陵亦揭是名於軒因

兩宿其下遂爲賦此

次韻和德原率性所賦十二月四日雪

贈葛子熙

題荆南精舍圖

賦德機荆南精舍圖

贈別益以道書記

辛亥六月三日寓實性源禪房爲寫竹梢

因賦三首

送寶南琛往往荆溪碧雲寺兼柬方厓

八月三日與劉道益連床夜話風雨淒然

五日開霽道益賦詩見貽次韻一首

俊仲明以詩見示次韻

別彥貞

畱別王叔明

別張玄度

挽鶴溪張先生

送張以中繇宜興歸金壇

西野對雨清坐有懷明本彥準并呈道益

過蘭陵畱宿蔣達善家

甘允從來過溪上將還汝寧賦此奉送

送盛道士遊浙東

送倪中愷入都

春日送別余一秀才

賦王真人胎仙樓

奉和虞學士寄張外史

奉和苦雨

奉和虞學士賦上清劉真人画像

再和前韻

寄曹德昭

再寄

春日試筆

送簡禪師易道

題曹伯高爲曹尚書之子卜居詩卷

雲泉小隱爲張德機賦

送盧錄判之建寧

寄張天民

贈張景昭

寄陸靜遠

題趙榮祿墨竹

李文遠製墨次吳寅夫韻

張貞居有詩柬梁鴻山楊君次韻

用王叔明韻題畫

居竹軒

送芳祖二上人參禮育王寺光公

宴吳氏樓居

岳王墓

九日

送張鍊師遊七閩

首夏卽興呈貞居

杭人有傳余死者貞居聞之愴然因賦此

以寄二首

奉次張伯雨潘子素酬和韻

再和

有引

送盛高霞

寄高霞

宿清流堂

贈君震

贈張楨

題畫貽王光大二首

寄白石

寄張德常

送德常同知

次韻奉荅德常別駕初夏見懷一首

題張以中野亭

贈惟寅

有引

題孫氏雪林小隱

陽春堂

送杭州謝總管

上巳日感懷

蕭從善集其師張外史詩爲賦一首

贈張玄度時方喪內

三月廿二日雨懷荆溪勝遊寄原道

二月晦日聽劉伯容彈琴

次韻送梁生讀書沈庄

酬友生

次韻思復送元白上人往中竺

寄錢伯行

次韻張榮祿追和楊別駕賦王番陽東湖

勝遊四首用呈雲浦耕雲二月公

桑柘

謝伯理東還訪之不遇次韻因賦

喜謝仲野見過

丙午十一月十九日避泖上丁未十二月

十六日始去此至陳溪分湖間矣

寄錢伯行

寄王成夫

寄陸明本索酒

乙未歲余年適五十幼志于學皓首無成

因誦管人知非之言慨然永歎謾賦長

句

贈王文靜

在同里懷元用

次韻荅元用

次朱秉中韻

贈張玄度

題本中峰觀蓮像

寄熙本明二首

用王子明韻

寄盧士行

送徐子素

題画送僧

綠波軒

又題

次韻寓齋秋懷三首

追和虞道園送張伯雨入茅山詩韻

東林隱所次韻

寄張府判

有引

夜宿張判府環綠軒贈玄度

呈良常安遇賢伯仲

三月一日自松陵過華亭

再用前韻呈錢思復

再用韻呈諸公

贈劉伯庸

贈別姚子章都事

四月廿八日蓬屋題

子章號夢菴走筆題

贈友生

次韻荅王彝齋見贈

寄朱府判

和朱秉中二首

題王敬之屋壁

贈周校書

過桐里

寄陳余二校書

贈別榮子仁

次韻邵生

贈姚掾史

別章鍊師

寄養正

贈岳松澗

次韻屋漏

送張貞居遊靈常洞兼簡王晉齋

陸文玉見過

送諸從事之越中

送僧遊天台次張外史韻

過許生茅屋看竹

送葉道士東歸分得懸字韻

送柳道傳東歸

寄開元長老兼呈鄭明德

贈道士李嘯虛

失鶴

送章鍊師入京

贈楊大同

江上遇楊德朋

寄德朋

寄友

馬國瑞東臯軒

次韻通書記同過鄭先生舊宅

清明

溪山勝槩樓

和華以愚韻兼題所画春山高士圖

寄王明卿

送霞外師過積沙寺因寄鄭博士毅長老

次韻錢思復見貽

贈墨生吳善

風雨

宿普度僧舍

寄周履道

曲彥遠寄茗裹賦此道謝且求致梨栗木

瓜

寄徐季明

三月廿二日雨懷荆溪舊遊寄原道

乙巳三月七日清明風雨憤憤因成長句

次韻贈林泉民張孟辰

故吾一首

寄顧仲瑛

病中懷先友華陽外史用韻一首

雨中在林氏賦贈徐生

寄陳庶子

歸錫麓

送葉道士再用懸字韻二首

學書

贈范壻

題鄧氏扇上

二月二十日大風

寫画贈潘仁仲醫師

贈沈生賣墨

有引

卷之五

五言絕句

題臨水蘭

二月廿二日潘子素王叔明來慰藉臨別

爲寫水傍樹林圖

題画與溥泉

玄洲倡和十首繼趙魏公張外史作

菌山

羅姑洞

霞駕海

鶴臺

桐葉源

玄洲精舍

紫軒

隱居松

玉像龕

題自画

夜作古木怪石因題

雨竹

竹石圖

寄友

題画

菜圃

題秋亭曉色圖

春江獨釣圖

墨竹

六言絕句

題良常草堂圖

題畫

田舍二首

為曾高士畫湖山舊隱

南村草堂

雲溪佳處

題竹圖

題畫

己酉八月廿六日謾題

題溪山雪霽圖贈張以中

題畫六首

燕乳一首

畫竹

贈潘仁仲

卷之六

雲林詩集

目錄

及右開

七言絕句

村居

絕句四首次九成韻

絕句三首

一画贈馮文仲

寄安遇

題玄會菴壁間

追和戎昱寄許鍊師

雙井院前小立

雨晴

王季野示余米元章詩卷因次韻三首

題竹樹圖二首

次韻曹都水二首

惠麓小隱

次韻春雨四首

水仙花

絕句

拜石圖

賦宜遠樓

別潘先輩

懷曹都水

贈墨生吳善

宿玄文館

奉荅范徵君雲林見懷

三月五日爲吳溥泉畫窠石平遠并詩

爲原道題畫

題張以中畫二首

吳采鸞像

用陳子貞韻題畫

舟過梁溪

宿義興先太初上人房二首

雪中折枇杷花寄吳寅夫

雪不止重寄

爲吳處士畫喬林礪石

張外史素不善畫醉墨戲寫張洞奇石頗

一種逸韻德明裝演成卷走筆爲賦

重送初上人參禮光公二首

對雨遣懷

寄友

次韻題高房山画卷

題趙榮祿指痒馬圖次陳先生韻

竹枝詞八首

有引

題雲林小景圖

後數年復用韻題

題画

題來禽筠石圖送高霞還玄元館

寄德常別駕三首

題画

題陳仲美画次張貞居韻二首

連雨

吳中

爲蹇原道題竹木圖

九日登華氏溪亭

寄曹都水

三月廿日題所寓屋壁

鄰墻桂花盛開

六月五日偶成

題寂照蔣君遺像二首

正月廿六日漫題

二月十五日雨作

雅宜山詩

有引

送徐仲清還毘陵二首

六月十一吉祥菴題

二日又題

十三日雨窗排悶二首

十六日雨晴

七月二十八日過丘氏林居秋風騷然
至莫大作終夜不息因成小詩

松陵一首

二月六日南園四首

秋容軒四首

松雪馬圖爲原道題

題墨萱

二月十九日夜風雨淒然南渚旅寓篝燈
與端叔共坐因念兵戈滿地深動故山
之思遂賦

題曹雲西画

鵝次韻題二首

雜賦絕句五首

贈通上人二首

題画竹

題李光祿墨竹

題宋仲溫竹枝

荅陳謝二參軍王長中五首

題画與強仲端

題靈巖寺壁

船中

題墨竹

爲德常寫竹枝

拜石圖爲王文靜題二首

画竹與張元實

寄張德常

吳仲圭山水

題画贈崔子文

睡起

戲贈大雲

題画竹

王叔明画

因廬山甫便寄曹德

李伯時画

画竹

商學士画次張外史韻

贈金嬾翁製爪篋

環綠軒

題画贈原道

與錢伯行宿棲雲堂

人我二首

爲仲章寫竹石

次張師道韻

題画

柯丹丘梅竹

用潘子素韻題柯敬仲墨竹二首

題画十一首

寄陸鍊師

寄張處士

題幽篁古木圖爲文靜徵君賦

題李遵道枯木竹石

寄人

題画竹贈西溪處士

贈曹德昭

題画贈單君

贈沈掾

寄王簿

順逆

次韻題黃子久画

烟鶴軒二首

贈張德常二首

客舍詠牽牛花

調玄度

清明後題

再用前韻呈錢思復

再用韻

鶴盈軒西芍藥欲紅矣戲成絕句奉呈雪

林隱君求折二枝

聞鴨鳩

四月七日雨

追和蘇文忠墨蹟卷中詩韻八首

別陸氏女

題画

六月九日過以中野亭賦

雨後

題画贈王允同

江上

二王遊騎圖

謝筆

聞竹枝歌因效其聲二首

高尚書画竹

看花仕女圖

剖瓜士女圖

王都事家聽周子奇吹笙

趙魏公蘭

管夫人画竹

樹石小景

墨梅

題雜画五首

題画二首

寄人

懷呂君

寄人

烟雨

仲穆馬圖

墨水仙

絕句二首

十月

贈玄容

松澗圖

寄友生

題陳惟允畫

春雨

寄王叔明

寄韓伯清

題趙承旨墨竹用張外史韻

晚照軒偶題二首

醉後贈張德機五首

贈僧

題張元播扇

題畫

畫竹贈申彥學二首

青山

原上人

題木石贈丘志

贈伯清

題画

偶成

荆溪秋色圖爲卜震亨題

爲潘仁仲寫梧竹草亭

羔羊一首

己酉元日題徐氏南園壁

六日題

韋羌草堂圖

題彥貞屋壁

絕句

題画次韻二首

正月八日宿禪悅僧舍題趙榮祿馬圖

画贈王生

題画

題画贈盧山甫

白石先生古貌古心輕財而重義實生於

吾後之師令人寤寐不能忘但幽居默
如潛逃則殊令人憤憤耳昨暮辱醉中
詞翰讀之洒然也因次韻二首希一笑
柯丹丘梅竹

絕句

題畫

松雪馬圖

贈潘仁仲

題畫竹

附錄

雜著

鶴溪先生画像贊

趙士瞻小像贊

陳天倪處士画像贊

王季野画像贊

良常張先生画像贊

謝仲野詩序

陳惟寅儼屋疏

題良常草堂疏

題畫

懶遊窩記

書畫竹

跋環慶王氏所藏趙榮祿六帖

忠靖王廟迎享送神詩有序

樂府

清平樂在荆溪作

凭欄人贈吳國良

人月圓二首

太常引傷逝

殿前歡

水仙子

折桂令擬張鳴善

又辛亥過陸庄

水仙子因觀花間集作

江城子感舊

柳梢青贈妓小璫英

南鄉子東林橋雨篷夢歸

太常引壽彝齋

鵲橋仙

鷓鴣天

如夢令

踏莎行

小桃紅二首

憶秦娥二首

江城子

蝶戀花

題雲林詩集後

題雲林先生小像

故元處士倪雲林先生旅葬誌銘

故元處士雲林先生墓誌銘

雲林詩集目錄

終

國家圖書館, NATIONAL CENTRAL LIBRARY, TAIWAN, R.O.C.

倪雲林先生詩集卷之一

海虞毛晉子晉父訂

四言

義興異夢篇

辛卯之歲寅月壬戌我寢未興戶闔于室爰夢鬼
物黯淡慘慄或禽而角或獸而犴夔足駿奔豕形
人立往來離合飛搏跳擲紛攘千態怪技百出于
茲泊然抱冲守一廓如太虛雲斂無迹晨鷄既鳴
冠櫛斯畢涉庭而咏已化奚恤春風惟振亮月在

雲林詩集 一
席凋瘁何損榮華匪益獨以圓悟境無順逆愚夫
說夢轉墮迷惑滔滔天下病者良極俟我大雄拯
此群溺

至正十年十月廿三日余以事來荆溪重居
寺主邀余寓其寺之東院凡四閱月待遇
如一日余將歸適命大覺懺除垢業使悉
清淨乃爲寫寺南山畫已因畫說偈

我行域中求理勝最遺其愛憎出乎內外去來住
止夫豈有礙依桑或宿御風亦邁雲行水流遊戲

自在乃幻岩居現於室內照胸中山歷歷不昧如
波底月光燭盼睒如鏡中燈是火非詒根塵未淨
自相翳晦耳目所移有若盲瞶心想之微蟻穴堤
壞驟然一笑了此幻界

題画上

義興之山維水瀾瀾載遊載咏操觚挾几聊樂一
日百歲奚俟

五言古詩

春日雲林齋居

池泉春漲深逕苔夕陰滿諷咏紫霞篇馳情華陽
館晴嵐拂書幌飛花浮茗盃階下松粉黃窓間雲
氣暖石梁蘿葛垂翳翳行踪斷非與世相違冥栖
久忘返

次韻懷張外史

緬懷蕭間館乃在華陽天燒香當陽谷濯纓向清
泉真靈浮空至樓觀與雲連彈琴明月下飄飄舞
胎仙

雨中寄孟集

英英西山雲翳翳終日雨清池散園文空林絕行
屨野性夙所賦好懷誰共語燒香對長松相與成
賓主

聽袁子方彈琴

蕙帳凝夕清高堂流月明芳琴發綺席列坐散煩
纓迴翔別鶴意縹緲孤鸞鳴一寫冰霜操掩抑寄
餘情

贈天寧福上人

荆溪霜落後銅官日出初自櫛頭上髮更理篋中

書上人從定起咏言方繞除邂逅發微笑幻身同
太虛

十一月十七日過與之洛澗山居留宿忽大
雪作及明起視戶外巖岫如玉琢削竹樹
壓倒逕無行踪飄瞥竟日至暮未已雪深
尺餘因賦詩留別

世途縈荏苒歲晏不知歸密雪竹林夜挑燈共掩
扉蕭條塵慮淨諷咏玄言微遇此巖中賞心事悵
多違

爲方厓画山就題

摩詰画山時見山不見画松雪自纏絡飛鳥亦閒
暇我初學揮染見物皆画似郊行及城遊物物歸
画筭爲問方厓師孰假孰爲真墨池挹涓滴寓我
無邊春

奉謝張天民先生

鳴鴈將北歸裴回舊栖處江湖春水多欲去仍回
顧稻梁豈余謀繒繳非所慮猶爲氣機使暄冷逐
來去寥寥天宇寬彼此同一寓風萍無定踪易散

聊爲聚君看網中魚在疾猶相煦

夜泊芙蓉洲走筆寄張鍊師

芙蓉猶滿渚疎桐已頽霜泊舟菰蒲中吳山隱微
陽因懷靜默士竹林閔玄房煮茗汲寒澗燒丹生
夜光憶與鄭郊輩閒咏步修廊時子有所適顧瞻
重徧祥庭下生苔蘚牖間繙詩章奕勢鄭老勝酒
榼郊生將雅歌雜詼諧列坐飛羽觴子歸日已晚
棗栗亦傾筐揮手輒謝別募宿荒城傍遲明趨所
期待子鄭公堂晨往遂至昏企望徒俛俛乃嗟仙

真馭因非世所望惻惻理歸棹泛泛秋浦長還尋
甫里陸更醉山陰王素冠斯馳贈喜知終未忘余
茲將遠適旅泊猶彷徨微風動虛碧初月照石梁
曠望對清景賦詩托陳郎茯苓思同煮夜雨共匡
床

蕭閒道館聽袁南宮彈琴是日風雨蕭然有感而作

玉琴轉清亮風雨更飄颻疎桐陰高館朱槿耀芳
條生物曷可遏撫事發長謠弱齡陪清讌櫛髮想

垂髫相見日以老離居夢且遙秋江眇雲水去鶴影搖搖

送高太守之秦郵

秦漢置牧守猶古之侯伯封建而郡縣仁政固不易漢宣知所本留意二千石慎哉高侯車願循古轍迹

蕭閒館夜坐

隱几忽不寐竹露下泠泠青燈澹斜月薄帷張寒廳躁煩息中動希靜無外聆窅然玄虛際詎知有

身形

和荅吳寅夫對雨見懷

溽雲變陰晦零雨隨風濤的皪集蓮池飄飄洒蘭皋朱絲緩瑤瑟綠錢生寶刀撫事增慷慨端居倦遊遨處世每慚柳懷人徒詠陶脆質愛靈藥閒情宣弱豪

走筆次陶蓬韻送葉參謀歸金華

手把玉芙蓉青天騎白龍出入人間世飛鴻踏雪踪瑤草粲可拾群峰森玉立璧月挂天南離離星

斗溼君昔在山時玉韞山有輝因同白雲出更與
白雲歸白雲無定處豈只山中住河漢共縈紆經
天復東注金華牧羊人游戲不生嗔笑拂岩前石
行看海底塵手調白羽箭陋彼磨銅硯一語不投
機婦歎寧再見士豈始隗乎全趙匪相如項王疑
亞父竟爾龍爲魚擾擾何時已百年聊寄耳良也
報仇婦言從赤松子去山今幾年還山大學仙天
台司馬宅雲氣近相連

雙寺精舍新秋追和戎昱長安秋夕

秋暑晚差涼茗餘眠獨早清風振庭柯寒蛩吟露
草晨興面流水西望吳門道不知人事劇但見青
山好

偶成

積雨不爲休蕭條使人愁哀吟四壁靜病臥百重
秋開門望原野江湖漭交流誰能載美酒爲我散
煩憂

次韻曹都水

杜陵布衣翁許身稷禹行賦詩原正始感事多哀

傷煌煌萬丈焰岌岌數仞墻君能仰餘輝假日高
升堂弛擔息荒途日暮將安之挾彈狂遊子鬪鷄
輕薄兒衆方巴人唱獨歌陽春詩天門何嚴邃綠
窗隱翠愚

贈錢鍊師

鍊師好神仙望拜金母臺疊疊應玄運煌煌秀靈
茲天風流瓊響夕露調玉盃鳳栖池上竹雨添堦
下苔時見兩青鳥碧海傳書來感此忽自笑飄然
遺氛埃

送甘允北上京師

翔鴻縱高姿流水去不息枉道別友生揚舲望京
國婉孌前途憩蕭條餘景匿神京衣冠會左右金
陽宅驅馬流星繁垂軒春霧集嘉子玉質朗早通
金閨籍行逢明主願入補詞臣職束帶向晨趨陪
讌終日旻芳年易爲晚所願崇令德英英白雲飛
渺渺青山隔秋風應節起萬里思親客遲子返舊
居街盃數相覲

寄段吉甫

昔者段干木踰垣避其君，冥翳巖穴間清風。扇炎氛德綿百世，下吉甫賢且文神。鸞養奇采芳芷結幽芬，回視當世士鷄鶩。正紛紜區區事，夸斂子獨介不群。舍瑟作而嘆，此道誰復云。

送章鍊師并寄鄭有道

良覲忽云阻，桐花今亦繁。落日滿洲渚，揚舲念孤騫。因懷息機叟，蘊真從灌園。晨掃石上雲，佇子接清言。

玄文館讀書

玄中真師在錫山東郭門，立靜舍號玄文館。幽處敞朗可以閒處，至順壬申歲六月。余處是兼旬，謝絕塵事，游心澹泊。清晨櫛沐竟，遂終日與古書古人相對，形忘道接。條然自得也。又西神山下有好流水而味甚甘冽，與常水異。館去西神山遠，不出五里，故得朝夕取水以資茗薜之事。居茲館讀書研道之暇，時飲水自樂焉。乃賦詩曰：真館何沉沉，寥廓神明居。陽庭肅宏敞，丹林鬱扶

疎睠言茲遊息脫屣榮利區檐榭初日麗池臺涼
雨餘焚香破幽寐飲水聊舒徐潛心觀道妙諷咏
古人書懷澄神自怡意愜理無遺誰云黃唐遠泊
然天地初迴首撫八荒紛攘蚍蜉如願從逍遙遊
何許崑崙墟

述懷

讀書衡茅下秋深黃葉多原上見遠山被褐起行
歌依依墟里間農叟荷篠過華林散清月寒水澹
無波遐哉棲遁情身外豈有它人生行樂耳富貴

將如何

題驪山圖

狡獪上林苑洗馬昆明池霜威肅笳鼓雲氣画車
旗馬班陳賦咏衛霍綏蠻夷王風旣未遠文明方
在茲逶迤霄漢上鳳皇尚來儀

蛛絲網落花

落花綴蛛網蜀錦一規紅旣映綺疏外復照碧池
中含悽戀餘景散魄曳微風昔人問榮穢詎識本
俱空

冬日窓上水影

日池浮湛澹霞牖上縈迴敷腴三素雲照耀青蓮
臺高流輝自下含漪斂復開尸坐以默觀靜極自
春回

雪泉爲王光大賦

高齋面絕壁林密逕難尋風落松上雪零亂幽澗
陰皓潔映鶴氅清圓和瑤琴閒咏以自樂聊用忘
華簪

丙子歲十月八日夜泊閩門將還溪上有懷

友仁陸徵君

明發辭吳會移舟夜淹泊空宇垂繁星微雲暝前
郭沉沉抱冲素悄悄傷離索埽掃松逕苔遲君踐
幽約

聽袁員外彈琴一首有引

至正四年十一月袁員外來林下爲留兼
旬臘月十七日快雪初消庭無來迹與僕
靜坐因取琴鼓之古音蕭寥如茂松之勁
風春澗之流冰員外時年八十有二顏貌

筋力未如四五十許人爲言甫弱冠遭逢
盛明初宰當塗過九華山道逢神人與棗
食之後數數見夢寐間若冥感玄遇者員
外韜耀蘊真仕祿以自給不爲人所知豈
郭恕先之流歟爲賦五言一首

郎官調綠綺谷雪賞初晴兩忘絃與手流泉松吹
聲問言踰八十云嘗見河清挂帆望九華神人歛
相迎啖以海上棗歡愛若平生玄遇寧復得惜哉
遺姓名

早春對雨寄懷張外史

林臥苦泥雨憂來不可絕掀帷望天際春風吹木
末飛蘿散成霧細草綠如髮念子獨高世南山修
隱訣撫弄無絃琴招邀青天月神安形不凋跡高
行自潔思之不可見飢渴何絲歇願爲鸞鵠翔南
遊拂松雪

懷寄強行之常州學官

君在西溪上年年楊柳春提壺坐柳下邀我見情
真青葉已垂帶白花還覆蘋別來今見柳思爾采

芳芹

三月六日同李徵士遊禪悅僧舍禮上人出
柯博士所賦詩以示僕而博士君歿已二
年展誦爲之悽斷因次第其韻於後

佛生七佛後乃知青出藍寒月留孤光世人徒指
談嗟余墮狙網朝算逐四三悲嘆明鏡塵何絲息
禪龕

戊寅十二月丹丘柯博士過林下賦詩次韻

酬荅

積雪被長坂臥痾守中林山川雖云阻舟楫肯見
尋傾蓋何必舊相知亦已深驚風飄枯條清池冒
重陰聯翩雙黃鵠飛鳴綠水潯顧望息鬱紆裴徊
發悲吟願言齊羽翮金石固其心歡樂何絲替黃
髮期滿簪

乙卯正月十八日與申屠彥德遊虎丘得客
字

余適偶入城本是山中客舟經二王宅弔古覽陳
迹松陰始亭午嵐氣忽斂夕欲去仍裴徊題詩滿

苔石

古詩二首奉送友仁賢良之京師

春風吹蘭芷佳人將遠遊遠遊何當還神京鬱雲
浮瞻言英邁志飛轡不可留豈無金閨彥與子結
綢繆河山風氣雄江水日夜流遙瞻雲中鴈庶以
慰離憂

吳山朝靄外閭門春雨餘超忽孤帆遠天末浮雲
舒君今北闕遊我栖南山廬荷鋤事耕作閉戶詠
詩書高林鳴禽曙青苔行迹疎還期茅簷下一枉

故人車

江陰袁仲徵作軒名篔簹林日夕嘯咏其下至

正十二年二月廿四日訪余南蘭陵寓舍

徵僕賦詩遂走筆成書不能盡道軒中清
事也

風生篔簹谷雲迷渭水原蕭蕭春雨後翳翳清陰
繁憶昔文使君燒筍具盤殮彭城詩適至大笑飯
爲噴風流成異代寂寞今誰論夫君暨陽隱字徵
其姓袁二仲接俸遊子猷時到門冠同薩縣製坐

對宜城尊翠羽共栖託鳳雛亦孤鶩載誦偃竹記
忽若聞清言邈哉古人迹尚友不可諉

杜真人聽松軒

計籌白石頂聞有丹丘生和玉飲晨露褰林飡絳
英止鶴眠松警螢火照書明爲善得仙道翛然不
近名

擬陰常侍一首奉寄劉祕監趙員外

幽并游俠地都城百雉連河漢瞻疑近雲鳧信是
仙樓分霞欲曙花將月共妍摛豪傾藻思獻賦足

爲傳還知跨烏鵲夜宿綵雲邊

玉壺中插瑞香水仙梅花戲咏一首

寒梅標素艷幽卉弄妍姿團團紫綺樹共耀青陽
時折英欲遺遠但恐傷華滋置之玉壺水芳馨消
歇遲

秋夜賦

清漏下數刻疎鐘仍獨聞零露溥夕影端居澄俗
氛恬淡斯寡欲榮名非所欣樂矣咏王風忘年棲
白雲

述懷

嗟余幼失怙教養自大兄厲志務爲學守義思居
貞閉戶讀書史出門求友生放筆作詞賦覽時多
論評白眼視俗物清言屈時英貴富烏足道所息
垂令名大兄忽捐館母氏繼淪傾慟哭肺肝裂練
祥寒暑并釣耕奉生母公私日侵凌黽勉二十載
人事浩縱橫輸租膏血盡役官憂病嬰黽勉事污
俗紛攘心獨驚罄折拜胥吏戴星候公庭昔日春
草暉今如雪中萌寧不思引去緬焉起深情實恐

貽親憂夫何遠道行遺業忍卽棄吞聲還力耕非
爲螻蟻計興已浮滄溟雲霾龍蛇噬不復辨涓涇
邈邈岩澗阿靈芝燁紫莖有志而弗遂悲歌歲崢
嶸冶長在縲紲仲尼猶亟稱嵇康肆宏放刑僇固
其徵被褐以懷玉天爵非外榮賤辱行豈玷表襮
徒自矜蘭生蕭艾中未嘗損芳馨

泊舟一首

泊舟嘉樹下開牖碧江潯慨然念黃落景憇惜清
陰多暇觀魚鳥容與一登臨蛻迹塵喧久欲寡天

機深

贈王光大

春服始輕體嘉樹欲垂陰夫椒結秀色江流涵碧
深晴絲正高下好鳥亦嚶吟豈無伐木詩怡此風
雲心

次韻荅友生

處世若過客踽踽行道孤願友吉德士邈焉如鳳
雛人而無恒心未易爲醫巫往者不可作玉匣埋
珠襦枳棘何榛榛上有鴟梟呼維桐鸞栖止來匪

應時需卓犖千里馬壯氣塞九衢駑駘豈其偶齷
齷當鹽車龍可豢而致魚鮪固充厨未聞商山翁
受厘稅以租俗人難與言長吟野踟躕青松在澗
壑坐閱霜柳枯所嗟鄭亂雅復惡紫奪朱至道安
可言多金豈徵符忽爲蹙蹙者憔悴悲路隅簞瓢
咏王風耿耿心勤劬

次韻姑蘇錢塘懷古

西子承吳寵餘踪見古臺空遺昔時月無復昔人
來臺邊越兵路幾見起兵埃

釀酒劔池水玉壺清若無揮盃送落月山鬼共歌
呼松間燈如漆白骨漫寒蕪

耕鑿古隧穿乃吳桓王墓金鴈隨冷風黃腸畢呈
露悲歌異今昔踟躕緩歸步

仙人悲世換宴景在清都寒暑自來往英雄生釣
屠錢塘江畔柳風雨夜啼烏

江山國破後弔古一經行輦路苔花碧御溝菰葉
生古跡今寧有新城江上橫

南山靈石澗翠壁掩松關張君已厭世乘螭遂不

還蘿磴餘幽躅今復誰躋攀

贈惟寅

隱几方熟睡故人來扣扉一笑無言說清坐澹忘
機衣上松蘿雨袖中南澗薇知爾山中來山中無
是非三十不娶妻四十不出仕消搖岩岫間翳名
以自肆何曾問理亂豈復陳美刺高懷如漢陰終
老無機事

送惟寅

春江烟靄綠遠樹明清旭歸鴈影斜斜鳴聲斷復

續陳君挂帆去似與鴈相逐水際白雲度山中甘
雨足安得從耦耕柴門藝松菊去去且入城懷抱
向誰傾姚公有古道虛夷多遠情俾爾遂高隱狂
歌樂幽貞

貞松白雪軒分韻賦

至正二十三年正月廿日句吳倪瓚與某
某會於貞松白雪軒其地林石奇勝窗牖
明潔軒中主人又好文尚古有文武材欵
坐設酒饌相與嘯咏以小謝雲中辨江樹

分韻各賦瓚得辨字

境靜塵慮清雨餘山光變池館闕虛閒琴酌申縑
綵蔚哉春木榮憩我飛翮倦石間有題字苔蝕已
難辨

對春樹

端憂對春樹影落身上衣美人手所成紉縫願無
違步庭悲往躅瞻景惜餘暉芳襟沾露溼蘭珮委
風微疑思自的的染澤尚依依晨鷄催夢短夜鵲
逐魂飛歡愛自茲畢憔悴損容輝

送致用游閩

韓衆禹穴來語我長生訣偶坐聽春雨雨止卽言
別乃知茅君山貞居相往還山經許寄我依依師
友間貞居登真久識子十年後掣箱出遺文猶作
蛟鼉吼子去遊七閩漁浦桃花春白鷗飛送爾停
橈採綠蘋幔亭幾日到言笑邈無因憑將棹歌去
歌向武夷君

送馬生

送子淮南行繫舟江岸柳翠影舞晴烟落我盃中

酒舉杯向落日春水浮天碧時見白鷗飛雪花翻
綺席應笑披羊裘獨釣江邊石

寄楊廉夫

吳松江水春汀洲多綠蘋彈琴吹鐵篴中有古衣
巾我欲載美酒長歌東問津漁舟狎鷗鳥花下訪
秦人

寄李隱者

南汀新月色照見水中蘋便欲乘清影緣源訪隱
淪君住鈿山湖綠酒松花春夢披寒雪去疑是剡

溪濱

寄韓介石

江上雨雲歇夕陽歌吹濛
朱絃彈綠綺令我憶韓
衆魚戲弱藻下鳥飛明鏡中
夢乘清浦月直過雲
溪東

次韻呈張德常

陶公興寓酒杜老愁亦酌
豪傑千載人處世何磊
落吐詞蔚忠義安貧務簡約
嗟哉嚇腐鳶邈矣鳴
皋鶴

朱火

朱火日方永涼風拂琴絲
麋鹿遊臺苑燕雀悲火
帷蕩然京輔地無復漢官儀
衆芳日蕪穢陰凝方
自茲

黃本中書齋爲寫寄傲窓圖

庭樹綠交蔭時鳥語清綿
春竹羅逕笋夏花敷沼
蓮慨然三季後契彼羲農前
古井汲修綆空齋組
素絃長歌歸去來悟悅陶公賢
終尋桃花崦息景
窮幽玄

爲徐有常畫葉湖別墅

葉湖水淪漣松陵在其西望見吳門山波上翠眉
低白蘋晚風起寒烟遠樹齊水蕉籠筆格露柳罩
金堤居貞寧汲汲旅泊自栖栖屏處觀魚鳥風雨
夜鳥啼

寄穹窿主者

山雲淡縱橫幽鳥跂上下寂寥非世欣自足怡靜
者平生臥遊趣屋壁何勞画還期煮茯苓地爐同
夜話

題原道西溪草堂

春水孤村迴荆溪罨画西晚日鳴榔起山雨竹雞
啼櫻桃花已落蘼蕪綠未齊酒船尋賀監早晚到
幽栖

煮石山房

汲澗煮白石雲栖南澗隈敲石發新火荆薪藉餘
灰坐候升降理靜觀寒燠媒遂忘石鼎沸乍疑山
雨來丹成同此術鶴化詎能猜我亦食金液清淺
笑蓬萊

畫竹贈以中

吾友張以中少年如老翁因過修竹裏邀我碧巖
東琥珀松醪釀玻璃茗碗紅子端今已矣千載事
同風

題墨竹送顧克善府判之高郵

高郵古淮甸世產不乏賢顧君往佐郡才華當妙
年歌詩隱金石八音以相宣侈哉錦囊句雅甚朱
絲絃而此艱虞際撫事一愴然飢者易爲食君能
念顛連何以贈子行墨君雙節堅

入郭

我初來城郭新綠餘薔薇今我旣出郭秋蓮落紅
衣郊居豈爲是市隱勿云非去去將何從西山行
路微塵坳夸毘海游潛四月餘賦歸亦無家塊處
蝸牛廬身世一逆旅成虧紛疾徐反身內自觀此
心同太虛

聽錢文則彈琴

牛鳴野窳中雞登山木上黃鍾雜姑洗春容以清
亮別鵠算鳴飛流水春演漾愛爾絃手忘令我形

雲林詩集 二十三
神暢憶昔擅能事宋袁余所向錢君生獨後超軼
絕塵鞅操琴晚聞道月斧揮天匠杳如清廟瑟朱
絃聽歎唱古道久寂寥古音亦淪喪促軫淚沾纓
歌詩重悲悵

題畫贈岳道士

義興岳道士野鶴如長身我知彌明徒不是侯喜
倫結喉吟肩聳鐵脊霜髯新手中石碁子頭上漉
酒巾久居離墨山自謂無懷民喪亂不經意松陵
留十旬香雲作輿衛長松爲主賓旣滋數畦菊復

種二畝芹樂哉以忘死道富寧憂貧爲我具舟楫
相期桃花春

贈王仲和

荒城夜風雨草木曉離披桂馥逗虛牖苔文滋硯
池弄翰聊寄逸永日以自怡且盡一日樂明朝非
所知

訓張德機見贈

嘉藻枉我前令人意也消展詠當前除清陰起涼
飈出何去巖穴隱何逃市朝仙師赤城霞旦旦存

雲林詩集
三十四
神標

贈張士行

雲門有逸客非仕亦非隱玉井千尺泉此士難汲
引結交雲林叟不顧俗嘲哂我拙唯任真子德常
戒謹相知既有素力學仰顏閔久別見顏色英資
固天稟欲疎不能忘欲褻不可近

贈友生

春林積雨晴江渚烟波綠谷鳥語綿蠻澗泉聲斷
續羅逕無來踪空山聞伐木時援清琴坐還同白

雲宿

九日過彥行用韻一首

蕩舟烟景晚舉盃當素秋黃花忽在眼白髮乃滿
頭臨流發悲嘆援琴歌楚調罷席更淹畱明月波
間照何事鹿皮翁逃名隱屠釣

又賦

九日喜初晴登高向何處山色見微茫波光淡容
與鼓枻逐輕鷗看雲覓新句適值無懷民相對澄
神慮

畫竹贈徐季明

梓樹陰當戶時聞好鳥鳴獨攜一壺酒展席坐前
楹招邀白鶴侶吹弄紫鸞笙杳杳日景晚紛紛飛
絮輕風翻竹影亂明月已東生

對酒

題詩石壁上把酒長松間遠水白雲度晴天孤鶴
還虛亭映苔竹聊此息躋攀坐久日已夕春鳥聲

關關

贈野處民

水聲轉屋西山翠浮屋東床前苔滋雨門外松吟
風怡然無外慮心廣神爲充曲肱以飲水至樂在
其中擊壤歌往古寧知事王公

龍門茶屋圖

龍門秋月影茶屋白雲泉不與世人賞瑤草自年
年上有天池水松風舞淪漣何當躡飛鳧去采池
中蓮

靈鶴辭

陶公職仙著子良亦冥通所修楊許業存思在祝

融周卿宅丹元末胤仰仙宗神明接祈禱虛夷恒
恪恭飛霞煥玉檢流響徹金宮白鶴翔香烟僊僊
載冷風舞影綠雲上命侶青田中晨去瑤草春莫
歸海塵濛真靈忽降室羽車儼浮空步虛酌明水
逶迤清夜終

畫贈呂志學

江雲昏絕巘汀樹猶斜陽獨立霜柳下渺然懷故
鄉歸來茅屋底篝燈寫微茫

畫竹贈志學

綠竹飽霜雪歲寒無荏容風至天然笑復愛夏陰
濃寒暑不能移德比柏與松豈若桃李榮春花但
丰茸

荅張鍊師

安居已度夏臥病乃經秋朝菌悲影短風萍歎波
浮寸田勤自治德宅可歸休慎勿與時競心境似
虛舟

畫竹寄友人

先春競桃李凌陽歎蒲柳謝君靜者徒種竹安所

守亭亭清淨心鬱鬱霜雪後賦詩寄遠懷此君真
可久

陸德中祈雨有感

辟穀清虛久晨窓冷絳霞濯神咸池水宴景丹元
家憂國悲民瘼旱郊起雷車枯魚出涸轍槁苗生
稻花我住清江渚種芹遶江沙忽乘蓮葉杯賤我
仙掌茶擬訪安期生爲覓棗如瓜

臥病

早憂命觴筆暴下忽經旬止酒卻腥腐端居謝喧

塵龕穢除內滯清虛以怡神江雲載飛雨飄飄酒
衣巾矯首詠玄虛精息候仙真道園遊恬淡心兵
息狂狷冷然風濤靜鼓柅銀河津戒哉貪饜子病
源果何因

次韻全希言

臥痾久不憚微瘳起行吟逕苔無來迹出門江水
深懷我平生友金蘭契同心欲共一尊酒道遠力
不任有客闖我戶晤言樂中林飄蕭綠髮仙亦見
雪滿簪取琴與子彈悠悠山水音能成伐木詩歌

以慰所欽

次韻張伯琦

長嘆悲人寰彈琴想天際夏殷禮相因孰謂周可
繼大道久榛蕪高才日凌替遺書歎不泯授受豈
有二鄒孟道性善宅路喻仁義後生事言說慨彼
涕沾袂允矣二三子仰鑽互立志松柏受命獨歲
寒鬱蒼翠誰歟無媿怍夙駕尋吾契

酬友生

擁褐南榮下晨暎煖似春忽思王子晉醉著白綸

巾游宴無冬夏清狂忘主賓能持麀鹿脯寄與不
羈人

贈陸有恒

學行美德業孝弟爲本根朝益以算習夏清而冬
溫無逸勤稼穡幹蠱持戶門勿爲習俗流必念古
義敦謹身尚節儉從善報蘭蓀堯舜雖有子朱均
乃淫昏瞽繇何頑凶子也大聖尊蓮固生汗泥木
可爲機搏簡編蝨蟬出各有至理存惟人異禽獸
暴棄湮其源惟學必繇本根深見枝蕃于何繡鞞

悅外飾奚足論安宅正路間爾居行爾轅斯道邇
且易至樂不可緩

尋友人不遇

洲渚多落英泝流尋遠山輕舟載美酒搖蕩綠波
間俯詠拾瑤草遐息監塵寰寅緣忽失遇悵望遂
空還

啄木

何處啄木鳥飛止于喬林微形亦以勞終日聞其
音所願木向茂不使蝨日侵吁嗟人之徒曾不如

鳥心

次張仲舉韻

秧疇時已遍午饑休中林忽聞輶車至攬衣欣慨
深遂尋修竹下共憩西澗陰汲泉以煮茗遐哉遺
世心

薛常州讓田詩

延陵古吳地泰伯有遺風仁讓自家國士民知孝
忠春暉草心碧日暮荆花紅爲感使君政嗟時誰
與同

贈友

父子相師友周南義理門阿翁如玉潔賢嗣似春
溫舍後自生筭堂陰亦樹萱西山近在望靜默以
忘言

潘公鳴皋軒

白鶴稟靈質翩翩有奇姿海月比高潔岩雲共透
迤池上菖蒲花春烟紫綬綬飛鳴聊飲啄乘風來
下之我登鳴皋軒遂賦鳴皋詩安得赤玉鳥鶴上
吹參差

西老圖

弔古歎流俗高人陳太丘開窓玩蘭雪邀我画瀛
洲池上賦清林間遠遊悠然遂永日下榻更
淹留

爲張來儀賦匡山讀書處

廬山鬱岌嶷上有香爐峰影落碧天外翠玉琢芙
蓉牽蘿讀書處雲磴無行踪猶遺石岩苔花開紫
丰茸愁心飛春雪寶劍沉雙龍應化蘇耽鶴啼棲
千歲松仙岩採芝叟久別倘相逢

吾友陸友仁甫舊得古銅印一紐以示余辨
之文曰陸定之印以名其子而字之曰仲
安友仁既沒仲安求爲賦焉

吾友伯仁甫覽古閔世盲示我古印章始得自幽
并辨之曰定之釋義爲爾名既名字曰安勗哉在
敬誠仁甫今則亾緬懷涕沾纓繫昔黃太史結交
漢米生手持玉刻文螭紐交縱橫上有元暉字印
刑與弗輕殷勤字其兒祖武冀可繩久矣學業懋
繼述暉芳英書画比二王價重十連城高躅思仰

止景行爾其行

惻惻行

三月十五日陸玄素將從梁鴻山歸吳松
之上是夕坐至夜分始別余入舟賦此追
至梁鴻山寄之以定及冬重來之約

惻惻復惻惻憂思從中發感子遠來訪畏子遽言
別不有同心人何以慰孤寂矧茲春夏交蕭艾盈
路側江水亦浩漾風帆還飄突行將阻攜手轉覺
意忽忽交好匪在今高誼敦自昔人生寧無別所

悲歲時易坐嘆辛夷紫還傷蕙草碧僕夫竊相告
怪我悲憤塞山中梁鴻栖江上陸機宅井曰今蕪
穢鶴唳亦寂寂余往經其墟徘徊但陳迹天地真
旅舍身世等行客汎汎何所損皎皎奚自益修短
諒同歸數面聊懽懽

瞻雲軒

金君伯祥名其先君墓左之室曰瞻雲軒
蓋以寓夫孝思油然而之義也若夫父祖之
魂氣精神其脗合感通之妙齋思則如見

敬祭則來格開牖則天光臨鑿池而泉脉
動洋洋乎如在其上如在其左右者雲豈
足爲喻哉於是廣其義而爲之詩曰

白雲起石上迅逸如迸泉汎演乎林莽飄飄乎山
川飛霞共聯絡凱風與周旋開軒滌遐想我思何
綿綿顧瞻忽在茲亦復停披焉卷舒無定理變幻
徒縈纏典念松下塵若承鶴上仙空花結浮翳百
態交我前戚欣從妄起心膂口口然當識太虚體
勿隨形影遷

張尊師祠醮感致瑞鶴

我識白雲君尚友赤松子仙署闕清巖社公隨役
使步虛禮初日飛神謁鈞天時有五白鶴飛飛遶
香烟手栽千樹桃風吹劫灰盡避世星壇西深竹
聞清磬倏來密霧集忽逐冷風還窓裏遺瑤瑟空
中鏘珮環

題趙若巖龍山精舍

我生倦馳騫無機如漢陰重遊古蘭若對山開我
襟風流李謫仙賞靜諧夙心琅然哦新詩如聞大

雅音回首石林晚白雲花雨深

池蓮詠

廻翔波間風的歷葉上露清池結素彩華月映微
步雲陰花房斂雨歇芳氣度欲去拾明璫踟躕惜
遲算

送陳惟允之金陵

雪消江水綠花發冶城春白下烏衣處輕舟去問
津指口望京國行歌非隱淪好及三釜養歸來以
榮親

徐氏南園對雨

櫻桃花欲落風雨算悽迷忽憶郊園日竹林通礪
西弱蔓滋野援蘭葉長芳畦念我當時友蒿萊沒
舊溪

題畫贈九成

至正十二年三月八日冒風雨過九成荆
溪舟中劉德方郎官方舟烟渚留宿談詩
明日快晴移舟綠水岸下相與嘯咏仰睇
南山遙瞻飛雲夾岸桃柳相廁如散綺霞

掇芳芹而薦潔瀉山瓢而樂志九成出片
紙命画眼前景物紙惡筆凡固欲騁其逸
思大乏騏驥康莊也歐陽公每每云筆硯
精良人主一樂書画同理余亦云焉時舟
中章鍊師岳隱者對奕吳老生吹洞簫
故人郊掾史邀我宿溪船把酒風雨至論詩烟渚
前晨興就清盥息逸愛春天復遇武陵守共尋花
滿川

早春對雨寄張外史

林臥對雲雨憂來不可絕
褰帷望庭際春風動林樾
飛蘿散成霧烟草綠如髮
不見高世人飢渴何絲歇
神鸞戲玄圃巨鱗偃溟渤
爾亦碧巖中遁形修隱訣
燒香庭竹淨洗研池苔
滑取瑟和流泉操瓢酌
明月跡高行亦苦冰蘖
忌芳潔何當往相尋拂石
栖松雪

正月廿五日賦

春岸生蘼蕪春風生蘭芷
夢見平生歡美人今何在
丹竒玄以白忽忽容髮
吹憂來誰能整憂來誰

與解

貽張玄度林宗道

七月廿四日風雨寂寥
與玄度集宗道南窓具酒
肴宴談遂以永日因賦

蕭條風雨秋沈寂
窓牖晚故人山中來
杯酒意勤懇斂眉念
乖濶握手話情悃
千載鶴怨悲九時蓬
萊尊市脯良不易
枯魚雜乾饌浮雲幾
番覆人事匪余忖得
時寧足誇失勢焉用
憤荆溪丘壑多松水
饒芝菌結茅駕厓
广雲棲且安穩夏清
冬與燠

何事鍾與奮逐逐闖闖游戚戚塵俗混張子遂古
學林君業務本達人解其會畧近宜志遠鍾氏曷
仇稽司馬亦藉阮鹿遊姑胥臺島下長洲苑麻姑
固狡獪蓬萊歎清淺七秩吾已老一簣君宜勉後
會未可卜作詩陳繾綣

次韻別鄭明德

思君阻言笑三歲同一日既見令人怒不見令人
憶揮觴縱謔浪抗論殫今昔世方雜涇渭已乃忘
得失饒涎飫甘美醉眼亂朱碧少逢人眼青每遇

俗眼白不隨世混混自喜心得得講學日光輝蓋
性久循率不意吳市門尚復有此客茅齋素壁上
佳句手自摘楓林已搖落梅蕊尚未折吁嗟歲云
暮感歎終日夕殘生能幾面念此氣填臆富貴真
可羞功名竟何物世事蟹登鱗危機猩著屐翁乎
善自守 體保寧 去去勿重陳且復混玉石

重改春日雲林齋居

臨池春流駛掃地入陰滿正襟味道言超遙坐溪
館嵐嶺當書榻煩襟一舒散靡靡松花黃逐逐雲

氣暖石梁青苔合於焉人迹斷故非與世疎冥栖
遂忘返

倪雲林先生詩集卷之一 終



倪雲林先生詩集卷之二
七言古詩

送徐君玉

閩江之水清漣漪，隔江名園多荔枝。閩中女兒天下白，越波飛漿逐鳧鷖。棹歌清綿洲渚闊，蕩槳落日令人悲。蠻煙怪雨忽冥密，蔣芽蒲葉相參差。此中勝事不爲少，徐郎遠遊牽我思。

寄張徐二秀才

東膠山麓繚修阻，春水鳴渠竹滿園。玄真棲遁樂

耕釣徐孺風流存子孫適我騎犢詣其處荷尔作
黍留清言夜闌把燭竟歸卧煙草蜨飛勞夢魂

十二月七日岳季堅夜坐走筆書贈

僧扉共臥風雨夕岳生清真何太顛持家有弟足
自慰無錢沽酒殊可憐梅蕊衝寒愁欲破燈花惱
人故生妍孰知旅枕作孤夢周處廟前行買船

爲曹僉事畫溪山春曉圖因題

荆溪之水清漣漪溪上晴嵐紫翠圍連舸載書烟
渚泊提壺入林春蕨肥身遠雲霄作幽夢手栽花

竹暎竹扉磯頭雪影多鷗鷺也著狂夫一浣衣

奉道曹文貞公墓道奉先亭

奉先亭子山之陰雲氣低回何處尋烏啼隧道風
林靜蘚剝龜趺雨溜深故老猶言前日事鯁生謾
感二毛侵河山流峙英靈在世事紛紛一短吟

古意一首次韻荅曹德昭

齊王好竽客鼓瑟操瑟何以干齊門古人結交多
豪傑况爾封君之子孫王國陳詩終大雅楚俗尚
鬼悲招魂相息日暮不可見鴻飛冥冥目力昏

歲巳酉八月十四日寓甫里之野人居劉君
元暉邀余酌酒快雪齋中對月理詠因賦

長句

涼月紛紛疑積雪凝暉散彩白於銀此時獨酌開
軒坐便欲剡溪尋隱淪爾營茅齋名快雪我醉行
吟踏秋月河漢無聲風露寒心境泠然一潔口

劉君元暉八月十四日邀余玩月快雪齋中

命余詩因賦

卷簾見月形神清疑是山陰夜雪明長歌欲覓剡

溪戴悵然停杯遠恨生爾營茅齋名快雪邀我吹
笙弄明月明星如銀浮翳消垂露成帷桂花發酒
波蕩漾天河傾笙聲嫋嫋秋風咽古人與我不竝
世鶴思鷗情迥愁絕

苦雨行

孟秋苦雨稻禾死天地晦冥龍怒嗔南隣老翁臥
不起漏屋溼薪愁殺人自云今年八十剩力農一
生茲始病兩逢赤旱三遇水租稅何曾應王命吾
今寧免身爲魚死當其時良可吁

延陵道

延陵道去國千有餘里民風質直管季子攸居義
與其屬邑過百里而遠麗于南隲民當西晉有周
處肆勇鬪狠於鄉閭人皆以爲患父老揚言其非
一朝發憤易行忠孝俱其歿已千載民今仰而祠
茲亦余之隣邑也春服始成來游而來娛式逢劉
公揚驪躡躡酌山之泉淪渚蒲相率奠拜步趨礮
如歎咏而去方舟載塗錫山之陽其水舒舒山氣
磅礴而敷腴上升爲雲雨彌滿乎九區厥土沃若

君子于以田斂公度中流揚揚其旗載挹載注原
茲古初睠此平墟實太伯所都夫子所謂至德也
已矣吁嗟遡流百世下聞其讓者尚敦乎薄夫

餘不溪詞

開玄館在餘不溪濱距溪無百步上清王
眞人所立溪流冬夏盈演玉光澄映與他
水特異故爲名焉庚午歲春因市藥過浙
江趣便道將歸梅里俯斯水而悅之泝流
閒咏盥濯平津顧瞻壇宇近在東麓遂舍

舟造其下真人爲出酒脯燕嘯巖洞竟日
乃返悠悠徂歲忽已十有七寒暑矣余旣
爲農畎畝身依稼穡復邇政繁奔走州里
欲爲管遊其可得乎鍊師高騫物表閒情
夷朗周覽宇內將還真館余因仿像疇昔
之所覩極道山之清婉追賦短章以餞斯
別若夫超踪溷濁逍遙玄邁蓋深志於是
矣覽而咏言能無動悲慨乎

餘不溪水綠生蘋放舟演漾當青春舟隨鶴影忽
行遠洞口桃花飛接人雲松蔽虧烟蘿席儼在溪
東之石壁羽人垂衣坐鼓簧饋我晨食芝菌香從
茲更發洞庭渚濯髮咸池臨故鄉

餘不溪水涵綠蘋微風吹波感龍鱗看山蕩槩不
知遠兩岸桃花飛接人溪迴路轉松風急竹林華
房霞氣溼忽逢道士頎而長疑是韓國張子房相
期飄拂紫烟裏下攬滄溟浮玉觴

醉題許生敗壁

生有破屋山西村風雨不出臥衡門藁書其間讀

且溫客來輟書就琴樽宋寔古道安可論

陸隱者禱雪獲應

紇干山頭黃草枯年年雪花大如掌春風草綠牛
羊蕃誰爲祈禳復誰賞南雪絲來到地消今年冬
暖知爲口民間禱雪誠希有旱禱桑林聞管謠

醉歌行次韻酬李徵君春日過草堂賦贈

管聞杜陵之茅屋汀花冥冥汀樹綠舊題新詠荅
年華種木行椒繞山麓石床丹竈青琅玕春渠流
水夜潺湲當年寶劍淪黃土空餘山月照波間今

我不樂懷往古短世紛紛誰比數花下欣逢李白
來山鳥溪童亦歌舞酒酣長嘯五情熱軒冕何榮
築巖說邈然抗節餓首陽何異佯狂抱貞潔君歌
已竟歌我詩賢愚榮顛百年期少文豈愛壁間畫
老疾俱來難命駕仰視翕忽浮雲馳安得乘螭與
雲化楊花縈夢滿晴天迸壑春雷驚醉眠李侯神
清色不動手敲茶雪落輕烟相逢爲樂誠草草竟
欲攜君臥烟島城郭秋風白鶴飛海上飡霞不知
老

杜陵管年有茅屋浣花溪邊錦江曲古人不見春
風來桃李無言自山麓石床蘚澀青泥乾決渠流
水夜潺湲可憐寶劍埋黃土空餘山月照波間今
我不樂空懷古短世長年誰比數花下那知李白
來山鳥恣歌童亦舞酒酣大咲五情熱作相形求
築岩說夷齊相逝居首陽逍遙采薇飽芳潔勿歌
虞夏神農詩賢愚等是百年期魯連恥秦亦蹈海
咲爾局促商山芝少文壁間對圖畫莫待老來誰
命駕仰看翕忽浮雲馳安得乘螭與之化漠漠楊

花縈遠天迸壑晴雷驚醉眠李侯神爽色不動手
中茶雪落輕烟逢君此樂誠草草便欲攜君臥烟
島海上千年白鶴飛世人胡爲而自老

送潭州魯總管

翩翩文鷁飛渡淮歲蕤五采下天階西疇昨夜雨
初遍田父謳歌有好懷湘潭山色隨輕轂談咲來
爲此州牧隔岸桐林散綺霞三月洞庭春水綠

題曹雲西畫松石

雲西老人子曹子畫手遠師韋與李衡門晝掩春

長閒搖毫動筆長風起葉藏戈法枝如籀蒼石庚
庚橫玉理庭前落日滿長松影落吳松半江水

趙千里扇上寫山用鄭山人韻題

誰見解衣作盤礴卷懷雲烟歸掌握春雨冥冥江
水波竹間日暮衣裳薄零落王孫翰墨餘越王臺
殿久荒蕪要知人好畫亦好愛比當年屋上烏

鄭有道隱居梁鴻山因寄

伯鸞近在東山陞室無孟光唯兩兒草堂資煩王
錄事蓮社緣依遠法師迎我掃除松下雪因君起

寫壁間詩便知從子遂真隱深谷紫芝堪療飢

題柯敬仲竹

誰能寫竹復盡善高趙之後文與蘇檢韻蕭蕭人
品係篆籀渾渾書法俱奎章博士生最晚耽詩愛
畫同所趨興來揮灑出新意孰謂高趙先乎吾

江南曲

春風顛春雨急清泪泓泓江水溼落花辭枝悔何
及絲桐哀鳴亂朱碧嗟胡爲客去鄉邑相如家徒
四壁立柳花入水化綠萍江波搖蕩心怔縈

賦耕雲

大茅峯前萬頃雲烟耕雨漑曉網縕也知神物無
根蒂誰種空山誰與耘愛君茅屋當南便閒看陰
晴玩其變白鶴眠松夜夜歸朝逐孤雲如匹練

汎滄浪

滄浪可濯纓春雨看潮生斲得木蘭漿欲向桃源
行桃花源裏秦人住花發綺霞明處處何用文章
寄武陵時有漁郎自來去

對梓樹花

去年梓樹花開時美人明璫坐羅帷今年梓樹花
如雪美人死別已七月梓花如雪不忍看沉吟懷
息淚闌干鳴鳩乳燕共悲咽柳綿風急烟漫漫

恒德堂

虛林閒居養黃寧隱几逍遙遊玉京怡然樂康息
天黥良醫良相仙道并厥施同仁而異名沒身身
存故長生龍虎珮符鳳皇翎出戲玄洲入紫清一
念不已三千齡子能神視廬幽貞觀斯見天地
情氣專志一德乃恒

畫竹

吾友王翁字元舉喚我濡豪畫縑楮喬柯修竹蒼
蘚石霜葉風梢碧滋雨湖州仙去三百禩坡翁高
絕孰與侶黃華父子亦間出氣粗惜產旃裘所本
朝高趙妙一世蔑視子端少稱許薊丘黃岩筆墨
間瑞鶴神鸞競翔翥二公去後無復有谷鳥林烏
誰指數奎章博士丹丘生未若貞嶠能濡响道園
歌咏譽丹丘坡曉畫法難爲語常形常理要玄解
品藻固已英靈聚少陵歌詩雄百代知畫曉書真

謾與坡深書畫詩更妙味永甘香試耽咀嗟余生
後愛詩畫所恨遨遊不從汝王翁好古已成癖說
史談詩身欲羽吳江遇我涕縱橫飯我羹芹一炊
黍晚持此卷索塗抹醜婦爲囀走隣女此詩此畫
君勿咲焚棄筆硯當樽俎

贈季丙卿

季子蕭條千古心斷碑荒冢在江陰行人過客寧
知此春雨年年江水深家園正近延陵郭世遠義
風猶未薄獨識寥寥末派孫種杏成林惟賣藥

題王元用秋水軒

秋水如玉涵綠蒲玉壺美酒清若無佳人倚窗調
錦瑟文君勸飲坐當壚管年種柳遠漢南樹今搖
落人何堪惟有年年秋水至翠烟石黛漾晴嵐開
軒清映臨秋水斜日荷花淡相倚凌波微步襪生
塵交甫凝情珮還委

賦清隱閣

爾營草閣名清隱著在輕鷗遠水邊春池覓句政
思爾拄杖敲門忽繫船共賞奇文哦庾信更誇草

聖法張顛到此自忘歸興逸研雲歸寫古苔篇

題畫

橘窗春夜雨潺潺剪燭裁詩畫碧山迸水定侵林
下路蕙花委砌石苔斑夢乘艇子清江關坐聽橈
聲暗相撥未必漁翁似我閒棹歌不待鳴鳩聒

畫竹贈王允剛

子猷借地種修筠何可一日無此君葉籠書席搖
翠雨陰結香爐屯綠雲聞孫住近吳江渚二仲邀
遊如蔣詡置酒邀余寫竹枝隔竹庖人夜深語

次韻鶴詩

丹鳳歲蕤何處藏翳茲天孫雲錦裳戛然長鳴引
圓吭晨飛岷峨暮良常玉笙寥寥珮琅琅千年仙
驥時歸翔步苔飲泉下趨蹌忽然不返歲月長尔
居鷄羣獨仿偁羽衣猶白未老蒼清都霄臺應已
忘啄腥吞腐塵土鄉棄軒豈復思華陽樊籠未離
勿張皇

寫墨竹贈顧友善

顧伯末派隱君子林居江濱古東里澡身潔行讀

書史思友天下之善士綠竹猗猗蔚材美獨立不
懼羣不倚長吟揮毫爲君起寫其形模惟肖似諒
哉直清可以比

賦翠濤硯

岳翁嘗寶翠濤石今我還珍翠濤硯翠濤泐泐生
縠紋雲章龍文發奇變米章硯山徒自惜此硯顛
應未曾見我初避亂失神物玉蟾滴淚空悽戀珠
還合浦乃有時洗滌摩挲冰玉姿書舟輕迅逐鳧
鷺喜出火宅臨清漪松雲磨香泮毛錐天影江波

雪相詩集 十二
口碧滋一咏新詩開我眉

康素子雜言一首

道德五千言玄之而又玄谷神不死曰玄牝用之
不勤以綿綿太原道士康素子口講此書手畫指
猶龍之後有蒙莊迴薄宇宙有根柢胡蝶栩栩觀
物化濠魚洋洋樂何似壺丘弟子御風遊遊仍有
待曷足恃尻輪神馬鴻濛外恍惚杳冥隨所止化
人之居隣太清十二重樓臨五城千劫謂如一食
頃不起于座空飛行王喬鶴上吹玉笙食棗東海

安期生雲車霓靴到平地渴飲懸河又爲傾大茅
登雲二弟迎紫虛永和傳玉經楊曦以授許長史
玉斧清映道初成貞白子微如日爛千巖萬壑春
冥冥葛玄祭鍊匡廬頂淵雷一聲眠鶴醒道陵章
奏陽平治子孫繩繩祖武繼重陽晚出金末裔全
真尔名欽世世仰瞻在管老莊列近比肝膽遠胡
越要知道不出智勇疾似秋空鷹一撇素乎素乎
尔隣乎道德而不孤凡夫皆具仙真體一扇仁風
病卽蘇

畫寄王雲浦

炎松江水漾春波江上歸舟發棹歌邀我江亭醉
三日鳳笙鸞吹拂雲和紛紜省署縻官職老我澄
懷倦遊歷看君骨相自有仙故作長松挂青壁

趙榮祿馬圖

嘗聞唐開元時畫馬曹將軍妙合變化神紛紜少
陵爲作歌其詞藹如雲又聞宋元祐之中李龍眠
畫法奄出將軍前蘇黃二子誇神駿險語驚飛蛟
螫困國朝天馬來西極振鬣駑駘爲辟易玉堂學

士寫真龍筆陣長驅萬人敵學士歌詩清且腴當
時作者數楊虞畫成題咏兩奇絕價比連城明月
珠吁嗟天馬天一隅寶繪於今亡已夫學士多師
內廐馬得法豈在曹李下俗工未解知神妙此日
罷駑遍區夏好事不傳亦苦心誰爲幽賞伯牙琴
獨悲蘭亭蠶紙隨零雨轉覺臨寫紛紛費毫楮

贈丁醫士

泊舟風雨芙蓉城江上君山雲錦屏我來已是千
年後館主子孫猶識丁丁君手鍊不死藥芙蓉仙

人久相約孤鰥七十老無家種杏春林看落花

寄徐元度

二月苦雨晝如晦閉戶獨眠無所爲黃鳥翻飛乍
依竹櫻桃爛熳開滿枝起覓杜康欲自慰坐無徐
孺令人悲春帆早晚江西去東湖宅前舟可維

送錢成大赴淮南

桐柏山高淮水闊道塗悠悠心忽忽大藩作鎮據
兩淮公侯干城孰子越帶雨春潮送艣聲淮山千
里青相迎隱居行義今寥落到邑煩君訪董生

奉寄沈理問

紫霞虛皇之上清迢迢十二樓五城烟霧窗扉烏
爲使霞綃衣裳翠織成雲旂翠旂集真侶清露如
鉛籠玉宇回看人世萬蚍蜉擾擾泥塗困雲雨騏
驎繫足鳴何飢黃鵠截翮不得飛杜鵑哀號鷓鴣
泣苦竹嶺頭無月輝可憐仙凡一塵隔哀樂紛綸
殊不極人間亦有學仙人神巫傲傲舞瑤席精靈
翁忽虹影長觴湛桂酒羞楓香雲情蜷局難爲駐
世味臞腥不足嘗仙人舊亦人間住棄雲往列仙

曹署願從帝所話悲辛明良畱心乃奇遇我聞天道自循環福善殃淫帝所關令威亦成歸來願豈遂忘情出雨間

蟠踈一首

歲己亥春仲月之六日自寅迄酉震雷且雪甲辰暮冬日癸卯蟠踈見爲震輒飛龍挾雷震落景皎出月老夫頻年熟災異夏凄其風冬乃熱晝霧暝如夜淫雨十旬浹疲農不使憇殘喘志士不得安巖穴國之祲沴古亦有十月震電天或隕石或雨

血人君修德災可弭桑生于朝赫王業方今滔滔天下墊鋒鏑四起羣豪傑孰能拯亂以爲治嗜仁而不虐吁嗟斯民命矣夫荼毒殘傷亦何辜

題畫贈呂彥貞

江上秋雨晴泊舟烟水汀孤吟誰和予悠悠聽姑鳴故人邀我畱三宿豆畦蘿逕居幽歎松醪陸續酌山瓢燈影縱橫寫風竹水光雲氣共悠悠鶴思鷗情樂此畱無褐無衣悲骯髒三沐三爨歎伊優君自息機江上住我且沿洄從此去圖訖新詩草

草裁眼底流光水東注

賦許君震杏林小隱

江上春雨歇喬柯散繁花開樽藉莓苔共醉仙人
家霽景麗華彩微波搖絳霞東風夜來急吹雪滿
江沙明朝杏熟虎爲守郊原綠遍聞鳴蛙

郭文顯善推人禍福神驗賦贈

咎者馬季主賣卜如有神郭君言禍福奇中季之
倫顧我年衰野而躑尚復紛紛嬰世網爲卜明年
春水生欲問桃源刺漁榜

姚節婦詩

節婦復節婦處心良獨苦苟不義以生寧從義而
死荆南流水石齒齒寇辱形虧澆清泚妾可死不
可辱夫從父生死攜女婦兮婦兮死所安使我感
激涕洟瀾古今出處多射利委身事國爲貪奸羸
王易主意未殫身沒令名生美官嗚呼史臣直筆
古來少孤臣直節令尤艱

李徵君將還揚州因言沈郎官吳中賦此以

寄

二月桃始華淮南客還家堦前疎雨落堂上春衣薄爲言沈約在吳中玉壺青絲酒如空春風相過薰草綠芳菲滿堂樂未終

送潘生適越

鏡湖春水綠泔泔兩岸楊花飛白雲落日繫舟微雨歇一壺濁酒飯香芹嘉尔盛名年少得筆精墨妙比羊欣日長高臥無餘事應有人書白練裙

秋鶴軒

開軒北郭名秋鶴鶴影翩翩向寥廓不見千年丁

令威悲嗟城郭是耶非紛紛霜葉飄庭樹苔色荒陰翳烟霧草逕逶迤深樹中時有山僧自來去

送顧生歸四明

江上買舟歸四明竹枝嫋嫋秋風生好營三釜爲親養此去千里飛雲情禾稼登場候鴈至霧雨如晦晨鷄鳴舒王舊日宰邑處苔石縱橫湮姓名

題陳氏齋壁

愛爾茆齋少塵雜時來下帷清晝眠風流政使書裙去嬾惰惟知坦腹便林間病鶴尚俛啄池上山

鷄徒自憐何爲當年種桃者移家偶脫區中緣

宿薩判官家聽琴

薩公能琴賢且文城闈一遇何懽忻高堂埽榻新
雨霽爲鼓瀟湘之水雲竹林蕭瑟風嫋嫋山日掩
靄波泫泫曲終推琴意愈淡忍卽別去隨飛蚊

十一月廿三日率性德原共載過林下而余

適不在遂返棹竟還明日詩來因次韻重

邀之

雲林風雪德不孤指顧可求塗豈迂兩忘主賓政

自好一以禮法何其拘我方飄忽念歲月君乃疎
豁笑人奴再爲理棹急相就放筆看寫狂遊圖

至正十三年三月四日同章鍊師過張先生

山齋壁間見柯敬仲墨竹因懷其人其詩

文書畫鑒賞古跡皆自許爲當代所少狂

逸有高海岳之風但目力稍恕耳今日乃

可得耶

柯公鑒書奎章閣吟詩作畫亦不惡圖書寶玉尊
鼎禪文彩珊瑚光錯落自許才名今獨步身後遺

名將誰託蕭蕭烟雨一枝寒呼爾同遊如可作

贈陸子華

爲愛泖西春水綠三年不來今乃復如來不三宿
桑下子華留我經旬宿東隣唯有沈休文文字詩
篇與討論時時亦復具鷄黍未能厭飫嘉盤飧爲
君吐出無味句歎爾網魚共濡煦不作卑卑兒女
情仰天大笑飄然去

贈顧定之

輕薄紛紛新少年論詩作賦如湧泉爲雲爲雨手

番覆背面傾擠當面憐阿翁七十仍踰四與我同
心生竝世高臥白雲發絳霞草堂門對靈巖寺

贈丘氏兄弟及周生

岑參兄弟皆好奇二丘那復論東西欵門看竹我
初到置酒投轄烏欲棲埽壁寫圖觀落墨淪芹留
坐綴新題東風甚與周郎便桃李陰陰晝滿蹊

贈陶得和製墨

麋膠萬杵搗玄霜螺製初成龍井庄悟得廷珪張
遇法古松煙細色蒼蒼桐花煙出潘衡後依舊升

龍柳枝瘦請看陶法妙非常一點濃雲瓊楮透

丙午十一月十九日避泖上丁未十二月十六日始去此至陳溪分湖間矣因寫喬柯

竹石并詩

泖渚淹留再燠寒移居何處卜林巒可憐產不能
恒業聊復心隨所遇安船底流漸微浙浙葦間初
日已團團故人存沒應難訪愁裏題詩強自寬

倪雲林先生詩集卷第二

倪雲林先生詩集卷之三

五言律詩

與張貞居雲林堂宴集分韻得春字

青苔網庭除曠然無俗塵
依微樵逕接曲密農圃
隣鳴禽已變夏疎花尚駐
春坐對盈樽酒欣從心
所親

用虞道園韻奉贈謝長源

公子太傅裔好於湖上居
卷簾微雨裏岸幘晚風
餘古刻秦斯篆玄經許掾
書何當尋好事鼓枻及

秋初

題張德常良常草堂二首

一室良常洞幽深
古大茅風瓢元自寂
畦甕不知勞
獸出逢騎虎
初來學種桃
還應白雲裏
遲子共遊遨

翠壁隣丹竈
青楓背草堂
琴書聊卒歲
麋鹿自成行
澗水流盃滑
飛花入座香
能無問津者
及此繫舟航

贈王生蒙泉

曉鏡拂秋水
晴簷度白雲
青春去浩浩
豔蕊落紛紛
道在形神豫
心由瞭眊分
君其慎語默
世事豈余聞

俞子中見過

積雨衆芳歇
新晴生綠陰
獸眠方不愜
多子復相尋
鳴鹿在春野
啼鶯聞遠林
余懷良已罄
咏嘯罷清琴

賦平野

見話幽人屋
荒城落日邊
川途漫浩浩
烟樹靄芊芊

芊野稻初收碧江魚上釣鮮何當剩沽酒直到爾
門前

對雨次張貞居韻

戶庭來遊絕園林飛雨滋芳氣初襲蕙園文復散
池裁書恐沾溼對溜漫懷思清溪已可汎方舟幸
及茲

奉荅明卿先生

林靄去鶴唳孤烟原上村襖澗綠雲滿換幘晴景
暄處和斯遺隘抱冲自寡言君亦固窮節衆溺何

當援

題張氏藜竹軒

高軒自虛曠幽竹亦藜生苔石寒依玉風泉夜奏
笙治冠輕可著醞酒綠因名好折青鸞尾仙壇掃
月明

遊善權洞

來窺善權洞一上李公樓水玦巖前引雲旌松際
浮然燈長不夜垂釣只虛舟欲讀吳朝刻真成冒
雪遊

贈簡上人

初公經閣裏復遇簡禪師好飲茅君酒狂吟杜牧
詩錢唐江上去楊柳花飛時帆影青山隔依依夢
見之

友人期過寺中不至

山寺擁爐夜風聲如怒濤獨吟何水部還思王騎
曹曠達余所羨阻別心增勞來茲慰幽寂輕舟幸
卽操

義興吳國良用桐烟製墨黑而有光膠法又

得其傳將遊吳中以求售輒賦詩以速其

行云

生住荆溪上桐花收夕烟墨成羣玉祕囊售百金
傳孰謂奚珪勝徒稱潘谷仙老松端媿汝桐法更
清妍

贈墨生

巖谷春風起桐花落澗紅隔水輕烟發收煤石竈
中豹囊祕玄玉鵝池生白虹湯生法潘谷千載事
同風

題方厓墨蘭

蕭散重居寺春風蕙草生
幽林蒼蘚地綠葉紫璫
莖早悟聞思入終由幻
化成虛空描不盡明月照
敷榮

送徐元度還江西

悠悠西江水綿綿江上山
借問離羣鶴孤飛幾時
還白雪亦忌潔青雲安可攀
時時王子晉吹笙向
人間

秋日贈張茂實

久客東海上秋風吹練裙
放言愛莊叟咲癖如陸
雲采藥清晨出哦詩靜夜聞
滄浪可濯足吾與爾
爲羣

悼朱高士

秋日高人逝微霜蕙草摧
鸞羣空碧沼鶴影自層
臺應御冷風出疑隨密霧來
杉松暮蕭瑟撫事有
餘哀

雲槎軒

已比溝中斷空思海上浮
隨雲秋汎汎貫月夜悠

悠無路通河漢憑誰問女牛漂搖非有待吾道付
滄洲

寄王叔明

能詩何水部愛石米南宮允矣英才最居然外祖
風釣絲烟霧外船影畫圖中他日千金積陶朱術
偶同

悼項山清上人

幽曠山中樂飄颻物外踪梵餘閑憩石定起獨哦
松花落春衣靜雲垂澗戶重依依種蓮處林暝只

聞鐘

賦德機徵君荆南精舍圖

結廬溪水南勝事足幽探夏果足山雨春衣染夕
嵐石欹招鶴磴門俯射蛟潭日日縈歸夢蕭條雪
滿簪

追次唐綦毋潛宿龍興寺詩韻寄方厓

無家何處歸南渚有禪扉湘簟閒秋水池蓮墜羽
衣硯池滋黯黯竹露淨微微秋燕情如客攬君去
槩飛

贈道益

昔者劉高士匡山曾結廬插籬培杞菊克棟著圖書鶴影秋雲外蛩吟夜雨餘茂深繩祖武息景在林居

又贈道益并似陸明本

作賦雲間陸能詩鄴下劉悲秋多遠思振柁作清遊竹冷侵衣屨窗虛見女牛燈前一盃酒漂泊更維舟

送宗天章歸廬山

屏風茅九疊歸伴鶴巢松五老峰前路東林寺裏鐘宗雷憂入社陶謝莽遺踪我亦名山隱他年何處逢

贈公遠

霜葉落欲盡晚山看更青躡將沙際屐坐久水邊亭俛仰已如夢漂搖同泛萍稻梁非所戀黃鵠思冥冥

寄道士王宗晉

王君舊隱地聞更結茅茨鶴髦春裁苧鷲羣雪泛

池時歌綠水曲不負碧山期夜雨生春草令人起
夢思

寄剡九成

州府今爲掾風埃多厚顏香芹渾滿澗去鶴未巢
山思逐春雲亂心隨野水閒章君應話我樗散碧
巖間

邀張彥高

清風入庭戶野客意悠哉一與佳人別階前生綠
苔鬱鬱松陰晚悄悄竹扉開我有盈樽酒懸榻待

君來

用韻重寄

山齋秋聽雨高卧興悠哉鹿飲荒池水蝸耕石逕
苔寶瑟芳塵滿臨尊詎忍開長吟我有待躡屩子
能來

寄張德常

卜宅近溪西雲烟只尺迷晝眠同野鶴晨懶候林
雞舊種松三逕春栽菊滿畦來禽與青李囊致不
封題

三月十日義興王子明送竹菌賦詩

竹下拾烟菌筠籃初送將亭亭似三秀楚楚異衆
芳猶帶雨露氣更懷泉石鄉此日山中客筍蕨得
新嘗

高進道水竹居

我愛高隱士移家水竹邊白雲行鏡裏翠雨落階
前獨坐敷書席相過趁釣船何當重來此爲醉酒
如川

張天民溪亭

菴畫溪亭月當窗影更妍朱絃彈淥水細柳舞春
烟杜牧何年宅山僧栖夜禪張公一杯酒獸醉羲
皇前

送王叔明

連榻卧聽雨劇談清更真少年英邁氣求子不多
人仕祿豈云貴貝琛非所珍當希陋巷者樂道不
知貧

積雨

積雨生朝菌微風墮碧蓮鷺池汲書水鶴帳理琴

絃屐躡苔衣破窗承樹影圓空林無與語長夏曲
肱眠

賦雪蓬

手把玉麈尾身披素綺裘梨花縈夜月柳絮入虛
舟不作饑鶯咏其如載酒遊因懷郟溪興烟水暮
悠悠

孤雲用王叔明韻

烟浦寒汀雨吳山楚水春絕無凝滯跡本是不羈
人鶴鶴同栖息蛟龍任屈伸自嗟猶有累斯世有

吾身

二月十六日賦

白鶴烟霧遠滄洲雲海寬藤蕪細雨溼桃李春風
寒沉憂鬱不解離緒杳無端還憶郊園集琴醞共
清歡

寫山陰丘壑圖寄趙士瞻

吾愛趙徵士清才能逸羣昔營山陰宅今在吳松
濱月牖自理詠春羹偏美芹遠懷松上鶴寫寄嶺
頭雲

賦雪舟

一舸星河渚空明玉氣浮懷仙李太白訪達王子
猷月明如可掇曙光疑欲流銀屏雲母障夢爲笙
鶴遊

題李遵道山居圖

披圖慘不樂日暮眇余思坐石看雲處空齋對榻
時世途悲荏苒墨氣尚淋漓惆悵騎鯨客于今豈
有之

寫秋林遠岫圖贈約齋因題

五言韋刺史此地數曾遊無復綠陰靜空悲紅樹
秋市聲晨浩浩雲影暮悠悠徵士冲襟勝邀余共
茗甌

次韻酬荅謝參軍王長史二首

岩巖太華隱婉戀東山情學本猶龍老詩工阮步
兵心期流水遠世事浮雲輕公府饒才彥琅琅玉
雪明

示病維摩室端居無俗情清齋久絕飲白首不論
兵露壁蛩吟切風林鶴骨輕何時王內史相見眼

增明

贈友生

故人于靜遠訪我到南湖作黍蔬親滄開筵酒屢
沾臨流同嘯咏剪燭尚歌呼長夜清無寐還爲風
竹圖

題畫

甫里林居靜江湖遠浸山漁舟衝雨出巢鶴帶雲
還漉酒松肪滑敷茵楮雪閒春風一來過似泊武
陵灣

荒村

踽踽荒村客悠悠遠道情竹梧秋雨碧荷芰晚波
明穴鼠能人拱池鷺類鶴鳴蕭條阮遙集幾屐了
餘生

七月十四日對雨一首

雨簷驚瀉瀑江漲忽通渠古砌羅秋草荒畦綴晚
蔬稍開雲表月還掩篋中書欲話幽貞意忘言已
久如

寄虞子賢

天濶海漫漫崑山望眼寬桃源迷晉世松樹受秦
官雨蘚鹿迹遍霜梧鸞影寒封題數行字聊問竹
平安

贈沈文舉

波光浮草閣苔色上春衣楊柳鶯啼遠櫻桃鳥啄
稀榮名非所慕登覽竟忘歸泖水宜修禊重來坐
釣磯

爲文舉畫泖山圖因題

華亭西畔路來訪舊時踪月浸半江水蓮開九朶

峰酒盃時可把林叟或相從興盡冷然去雲濤起
壑松

已酉八月廿三日雨至廿六日乃開霽賦五

言呈德常

積雨琴絲緩沿堦蘚碧滋泥途方汨沒茅屋且棲
遲酒向隣家貫盃從野老持便應從此去海上候
安期

徐伯樞歸耘軒

歸耘向何處近在東膠山白雲宿虛牖釣艇常荒

灣彈琴送落月濯纓弄潺湲寸田勿稂莠所願勤
治芟

用彝齋韻贈張韓二君

張仲情何厚韓康誼亦深賦詩論宿好聚首契初
心阮籍唯須酒陶潛不解琴與君忘爾汝蕭散鶴
鳴陰

賦謝王彝齋

不面纔經宿題書細作行心親情戀戀事往意茫
茫酒榼浮松蘂羊腔截玉肪歌詩報佳貺期此共

徜徉

次韻酬彝齋見詒二首

秋氣入幽居堦前樹影疎筋骸渾懶惰服食轉清
虛薄晚魚潛渚新晴溜繞除茯苓期共煮悵望苦
吟餘

荆溪丘壑遠暇日得躋攀野客時相過高人意自
閒敲門看修竹卜宅近青山勝事今寧有幽吟一
解顏

畫竹寄王彝齋

荆南山色裏翠竹密綠溪冉冉春烟薄冥冥暮雨
迷夢長蝴蝶化行遠鷓鴣啼舊日栽桃李清陰自
滿蹊

聽雨

樓上看春雨玉笙悲遠天辛夷紅點筆芳草綠搖
烟冉冉侵書幌冥冥溼釣船新愁嫌點滴元不到
鷗邊

畫寄王雲浦

蕭散賢公子衡門似水清花間青鳥過砌下綠苔

生山色排簷入江波照眼明開圖想幽境欲爲寫
閒情

雨几

雨几唯生睡村醪不解愁泥塗深溺象身世眇浮
漚逕草紛披溼林扉慘淡秋何人富春渚五月披
羊裘

題丘氏壁

我愛丘君宅蕭然隱者風石邊蒙細篠井上植高
桐墨沼鷺羣白雲窗藥葢紅咏歌當上巳修禊樂

融融

三芳圖

丹桂月光落倚蘭琴調清
歎伶秋鶴瘦相對夜江
橫芳烈誰先後才華孰重輕
道心安有染無物惱
閒情

畫江天晚色贈志學

不見呂君久題詩懷不忘
風聲渾落葉山影半斜
陽獨鶴來遲算孤帆出渺茫
爲圖秋色去畱寄讀
書堂

桂花

桂花畱晚色簾影淡秋光靡靡
風還落菲菲夜未央
玉繩低缺月金鴨罷焚香
忽起故園想冷然歸
夢長

荅雲浦

尋真狎隱淪息景絕風塵
屈子能安義陶公每任
真山中宜餌木江上憶羹
蓴亦欲從栖遯柴車爲
爾巾

題墨竹贈李文遠

義興李文遠墨法似潘衡麋角膠偏勝桐花烟更
清紫雲腴泛泛玄璧理庚庚安得龍香劑霜枝寫
月明

送僧

聞說四明道山川似若耶去依阿育塔還宿梵王
家望井封殘雪江船聚晚沙光公强健否持底作
生涯

垂虹亭

虛閣春城外澄湖暮雨邊飛雲忽入戶去鳥欲窮

天林屋青西映吳松碧左連登臨感時物快吸酒
如川

三月四日解逅德方郎官九成掾史於荆溪
之上相從及旬而別因九成徵余畫并賦
詩爲贈

剡掾學阮掾宛然西晉風百年聊復爾三語將無
同載酒來溪上看山入剡中孤帆逐雲影烟雨滿
春空

又題畫贈九成

吳山春雨淨江渚暮潮平解纜欣初霽開帆已到
城剡君有高趣樽酒慰閒情醉吐真丘壑毫端一
咲成

暮春期潘徵君不至

風林驚宿雨澗戶落殘花芳月忽已晚幽期良恐
賒黃鸝念求友鸚鵡呼煮茶猶候犢車至心親寧
憚遐

寄徐仲清

巖谷採靈藥蕭條栖遁情白雲簷下宿海鶴階前

鳴燕俎登春菌晨飧脯竹萌詩憑五瀉水好過蘭
陵城

送李徵君遊荆溪因寄王司丞

何處尋狂客故人王子猷花落庭前樹風吹溪上
舟紫筍生春雨綠蕒滿芳洲心隨酒船發悵望不
能休

題畫贈張玄度

蕭條江渚上舟楫晚相過卷幔吟青嶂臨流寫白
鷺壯心千里馬歸夢五湖波園石荒筠翳風前悅

浩歌

玄度文學好學工詞翰藹然如虹之氣真江南
澤中千里駒也十二月十四日侍乃翁訪僕江
渚相與話舊踟躕深動故園之感因想像喬木
佳石翳沒於荒筠草蔓之中遂寫此意并賦詩
以贈焉

爲唐景玉畫丘壑圖并賦

丹經畱玉斧真籙佩青童蛻迹氛埃外怡情岩穴
中吹笙縵嶺月理詠舞雩風欲畫玄洲 揮毫清

興同

稽山草堂爲韓致因賦

稽山讀書處應近賀公湖澗月懸蘿鏡汀花落酒
壺賣藥入城市扁舟在菰蒲逃名向深僻君豈伯
休徒

五雲書屋

幽深隱者宅迢遞少微山賀公鏡湖曲李白棹歌
還雨几研苔碧風軒江竹斑韓衆近何似晏景白
雲間

畫竹贈王光大

荆溪王隱士相見每從容借地仍栽竹巢雲獨傍
松青苔盤石淨嘉樹綠陰重約我同栖遁高高茅
幾峰

題漁樵友卷

釣水復樵山逃名宇宙間一篙春水淨半畝落花
閒鷗鳥時親狎松雲共往還厭聞塵世事緬邈不
相關

題畫贈王仲和

曾住南湖宅于今已十年鼓筠還自翳喬木故依
然雨雜鳴渠溜雲連煮朮烟何時重相過爛醉得
佳眠

南湖陸玄素高士幽居今王君仲和居之水木
清華戶庭幽邃余嘗寓其家四年翛然忘世慮
也仲和以此幀索畫竹石畫已并詩其上以寫
惓惓之懷玄素仲和外舅也故尤感余故人之
思乙巳初月十七日

荅光大

空谷枉嘉藻幽吟當廩秋詩鏗清廟瑟書聳屈盧
矛學業余多愧才華子歎優飛鸞天外羽斯世邈
難儔

畫竹寄張天民

良常南洞口聞有掃塵齋竹影春當戶泉聲夜遶
堦自矜霜兔健安有魯魚乖截得青鸞尾因風寄
好懷

題元朴上人壁

蕭條江上寺迢遞白雲橫坐待高僧久時聞落葉

聲鴟夷懷往事張翰有餘情獨掉扁舟去門前潮
未生

挽張德常

孝弟由天性清貞有祖風宦遊江郭遠歸隱曲林
通嗜古真成癖歌詩信已工有才悲賈傅荏苒百
年中

寄張心遠

江海章高士相違已半年青山雲冉冉白鶴影翩
翩坐看神鼇抃行吟秋水邊何當拾瑤草遲子華

山巔

寄張景昭

烟渚落日後風林清嘯餘輕舟下天際高人遺素
書筭脯炊菰米松醪薦菊菹子有林壑趣江海一
胥疎

寄東白上人

楓林散霞綺湖水淡秋烟忽憶北麻漾初春掉酒
船羽客借鱸具高僧醉棲禪何時來甫里痛飲

前

畫吳松山色贈潘以仁

吳松春水綠搖蕩半江雲嵐翠窗前落松聲渚際
聞潘郎狂嗜古容我醉書裙鼓柁他年去相從遠
俗氛

贈友

父子相師友周南義理門阿翁如玉潔賢嗣似春
溫舍後自生筍堂陰亦樹萱西山近在望靜默以
忘言

贈陸隱君

甫里高人後風流有裔孫愛山仍愛畫
閒饌復畱樽每看雲眠石因尋竹欵門
今朝嵐翠溼應是雨翻盆

倪雲林先生詩集卷之三終

倪雲林先生詩集卷之四

七言律詩

北里

舍北舍南來往少自無人覓野夫家鳩鳴桑上還
催種人語烟中始焙茶池水雲籠芳草氣井床露
淨碧桐花練衣挂石生幽夢睡起行吟到日斜

山園

春水鳧鷖野外堂山園細路橋花香栖栖身世書
盈篋漠漠風烟酒一觴豈謂任真無禮法也須從

俗著冠裳不營產業人應咲竹本桃栽已就行

林下

林深何處尋行逕披草時過野老家練練澄波晴
偃月蜿蜒小塢曲藏蛇孤帆賣藥來勾曲獨木爲
橋似若耶高卧閉門成懶癖蒼苔從滿石樽窪

林下遣興

眼見藤梢已過墻手拈書卷復堆床閒臨水檻親
魚鳥欲出柴門畏虎狼冠製不嫌龜殼小衣裾新
剪鶴翎長從來任拙唯踈懶一月秋陰不下堂

春日

閉門積雨生幽草歎息櫻桃爛熳開春淺不知寒
食近水深唯有白鷗來卽看垂柳侵磯石已有飛
花拂酒盃今日新晴見山色還須拄杖踏青苔

二月十日玄文館聽雨

卧聽夜雨鳴高屋忽憶陂塘春水生何意遠林饑
獨鶴若爲幽谷滯流鶯成叢枸杞還堪采滿樹櫻
桃空復情二月江頭風浪急無機鷗鳥亦頻驚

對雨寄張伯雨

雪林詩集 二
把酒獨臨溪上雨林深地僻少相過忽與天際真人想欲乞山陰道士鶩坐久研苔侵袖碧書成簷溜沒堦多悠然靜寄東軒下日莫徘徊聊短歌

雪後過陳子貞隱居

陶公卜宅南村裏快雪初晴思一遊樹辨微茫來獨鶴櫓搖歌側散輕鷗墨池繞溜春水滿塵榻繡書夕照收相見惘然如有失掉頭吟咏出林丘

吳門賦謝陸繼之黃柑紫蟹之貺

闔閭城外皆春水斜日維舟方醉眠携手故人驚

夢裏送書飛雁落尊前黃柑開裏煩相贈紫蟹傾筐也可憐憶爾馱居湖上宅晴窻竒石翠生烟

送井允從

來尋墨沼雲林下共愛女蘿懸石床喚人鸚鵡語猶澁當戶枇杷子半黃奉橘定應題百顆籠鶩卽欲寫千行蘭亭書法人間少好去山陰覓野航

送徐元度

荷鍾空林春雨餘艤舟江岸燕飛初去尋天上仙人珮肯顧山中隱者居霜月四更提劒舞田園二

項帶經鋤蘭榮柳密南檐下佇子雲間枉尺書

寄鄭徵士

谷口子真今最賢久別鬱鬱夢相牽好營秫田多
釀酒欲買茅屋尚無錢兄病每書賒藥券客來唯
候煮茶烟闔閭城東有艇子憶爾青燈相對眠

荆溪卽事

銅官之山溪水南周處廟前多夕嵐看卷雲帆歌
白紵勸嘗春酒破黃柑長林獸往誰能覓幽事相
關性所耽苦欲避喧那畏虎倘從地主結松龕

奉懷張外史

陰壑慘慘綠苔生碧雲亭亭多遠情松杉鶴去轉
蕭瑟洲渚花落自蹤橫從君下榻住十日看我鼓
枻出層城洞口茵巢無恙否定應閉閣著書成

次韻薩天錫寄張外史

谷口路微山木合濕衣空翠不曾晴饑猿扳檻爲
人立寒犬號林如豹聲小閣秋清聽雨卧長空日
出採芝行道心得失已無夢沐髮朝真候五更

送張外史還山

道士朝乘白鶴還樓臺金碧鎖空山半天花雨飛
幢節萬壑松風雜珮環丹井夜寒光刻刻石壇春
靜蘚斑斑飄然便擬從君隱分我玄洲一半間

次韻陳子貞見示

漠漠寒烟墟落際猶餘凍雪鎖荒榛行隨雲谷采
樵者飯供松龕學道人未必杜陵渾懶慢可憐逸
少轉清真酒船好纜溪頭石花鳥相娛行及春

寄鄒九成

芙蓉洲渚暎江波落日維舟發棹歌坐久不知初

月墮居謀何處白雲多糝糠富貴知吾否簿領風
埃奈子何几格香材倘持寄熏爐茶鼎樂漁簑

顧仲贄來聞徐生病差

室裏維摩病已瘳竹爐藥鼎雨聲秋一畦杞菊爲
供具滿壁江山入卧遊舟外鷗波情浩蕩窻間蝶
夢思綢繆虎頭癡絕從談謔煮茗聊爲半日留

雨後

雨後循除泉亂流落花時節綠陰稠石尊貯酒供
杯飲素壁圖書入卧遊翳日長林藏伏虎際天春

水若輕鷗幽居四月饒櫻笋醉裏題詩一散愁

以龍尾硯寄錢徵士

龍尾誰磋古硯池庚庚玄璧隱風漪知君筆力能
扛鼎愛我雲腴欲產芝投贈寧論百金直咏懷更
賦五言詩唯應洗濯寒泉潔靜試松煤獨下帷

鶴溪爲張天民賦

溪西松影高千尺白鶴時時眠上頭風雨不驚鷗
鷺宿雲霄應與鳳鸞遊明窻筆格珊瑚樹新釀松
花瑪瑙甌露下鳴臯聲聞遠幽人空谷獨相求

聽秋軒

聽秋軒裏聽秋雨定起山僧坐翠微隱隱烟濤搖
夜席濛濛花雨著人衣驟如崖瀑衝雲落婉似湘
靈鼓瑟希六用根塵今已淨松篁陰下共香霏

次韻重居寺壁間柯博士舊題

初月五日春意動遠水蕩漾情如何鏡中羞見白
髮短柳上愁看青眼多起拂綠琴歌楚調爲留明
月挂松蘿弭棹溪南一杯酒它年浪迹倘重過

初書記以詩來別且諄諄開諭深見方外之

情因走筆次韻奉謝併期面別

從知四大皆假合順境逆途非樂憂夢中妄想驚
得鹿海上忘機思狎鷗舉世何人到彼岸歎君知
我似虛舟詩來說法能開諭頑曠無情也點頭

鄭明德新居

僦居吳市仍栽竹挂榻高齋歎待余風引香烟金
鵲尾雨添書水玉蟾蜍仲舉未應治一室更生何
用博羣書繞床阿堵那嫌俗每罄金錢一飯餘

悼頂山清上人

盃渡前溪見水源偶來佩芷服蘭蓀香臺猶帶山
窻影經卷長依松樹根雲起晴峯還有觸雪消春
野不留痕翛然我已忘言說翠竹黃花自滿園

晨起一首寄丹丘

竹窗晨起聞幽鳥深巷絕無車馬喧多病馬卿非
不遇歸田陶令自忘言墻陰薯蕷苗方茁雨裏櫻
桃花正繁二月陰寒少晴日坐看春水上柴門

寄張貞居

不但入城踪迹少南隣野老見猶稀狂歌鳴鳳聊

自慰舊學屠龍良已非蒼蘚渾封麋鹿逕白雲新
補薜蘿衣羊君筆札誰能寄欲讀靈文一扣扉

送貞居還山

日暮書傳青鳥使華林瑤草待君歸挾舟婉婉雙
龍出背雨寥寥一鶴飛秋水琢成蒼玉珮朝霞補
作紫烟衣山中長史來相覓應借窗間白羽揮

再用韻寄貞居及柳太常鄭有道

華陽外史從幽討谷口高人亦賦歸遙憶愚溪對
山坐何時菌閣看鴻飛荒荒旭日晞玄髮瀟瀟流

泉浣素衣寂寞松窗懸榻處塵生塵尾不堪揮

次韻郊九成見寄

郭外青山舊結廬微茫野逕望中無殘生竟抱烟
霞癖好事猶傳海岳圖夜壁松風懸雅樂秋池菊
水酌商觚倘從世外求玄賞好趁輕舟看浴鳧

題米南宮石刻遺像

米公遺像刻堅珉猶在荒烟野水濱絕歎莓苔迷
慘淡細看風骨尚嶙峋山中仙塚芝應長海內清
詩語最新地僻無人打碑賣每懷英爽一傷神

賦居延王孫德新小隱軒

志隱寧須分小大不論屢市與山林橘中之樂固
不淺壺裏有春藏更深奕戲自能忘世事酒尊聊
用散冲襟莘耕岩築苟無過豈有朝堂論道心

送浙憲掾劉彥文并簡張貞居

落日采蘋溪水綠目追帆影先飛鴻寄書爲覓仙
人隱種杏今居丹井東遠道悠悠宵入夢晴波洶
洶畫多風鳴珂使者清無事爾得優游羣掾中

寄吳孟思并懷貞居

江海風流吳孟思十年不見髮成絲舊同野老松
花供今寄仙君石室碑秋日滿船初晒藥晴雲浮
水獨臨池南山樹裏孤棲鶴爾去何當一問之

寄王叔明

幾夢山陰王右軍筆精墨妙最能文每將竹影撫
秋月更愛山居寫白雲祕笈封題饒古迹雅懷蕭
散逸人羣今年七夕聞多事曝畫繙書到夕曛

戲題嚴錄事所集書畫數

雨館晝逢嚴錄事手持書畫索題詩金題玉躐齊

梁迹墓刻厓鑿秦漢碑把玩始驚繁卷軸品量還
愧拙言詞古人冷淡今誰尚謾葺殘編慰所思

薩仲明爲丞相府掾時僦居京師名其軒曰
半野後買宅延陵亦揭是名於軒因兩宿
其下遂爲賦此

何意開軒名半野身存魏闕思江湖斜侵瓜圃通
花藥稍傍薇垣近竹梧千里秋風催斫鱸九霄晨
露浥飛鳧如今別買荒城宅自掃風林候野夫

次韻和德原率性所賦十二月四日雪

海宇希微隱一毫行舟冰膠夕停篙愁看寂寂雙
峰並細數林林亂石高豈有風塵勞白羽謾思文
采照宮袍雪融二月溪流合洞口誰尋千樹桃

贈葛子熙

打碑直入長安道養母還歸白馬峰聞道陰厓畱
積雪將尋隱地看長松晴窗弄翰山僧對寒澗行
樵野鹿逢爲問山中危太朴到州應與子相逢

題荆南精舍圖

誰畫荆南精舍圖烟霏嵐翠墨模糊林間野鹿時

相逐洞口山猿不受呼尚有流泉悲夜雨已迷幽
逕入寒蕪痴人莫彈西飛鶴雲外仙君恐姓蘇

賦德機荆南精舍圖

溪上田園定有無愁將歸思畫成圖春林寂寂花
開落風牖冷冷鬼嘯呼尚有流泉悲夜雨已荒幽
逕入寒蕪何當一舉同黃鵠未覺山川路鬱紆

贈別益以道書記

一咲相逢豈有期因懷西崦話移時李公祠畔空
餘月陸子泉頭舊有詩旅思悽悽非中酒人情落

落似殘棋雲濤眼底三生夢鷗影秋汀又語離

辛亥六月三日寓實性源禪房爲寫竹稍因

賦

開門便肯畱人宿不夜長然禮佛燈君已風流如
惠遠我聊吟嘯答孫登來依長夏安居者莫厭無
家有髮僧清夜哦詩江月白琅玕節下影鬚鬢
此身已悟幻泡影淨性元如日月燈衣裏繫珠非
不得波間有筏要人登狂馳尚覓安心法玄解寧
爲縛律僧曲几蒲團無病惱松蘿垂戶綠鬚鬢

殘生已薄崦嵫景猶護餘光似曉燈縣圃雨雲元
不隔華嚴樓閣也須登夢歸金菌山前路飯仰白
雲窗裏僧獨鶴步庭閒顧影西風吹鬢雪鬚鬢

送寶南琛往往荆溪碧雲寺兼柬方厓

碧雲林壑杳重重此去風流似簡公春藥確閒湍
激下空山蛩響月明中結茅擬候芝三秀眠鹿應
遺地一弓聞道重居開竹牖待予艇子過溪東

八月三日與劉道益連床夜話風雨淒然五

日開霽道益賦詩見貽次韻一首

扁舟小泊菰蒲雨玄論都消身意塵空寂室中無
侍者蕭條雲外不羈人酒盃畏病不復舉燈火新
涼差可親嫋嫋秋風振庭樹綠波芳草似初春

俊仲明以詩見示次韻

南湖流水綠泱泱野鶴同栖秋夜長短世應須幾
緡屐懷人可但九迴腸驚風零亂芭蕉影冷雨淒
迷菑菑香高尚劉君此栖遁凝之百世有餘光

別彥貞

空齋風雨話連宵歸夢不知山水遙鶴遠城荒嗟

寂寂香霏鬢影共蕭蕭市中乳虎人三語燈下寒
菹酒一瓢無念百年聊樂爾海鷗飛去定難招

畱別王叔明

秋蛩唧唧雨蕭蕭楮穎陶泓伴次寥此去不能期
後會清言聊以永今朝溼雲窗裏初溫酒白鳥汀
前又晚潮故國何人賦招隱桂花零落更停橈

別張玄度

歸去荆溪丘壑多松陵浦口復來過清風明月許
玄度泛宅浮家張志和夜雨燈檠歌陸續秋林樹

子落杪櫂相逢相別嗟遲算人事多乖奈若何

挽鶴溪張先生

子述孫承久熾昌荐饑多施活人方句金壇下良
常洞白鶴溪邊世壽堂孔壁遺書覘古學祇園法
藏溢神光乘雲咲謝人間世九秩逍遙返帝鄉

送張以中由宜興歸金壇

亂後歸來事事非子長遊歷壯心違陶公館裏懷
仙友杜牧堤邊戀落暉松下白雲初起石草間夕
露已沾衣君今尚有歸耕地顧我將從何處歸

西野對雨清坐有懷明本彥準并呈道益
怪雨顛風裂芰荷鷗飛歷亂水驚波便須掃地焚
香坐豈有高人載酒過笠澤至今能養鴨山陰何
處覓籠鶯重陰忽霽猶斜日惆悵思君奈若何

過蘭陵留宿蔣達善家

蔣翊初開竹下逕野夫聊乘溪上舟珍簾敷床夏
水薄細簾受風春浪浮圍棋終日對急雨解帶六
月如高秋可憐相口便傾倒就宿爲君少淹留
其允從來過溪上將還汝寧賦此奉送

野夫住近青山郭左右雲林無市聲忽有故人騎
馬至卽呼稚子出門迎虛窗圖史少開笈細雨滄
浪同濯纓乍別林居無所賴裁詩相憶字欵傾
送盛道士遊浙東

浙東山水隔層雲雪霽千峰曉不分蕭瑟松林疑
鶴語縱橫苔石見羊羣昔聞陽洞啓神祕中有仙
人留玉文羨爾尋真不辭遠好隨烟霧把飛裙

送倪中愷入都

酌酒送君遊上京風帆回首闔閭城烟消南國梅

花發冰泮長河春水生太史奏雲龍五色伶倫吹
律鳳雙鳴仰觀禮樂夔龍盛好播聲詩頌治平

春日送別余一秀才

翼翼高帆開遠天綠波芳草隨烟綿春林風雨集
憂思茅屋琴書移晷眠文采由來庾信少草聖近
誇張旭顛百年聚散如落葉行客居人俱可憐

賦王真人胎仙樓

紫閣峇巖秘玉文攝衣迎日禮神君河汾鳳吹來
未泯城郭鶴歸今復聞貪看飛裙舞綵繚遙伶風

馭散繽紛世人政若塵眯目指點虛無疑白雲

奉和虞學士寄張外史

華陽上館誰曾到知有高人避世深當戶春雲團
紫葢洗空花雨散青林丹臺篆迹龍蛇動經閣松
聲鸞鶴吟念子離居消息遠幾將書札寄遙岑

奉和苦雨

冥冥秋雨溺田禾日日奔雷吼怒鼉十里荒涼黃
犢草五湖浩蕩白鷗波直應天地移龍穴未覺階
除失蟻窠君子憂民重興感吁嗟天意欲如何

奉和虞學士賦上清劉真人畫像

君向積金峰頂住長年高卧聽松風蓬萊雲近瞻
天闕劔珮春明下漢宮歸去長謠紫芝曲翩然遠
挹黃眉翁標名合在諸天上何事置身岩壑中

再和前韻

焚香坐石孤峰月飛珮朝天萬壑風邈爾空歌傳
碧落飄然流響振金宮神君教服玄霜劑聖主能
延綠髮翁共道乘鸞去無迹祥雲繚繞畫圖中

寄曹德昭

苦憶建溪人姓曹五湖春水雲山高丹厓青林紫
步障蜀錦越羅金錯刀已知雅頌播廟瑟無復謳
吟悲楚騷伏生衰朽見鵬化願同斥鷃巢蓬蒿

再寄

荆溪山水最清遠結屋溪邊住幾年澗底松栖何
處鶴山中茶焙隔林烟清談况有王戎勝閉戶仍
聞孫敬賢詩卷何當時寄我長篇短句使人傳

春日試筆

喜看新酒似鶯黃已有春風拂草堂二月江南初

破柳扁舟晚下獸鳴榔苔生不碍山人屐花發應
連野老墻美酒已拚千日醉莫將時事攪愁腸

送簡禪師易道

蓮花峰下簡禪師半醉狂吟索賦詩榻上諸僧禪
定後水邊高閣算鐘時不堪雨柳縈春夢且看書
燈照夜棋苦羨雲栖松上鶴吾生漂泊竟何之

題曹伯高爲曹尚書之子卜居詩卷

清貧我早識尚書身沒韓公爲結廬可但家聲今
不替也趨禁直未全疎窗臨墨沼揚雄宅郭映雲

林謝眺居共愛諸郎遊息地風雲閒咏算春初

雲泉小隱爲張德機賦

朝夕輕鷗傍釣磯好山自不與人違琴尊花圃春
酣後童冠風雪晚咏歸清卧半間僧入定流侵三
逕客來稀却憐服食清虛甚黃馱松花煮療饑

送盧錄判之建寧

清溪九曲遊人少想見官河一水分理楫初辭季
子邑到州好訪考亭文簿書閒暇對春雨齋舍蕭
條栖白雲洗我明年塵土足扁舟亦覓武夷君

寄張天明

清溪演漾綠生蘋溪上軒楹發興新只欠竹陰垂
北牖儘多山色近南津湖魚入饌長留客沙鳥緣
堦不畏人媿我萍踪此淹泊片雲回首一傷神

贈張景昭

張卿自道古遺民世外尋真狎隱淪虛閣松聲砑
笙磬小山桂樹絕風塵晨朝絳闕存三景夜掃青
壇禮七真末俗頑仙非所取清才如子不多人

寄陸靜遠

積雨雲林生薜蘿墨池新漲浴羣鷺每懷笠澤從
漁釣更擬滄浪聽棹歌蓮葉滿湖雲掩冉橘花垂
戶雪婆婆布帆十幅秋風裏卽買吳船載酒過

題趙榮祿墨竹

綠江修竹巧臨模慘淡松烟忽若無亂葉寫空分
向背寒流篆石共縈紆春渚雲迷思鼓瑟青厓月
落聽啼鳥誰憐文采風流意謾賞丹青沒骨圖

李文遠製墨次吳寅夫韻

潘衡墨法老坡傳承曼昆仍又幾年猷依山室燒

桐子贈與仙人寫內篇石竈霞光存活火夜帷雲
影炫晴烟要知文字遺不朽猶向詩中咏墨仙

張貞居有詩東梁鴻山楊君次韻

鴻山一向受朝曦戶牖嵐光晝吐吞梁婦終甘隱
吳市戴琴遂不過王門弦歌寂寂虛千載井臼依
依自一村掃雪獸尋楊處士蕭條古道與誰論

用王叔明韻題畫

王郎筆力追前輩海岳新圖入卧遊獸鶴眠松猶
警露孤猿挂樹忽驚秋陶潛宅畔五株柳范蠡湖

中一葉舟同煮茯苓期歲算殘生此外更何求

居竹軒

翠竹如雲江水春結茅依竹住江濱階前迸笋從
侵逕雨後垂陰欲覆隣暎葉黃鸝還自語傍人白
鶴亦能馴遙知靜者忘聲色滿屋清風未覺貧

送芳祖二上人叅禮育王寺光公

四明之山林麓幽育王塔前神光流湯休賦詩歎
寂寞遠公結社憶風流貝葉經文白業進曇花樓
閣青春幽易屨上堂禮足已香烟雲霧共悠悠

宴吳氏樓居

雲松之樓高入雲松頂風聲十里聞瓊盃綺食行
春雨翠幔朱簾捲夕曛宴遊適當山擁榻醉卧莫
遣人書裙西飛白鶴東歸去回首巢居謝俗氛

岳王墓

奸任忠誅轉繆悠鄂王功業浩難收出師未久班
師急相國翻爲敵國謀廢壘河山猶帶憤悲風蘭
蕙總驚秋異代行人一洒淚荒墳落日重回頭

九日

自歎不能孤九日一壺濁酒對西山遙憐玉樹秋
風裏靜看冥鴻落日間草木蕭蕭雲更碧山川漠
漠鳥飛還長途誰是陶彭澤被褐行吟意自閒

送張鍊師遊七閩

高士不羈如野鶴忽思閩海重經過舟前春水它
鄉遠雪後晴山何處多巖鯨卧雲芳草細鈎輶啼
樹野烟和武陵九曲最清絕落日采蘋聞棹歌

首夏卽興呈貞居

鶯鴨如雲散碧波來禽青李壓枝低深林汲澗常

聞虎清晝焚香獸下帷路出城東無十里燕來堂
上不多時可怜稚笋都成竹忽見春蠶已吐絲

杭人有傳余死者貞居聞之愴然因賦此以

寄

果園橘熟誰分餉茅屋詩成懶寄將衰謝皆傳余
已死迂踈真與世相忘夜分風雨雞鳴急天闊江
湖雁影長寥落百年能幾面論文猶及重銜觴
霧隱空山秋已深茅齋酒熟向誰斟菊花楓葉愁
相並澗水松風伴獸吟洗耳不堪聞俗語醉眠且

復罷清琴遙知對月深予憶忍不題詩慰子心

奉次張伯雨潘子素酌唱韻

團團桂樹覆巖阿茅屋歸來雪一窩高卧丘園奇
氣在倦遊江海故人多楚山白雁遵寒渚練水長
魚出素波去去南州書問少寂寥誰和紫芝歌

再和

至元三年丁丑歲十一月廿日子素徵君
與允從郎官共載過元度許泊舟新塘之
上寄示去年子素徵君與僕酬倡詩去年

二君畱林下實長至日也而明日亦適長
至忽然隔歲感之興懷貞居在餘杭北郭
結樓居之號茅嶺行窩余久欲往觀而未
能也且貞居復有來此之約因走筆重次

韻一首

已向雲林開別墅兼聞茅嶺有行窩提魚就煮興
不淺看竹頻來意更多梅鳴雪晴紅綴萼墨池水
暖綠生波懸知潘令閒居賦不比陰山勅勒歌

送盛高霞

霜髮飄飄鶴上仙相逢遼海幾何年種桃遂有劉
郎賦鼓瑟寧知曾點賢華表不歸塵汨汨吹蕭何
處月娟娟嗟余百歲強過半欲借玄窗靜學禪

寄高霞

不見情親踰一載素書到手淚滂沱仙人蛻骨煩
重瘞去鶴思歸忍再過墓左碑隨烟燼冷手栽松
斲斧斤多知君欲話悲辛意慟哭爭如後會何

宿清流堂

衍慶院中無市聲清流堂上晚風清一派濁溼從

污染百灘白月見空明我性非澄本爾淨外塵徒
擾元不驚恒公宴坐清涼海還許遊人來濯纓

贈君震

遠愛尋山復好仙鶴歸城郭幾何年靈芝每掇巖
前秀祕訣還從肘後懸松月半空垂羽蓋風湍一
壑寫鷗絃擬開精舍當懸溜唯與丹陽許叔玄

贈張楨

憶昨州民饋餽初兵戈阻絕飽艱虞忽驚歸路千
荆棘莫致南溪雙鯉魚別浦秋蓮明泛泛寒廳夜

雨落踈踈青衫從事將軍幙已覺門多長者車

題畫貽王光大

荆南山色隱晴湖暖翠當窗不用圖避世移家今
十載盛書連舸泊三吳可憐畫卷撩歸夢依舊香
奩傍藥爐珍重故人王架閣筆能扛鼎要人扶
荆南山色青如染卜築正當溪水南浪舞漁舟鷗
泛泛雪消沙渚柳參參涼軒楓葉晴雲綴秋浦荷
花落日酣舊宅不歸幽夢遠吳松聊結小禪龕

寄白石

雲林詩集 二十三
就屋淪盟也任渠爭巢野鵲厭鳩居人情轉劇空
懷土家具無多莫借車踽踽獨行良不易紛紛薄
俗竟何如波瀾翻覆從千變道眼遐觀熱惱除

寄張德常

身世蕭蕭一羽輕白螺盃裏酌滄瀛逍遙自足忘
鵬鷄漫浪何須記姓名石鼎煮雲聽澗雨玉笙吹
月和松聲憑君爲問張公子曾到良常夢亦清

送德常同知

聞道之官嘉定去載書連舸泊江濱城樓近瞰吳

松月堠館微霑滄海雲宓子風流常宰邑張翰識
達更能文亦欲東觀釣鯨手棹歌秋趁白鷗羣

次韻奉荅德常別駕初夏見懷一首

隔浦鼉鳴似打衙雲濤城郭夕陽斜汀前露冷魚
鱗屋窗裏烟輕蟬狹紗沛澤風雷時遠几談空衣
袂不沾花欲分香飯能來否菩薩如今只在家

題張以中野亭

人境曠無車馬雜軒楹只在第三橋開門草色侵
書幌隔水松聲和玉簫一榻雲山供夏簟滿江烟

雨看春潮君能擷取飛霞珮天際真人近可招

贈惟寅

陳君惟寅天倪先生令子也天倪爲黃清
權高士之甥清介孤峭甚似其舅讀書鼓
琴不慕榮進澹泊無欲以終其身惟寅能
守其家法者也世故險巇安貧自樂窮經
學古教授鄉里色養得親之懽心友愛盡
弟妹之和樂綴葺詩文于以自娛余嘗愛
其藻麗不羣蕭然有出塵之想聊摘鄙語

用歎才華葺春之辰忽過江渚復示新製
相與諷詠因成長句以歸美焉

不見陳君動隔年暮春孤坐此江邊政憂江闊多
風雨却喜君來共簡編諷詠新詩非偶爾艱虞遠
別更凄然看花相約重口過已放柳條維酒船

題孫氏雪林小隱

天地飄飄一短蓬小窗虛白地爐紅脩然忽起梨
雲夢不定仍因柳絮風鶴影離蕙簷上下鹿迹散
漫屋西東杜門我自無干請閑寫芭蕉入畫中

陽春堂

陽春堂下春波綠臘雪初消蕙草青未覺避喧離
世俗也知習靜愛郊垆欲爲野逕孤琴約盡醉華
筵雙玉瓶見說陶朱有遠趣長松傾蓋碧亭亭

送杭州謝總管

南省迢遙阻北京張公開府任豪英守臣視爵等
侯伯僕射親民如父兄錢廟有碑刊夜雨岳墳無
樹著秋聲好將飲食濡飢渴何待三年報政成

上巳日感懷

石梁破屋路欹斜似華陽道士家漠漠春雲飛
別鶴潺潺夜雨雜鳴蛙閒看稚子翻書葉時有隣
翁汲井花日暮傷心江水綠共舟人已躡飛霞

蕭從善集其師張外史詩爲賦一首

葛翁臺上繙經處陸子泉頭試茗時石記只畱金
菌閣宮銘猶樹玉津池晚探風雅還心醉謾說曹
劉是我師麟角鳳毛勤採拾却愁雷電取無遺

贈張玄度時方喪內

吳松江水似荆溪九點烟嵐落日西寂寂郊園寒

食過蕭蕭風雨竹雞啼蕙花委砌心應折芳草歸
途意轉迷曾得魯連消息否春潮隨雨到長堤

三月廿二日雨懷荆溪勝遊寄原道

我昔繫舟尋杜牧荆溪流水落川光春茶已放仙
人掌露蘚渾侵玉女床酒闌更踏花間月舞罷猶
彈陌上桑此日狂遊忘旦暮十年回首意茫茫

二月晦日聽劉伯容彈琴

遠思翩翩屬五湖一盃濁酒咏唐虞清琴忽作金
石弄佳士今猶山澤臞飛絮遊絲颺風日瀑流松

吹酒中襦羣龍汨溺淫哇久古樂蕭條古道迂

次韻送梁生讀書沈庄

上蔡梁君譜系蕃凌烟勛業舊諸孫廬山傍斗可
攬秀大江自岷初發源夜誦庭柯雜琴響春羹汀
藻帶潮痕休文舊宅宜終隱歸近南湖祇樹園

酬友生

泖水山光照屋廬每思潘令賦閒居客愁不解連
三月詩贈全勝枉尺書醉墨不妨拈秃筆狂吟時
復近前除亂離自嘆摧頽甚晝寢毋嗔老宰予

次韻思復送元白上人往中竺

求法高僧何處去向中天竺最高峰飛禽欲沒天
低樹杖錫應投湖外鐘半席白雲臨碧澗四更落
月掛長松定回依約三千歲若見拈花紹遠宗

寄錢伯行

斑斑苔砌蕙花消忽忽美人山水遙夢得池塘春
草句望殘烟日晚江潮汀雲沙鳥時同宿野飯芹
羹或見招洒掃南湖石上月爲畱清影醉吹簫

次韻張榮祿追和楊別駕賦王番陽東湖勝

遊四首用呈雲浦耕雲二月公

祇今誰是番陽守別駕題詩凡幾春僚屬得才青
瑣舊兒童騎竹白頭新當筵意欲凌雲外今日人
誰問水濱陳迹寥寥風景切桃源何處覓遺民
賓客從來逸興多雨深春渚綠增波笙簫載月廻
鸞鶴雲錦飛裙織芰荷短世悠悠大槐國餘哀嫋
嫋竹枝歌湖山寥落行人老翠影蒼烟寒蕩磨
散亂鳧鷖發棹謳波明雲淨宛如秋酒盃青落垂
楊影塵尾風生杜若洲匣裏鳴琴俄復掩盃中覆

水竟難收白頭聞說開元盛雙淚滂沱似瀑流
湖上晚風明綺霞春雲覆竹影交加歌喉圓滑吟
山鳥舞袖低迴亂渚花綠淨碧虛寧敢唾星垂河
注欲乘槎玉堂坐想當時勝榮祿詩成謾自誇

桑柘

桑柘蕭條半草萊百年人事哽悲摧沙丘漂母寧
復有故國王孫誰見哀歌吹淒涼銅雀妓世途荏
苒霸城災遙知敕勒穹廬野日夕牛羊欲下來

謝伯理東還訪之不遇次韻因賦

謝朓宅前山黛濃山雲飛墮墨池中攜家又作它
鄉夢歸棹還隨落葉風鶴入暝烟愁浩渺鷗浮遠
水思清空尋君不遇成惆悵江草青青岸蓼紅

喜謝仲野見過

堦下櫻桃已著花窗前野客歎思家故人攜手踏
江路拄杖敲門驚夢華藉草悲歌聲激烈停杯寫
竹字欹斜新蒲細柳依依綠西北浮雲望眼遮

丙午十一月十九日避泖上丁未十二月十

六日始去此至陳溪分湖間矣

泖渚淹留再燠寒移居何處卜林巒可憐產不能
恒業聊復心隨所遇安船底流澌微浙浙葦間初
日已團團故人存沒應難訪愁裏題詩強自寬

寄錢伯行

春雨斑斑長菊苗坐怜依砌蕙花消此時行逕泉
浸溼閉戶哦詩江動搖政爾清虛忘世傲不妨貧
賤使人驕下帷寂寞錢徵士艇子看花許我邀

寄王成夫

茂深閉閣馱焚香那識窮愁客異鄉坐拂朱絃彈

綠水狂攜紅袖浹清觴春池雨後泉應滿庭樹雲
移影更長月燭露帷非子樂五湖烟景屬漁郎

寄陸明本索酒

楊柳低昂蕙草青西庄風景似華亭日修長史登
真訣夜誦虛皇內景經玉牒初標紫臺籍石苔應
長新宮銘自慙服食清虛甚爲覓松肪釀百瓶

乙未歲余年適五十幼志於學皓首無成因
誦昔人知非之言慨然永歎謾賦長句

陰風二月柳依依隱映湖南白板扉旅泊無成還

自咲吾生如寄欲何歸美人竟與春鴻遠短髮忽
如霜藻稀五十知非良有以重嗟學與寸心違

贈王文靜

靜寄軒中酒一尊陶然醉裏別乾坤碧桃花已當
窗發翠竹陰須映戶繁荏苒春光逐風雨婆婆歲
晚樂丘園說說更祝螽斯羽若欲宜男賸種萱

在同里懷元用

一水東西雲窈窕幾家楊柳木芙蓉齋居幽閒無
人到屐齒經行破蘚封密竹窗虛秋半雨楓林寺

遠日沈鐘寄詩爲道長相憶想亦依依念去踪

次韻荅元用

野水浮鷗不世情烟濤漂泊羽毛輕雲移短棹無
幾久雪點青山照眼明甫里宅邊逢酒熟吳松江
上看潮生夫君爲話征途苦惆悵令人意不平

次朱秉中韻

鳥啼花落水西濤幾日門前春水深丈室自寬千
戶邑一經已富滿籬金樗散餘年猶嗜酒夢回遠
道歎驚心桃源亦有秦人在落日漁舟何處尋

贈張玄度

一年不見張玄度秋夜吳城忽爾逢清似石湖梅
上月瘦於廬阜瀑邊松白冠緇布前朝服短髮長
齋舊日容昔者交朋淪落盡埋憂爲樂且遊從

題本中峰觀蓮像

東南唱道據禪林諷咏蓮心契本心善矣不塵仍
不染美哉如玉復如金三周妙法耆闍崛十丈開
花玉井岑今日仰師猶古佛風波回首一長吟

寄熙本明

在山無事入城中每問歸樵得信通松室夜燈禪
影瘦石潭秋水道心空幽扉獸掩林間雨疎磬遙
傳谷口風幾度行吟欲相覓亂流深澗隔西東
白首遙知得道餘不聞詩思近何如高齋夜雪同
誰話古木寒山獨自居夢裏只尋行去路愁時聊
讀寄來書夕陽溪上多飛鳥若個能看影是虛

用王子明韻

從俗浮沈多厚顏醉筵舞袖作弓彎雉羅孰是逃
三窟豹管能窺見一斑縱酒已拚時共棄歌詩猶

與世相關采薇岩穴聊終隱林下閒雲自往還

寄盧士行

闔閭浦口路依微笠澤汀邊白板扉照夜風燈人
獨宿打窗江雨鶴相依畏途豈有新知樂老境空
息故里歸擬問桃花泛春水船頭浪暖鰕魚肥

送徐子素

山館畱君才一月梅花無數倚霜晴垂簾幽閣團
雲影貯火茶爐作雨聲深竹每容馴鹿卧青山時
與道人行歸舟載得梁溪雪惆悵隣雞月四更

題畫送僧

不到荆溪三十秋南津溪水亦東流用公住近金
鸞嶺魏族猶隣白虎丘楓葉爛斑霜落後竹枝蕭
瑟渚邊頭歸逢古德方厓叟爲話談玄舊日遊

用大機吳人也住宜興保安寺壬子九月十九
日將還山戲寫秋樹筠石并詩以贈之且以呈
方厓禪伯云

綠波軒

綠波佳息復如何堦下清陰芳草多爛醉哦詩絃

寶瑟閒眠欹枕慢烟蘿莫將華髮臨明鏡還寫黃
庭換白鷺剪取吳松雲錦麗天孫機杼隔明河

又題

旅況淞澗似夢中孤舟江上白蘋風蕭條病起三
家豎憔悴天涯一秃翁翟底鷓鴣歎鵬鴉雷鳴瓦
缶棄黃鐘憂來直欲窮牛渚河漢迢迢碧漢通

次韻寓齋秋懷

渚蒲岸柳望秋零桂樹懸香月影清埜水浮舟歸
未得酒盃到手句還成雲松眠鶴夢方遠露草寒

蟹鳴不平南郭先生玄默久猶將諷咏寄閒情
問我歸期未有程秋光羈息共淒清雪畱鴻迹應
如幻擅仰龜毛豈有成破屋逃亡寒燐起故宮基
構綠蕪平試聽嗚咽長溝水水本無情似有情
息歸江漢濯塵纓況乃秋高氣凜清滿壁山圖初
睡起一簾烟雨又詩成遠樹阡阡烟鶴唳飛鳶跼
跼暮潮平屏風九疊淙松瀑擬畢餘生棲遁情

追和虞道園送張伯雨入茅山詩韻

外史棲真何處尋洞花源上草苔深星壇醮後雲

封徑仙驥歸來風滿林丹竈石幢遺任迹寒松流水續幽吟虞書傳寶人間世爲有清詩寄碧岑

東林隱所次韻

寢扉桃李晝陰陰耕鑿居人有遠心一夜池塘春草綠孤村風雨落花深不嗔遊老羣爭席時有遊魚出聽琴白髮多情陸徵士松間石上續幽吟

寄張府判

德常明公舊有良常草堂在金壇華陽之天良常亦華陽洞名揭曼碩張仲舉諸學

士嘗賦詩紀勝其後德常宦遊無定居政績彰彰顯著今爲松江府判官因士友潘以仁之便輒賦七言一首奉寄陰陽冥隲宜少畱意閒居尚可爲之況身有職任而值飢者易爲食之時乎仙官分置洞宮亦如世間局任者矣吾德常兄固知之也詩中因寓斯意云鐵崖翁見之必大咲也令英似來侍併爲致意

樗散張侯意久疎齋厨服食轉清虛童初府署標

名後碧落仙官校錄餘海上空濛歸化鶴人間繁
劇臭如駕吳松江水浮青玉聊此食霞駐羽車

夜宿張判府環綠軒贈玄度

戊申十月十八夜環綠軒中借榻眠舞影霜筠風
細細縈窗素練月娟娟此生寄迹雁遵渚何處窮
源漁刺船染筆題詩更秉燭語深香冷息淒然

呈良常安遇賢伯仲

無家已老復何歸碧樹團團尚夕暉清越風湍帝
子瑟縱橫隴畝僧伽衣世波汨溺毋溷我節序炎

涼且息機白鳥汀前坐來久泉侵野逕暮依微
松陵竟失五車書梅里燒焚舊屋廬衰季悲吟歎
羅隱盛時作賦羨相如伊優骯髒復何似臃腫支
離聊與居日月秋風白蘋老門前江水接空虛

三月一日自松陵過華亭

竹西鶯語太丁寧斜日山光澹翠屏春與繁花俱
欲謝病如中酒不能醒鷗明野水孤帆影鶻沒長
天遠樹青舟楫何堪更畱滯更窮幽賞過華亭

再用前韻呈錢思復

霞食雲卧養黃寧玉笈幽文護石屏一榻松濤金石弄半鐫茶雪夢魂醒瓏玲泰室生虛白縹緲空歌自始青不見仙風雲上過羽車芝蓋曉亭亭

再用韻呈諸公

北窗高卧自清寧烟霧衣裳雲錦屏舉世無知心自得衆人皆醉我何醒黃熊號野兵埃黑白骨生苔鬼燐青舊宅荒蕪時入夢墨池誰訪子雲亭

贈劉伯庸

前朝丞相劉忠肅尚有雲仍能鼓琴聽者三沐以

三疊善哉如玉復如金久淫鄭衛亂吾耳忽復古初之雅音我思古人禁忿欲用此養正而鈎深

贈別姚子章都事

不見高人十五年相看兩鬢各皤然酒溫鶯語煩三請樵熟蠶筐已四眠舞袖醉傲明月下歸心飛度白鷗前練溪尚見韓徵士好示新圖竹色娟

四月廿八日蓬屋題

江湖風雨夢頻驚舟楫沿洄莫計程不幸乃今成大幸有生真亦似無生鄰生自足賢賓主岑氏誰

言好弟兄世故愛憎從毀譽一杯聊復暢幽情

子章號夢菴走筆題

夢菴春夢幾時醒隱約江湖且寓形愁見亂離心
忽忽迹疎親友淚熒熒松陵遇我才經宿浙水歸
舟且暫停蕉鹿紛紛何得失霞明烟外數峰青

贈友生

江頭二月雨垂垂起濯塵纓水滿池賀監宅前重
載酒辟疆園裏更題詩川塗幽邈鴻歸遠窗戶虛
寒燕到遲忽見故人王架閣夜闌秉燭話余思

次韻荅王彝齋見贈

客居北渚靜窺臨霜藻蕭蕭雪滿簪玉石在山聊
混璞金蘭惟子久同心每懷往事悲今事莫棄分
陰惜寸陰自咲蝸廬無長物窗前陶器與單衾

寄朱府判

明月娟娟夜二更挑燈孤坐不勝情尊前舊恨多
年積枕上新愁何處生已作閒雲孤鶴去不堪隨
柳傍花行使君爲省春田出可念憂時老釣畊

和朱秉中二首

僦居茅屋碧江濤花落空階一尺深山簡由來狂
愛酒管寧不復顧鉏金長鯨吸浪成何事老鶴鳴
臯見遠心中歲畏從親友別自憐華髮已侵尋
白板扉開江水濤雨餘階下綠苔深愚人自寶應
非石同舍緣知不盜金天地瘡痍誰復憫江湖羈
旅我同心故山日日生歸夢翠竹青松自百尋

題王敬之屋壁

我來陸庄如故鄉故鄉風景日淒涼解憂幸有盈
樽酒慰眼新栽百畝秧蒲葉清波閒濯足荷花斜

日起鳴榔當年李白成何事白髮綠愁萬丈長

贈周校書

中年習靜松江渚回首塵埃多厚顏富貴不如長
處賤奔馳何似得心閒參天竹樹存貞碧動地波
瀾任往還輸與荆溪周處士避人探道掩松關

過桐里

依微桐里接松陵綠玉青瑤繚復縈爲咏江城秋
草色馱行烟渚暮鐘聲黃香宅裏畱三宿甫里門
前過幾程借書市藥時來往不向居人道姓名

寄陳余二校書

吳松江水碧沄沄忽憶陳余兩隱君
酒艇時搖夜濤月書幃影亂晴窗雲
一貧老我長爲客二陸英賢已著文
何事兩君唯寂寞清言況不使予聞

贈別榮子仁

退食從容下玉除當年史館燦成書
藝場馳騁荅賓戲筆陣縱橫賦子虛
松水娛情經亂後圖書連舸度江初
君來愧我無供給一勺寒泉薦菊菹

次韻邵生

已從鷗鳥狎雲深老我無機似漢陰
采采菊花猶滿地蕭蕭霜髮不勝簪
南遊阻絕傷多壘北望艱危折寸心
好在吳松江水上青猿啼處有楓林

贈姚掾史

相府共推三語掾卜居曾占九龍峰
美髯不獨如靈運佳句仍兼似鮑溶
我有茅齋當絕壁時看晴雪落長松
因君喚起故園夢彷彿三生石上逢

別章鍊師

方舟共濟春江闊訪我寒烟菰葦中
鼓枻斜衝蕢

葉雨鈎簾半怯杏花風
仙人壇上芝應碧玉窗
中桃未紅擬趁輕帆數
來往縹壺不惜酒如空

寄養正

得君佳句清如玉秋色
驚人換物華老境侵尋
真有感故園隔絕更興
嗟女蘿綠遍牽茅屋烏
相紅明映落霞欲酌一
尊澆磊塊幾時邀子過
田家

贈岳松澗

曾訪神仙五粒松澗泉
流潤白雲封林間蘿葛
交青影石上萹蒲開紫
茸煮石有方畱祕訣采
花何

處覓行踪岳君別我三
千歲晚戲滄洲又汝逢

次韻屋漏

寂寞江天暮色懸重陰
愁絕卷塵編走看破壁
雨沉竈息卧蘆花雪滿
船風捲旱堤高樹拔泉
翻野援藥苗延青山天
矯浮雲外自愛新秋爽
氣鮮

送張貞居遊靈常洞兼簡王晉齋

荆溪山水閟靈宮子晉
笙簧駐碧峰午夜月明
風滿帳千厓人靜鶴眠
松綠知瑤草春來長應
有仙人洞口逢莫爲青
螺翁久住歸時騎取葛
陂龍

陸文玉見過

荆溪二月春風惡燈火論交夜對床白鶴遶壇初
露下碧梧滿地忽霜黃卜商失子人誰弔阮籍窮
途只自傷政使陸郎能慰藉賦詩懷舊更淒涼

送諸從事之越中

郡廳草色映青衫從事風流雪滿簪最愛長官能
化俗也知僚佐願停驂右軍宅裏尋苔石賀監湖
邊咏夕嵐它日從君覓佳果來禽青李不須函

送僧遊天台次張外史韻

四明山水名天下師去那知客路遙雪霽驚鷹騰
宿莽月明寒鵲集疎條坐尋雲頂千峰石歸趁江
頭八月潮說與住山光老子送賓也合過溪橋

過許生茅屋看竹

舟過山西已夕曛許生茅屋遠人羣鑿池數尺通
野水開牖一規畱白雲煮藥烟輕衝竈出碓茶聲
遠隔溪聞可憐也有王猷興堦下新移廿此君

送葉道士東歸分得懸字韻

憶爾心如旌旆懸相逢溲渚欲華顛窮冬風景吾

衰矣落日烟濤息渺然八咏樓前思舊宅三高祠
下覓歸船棲幽定洗塵喧耳剩吸東陽一斛泉

送柳道傳東歸

賦詩南澗寫烏絲靄靄停雲去後思鄉國動成經
歲別江湖復與故人辭溪船斫膾雲生柁松室聞
猿月滿枝他日重尋言子宅咏歌唯許暮春時

寄開元長老兼呈鄭明德

已公令我詩興生堂下綠苔無俗情天女下試寶
花墜曲生相逢青眼橫布金已任長老宅乞食應

憐王舍城何當棹歌一來過同載唯許鄭康成

贈道士李嘯虛

龍虎岩前李鍊師幾時飛鳥洞庭睡晴天白鶴興
閒遠秋水蒼龍光陸離山中杏熟從收穀堦下芝
生看弈棋邂逅樓船海上便還應與爾道相期

失鶴

啄粟巢松泰華峰直將天地作樊籠不聞丁令歸
華表應馭王喬入太空行迹縱橫苔石上寒棲依
舊竹林中清齋我亦厭腥腐長歎思乘萬里風

送章鍊師入京

五鶴翩翩朝帝京青童遙侍玉皇君倚天樓觀金
銀氣蔽日旌旗錦繡文夜禮洞庭薦明水春陪遊
輦望祥雲何人得似愚溪子高舉凌風思不羣

贈楊大同

石魚峰下子危子出有楊義陪勝遊斜日碧山梁
苑暮清風白拂冶亭秋松肪和飲三危露桂棹同
乘萬里流擬酌春醪相慰藉梅花欲發聽鳴騶

江上遇楊德朋

吳松江上米家船邂逅龜蒙舊宅前政似燕鴻交
泛泛聊憑楮穎度年年糟床滴雨誰沽酒破衲蒙
頭獨坐禪莫學山僧空載月主人情重更畱連

寄德朋

故人欲問梁鴻宅遺迹猶應杵臼存楓葉菊花秋
瑟瑟荒園廢圃雨昏昏農人掩舍春明墅縣吏催
租夜打門唯有德朋多遠思賦詩刻燭酒重溫

寄友

幽窗談咲話平生三十年前幾變更白髮滿頭今

已老青山排闥故多情桃花灼灼應無語春雨蕭蕭尚未晴明日扁舟攜好酒南山笋蕨正堪烹

馬國瑞東臯軒

未羨勲名馬伏波少游鄉里樂婆娑輕舟陌上山堪數細雨籬邊菊未蒨浩蕩五湖鷗夢遠蕭寥萬里鸚情多寒廳時有幽人宿月燭高懷慢綠蘿

次韻通書記同過鄭先生舊宅

女蘿垂綠翳衡門野水通池沒舊痕有道忘情觀物化清言如在想人存淒涼江海空茅宇慘淡烟

埃委石尊一奠山泉薦芹藻古心寂寞竟誰論

清明

江雲籠雨白烟生愁眼看花淚溼纓可惜紅英滿芳草又經上巳復清明漂漂羈旅燕鴻迹昵昵愁息兒女情老鶴莫教塵土浣碧岩松下紫芝榮

溪山勝槩樓

樓下清溪夏亦寒溪頭箇箇白鷗閒風回綠卷平堤水林缺青分隔岸山若士振衣千仞表何人泛宅五湖間絕憐與子同清賞定向雲霄共往還

和華以愚韻兼題所畫春山高士圖

扁舟溪上數來過
白髮殘春奈我何
柳絮如烟迷曉浦
杏花飛雪點春波
林扉有客圖丘壑
石室何人帶女蘿
欲和華山高隱曲
羈愁悽斷不成歌

寄王明卿

不見孝廉踰十年
高人風節自居然
數間茅屋無人補
一榻寒雲只獨眠
酒榼時須栗里菊
茶烟還煮惠山泉
衡門不出棲遲久
坐有孫登彈一絃

送霞外師過磧沙寺因寄鄭博士毅長老

湖水東邊磧沙寺
繡經室裏看爭棋
食馴沙鳥巢當戶
坐愛汀雲影入帷
惠遠何修爲律縛
康成終老只書痴
寄語山靈莫疑怪
松陰好護中興碑

次韻錢思復見貽

文章傳法似傳燈
治病宜求三折肱
退食君休大槐國
安居我學小乘僧
業勤已有朋來樂
步闊能無祖武繩
欲挈一壺相慰藉
春船月色待君乘

贈墨生吳善

吳生製墨變潘法
任近義興山郭中
洗玉巧當前

澗水采花還覓古時桐照夜虹光燈隱壁拂雲鸞
尾谷生風長年圭壁富潤屋我善養生那有窮

風雨

風雨蕭條歌慨慷忽思往事已微茫山人酒勸花
間月秦女箏彈陌上桑燈影半窗千里夢泥塗一
日九回腸此生傳舍無非寓謾認他鄉是故鄉

宿普度僧舍

悲涼華屋總荒墟人事乖張已久如兩部草池蛙
鼓吹一襟桐露鶴堦除狂遊且盡餘生酒宿習猶

存半舸書初日輕烟櫂歌去江潭柳影亦蕭疎

寄周履道

兼旬不見周徵士落月空梁夢見之久狎海鷗聊
避俗虛言市虎竟成疑尊前節序梅將玉鏡裏形
容鬢已絲日暮烟濤隔城郭蕭條南渚一吟詩

曲彥遠寄茗裹賦此道謝且求致梨栗木瓜
遶屋青山謝眺居木瓜梨栗種扶疎不妨暇日騎
官馬自喜清時少簿書九月授衣霜欲落百年回
首雁飛初猶憐蹢蹢空山客茗裹封題遠慰予

寄徐季明

海虞山下徐公宅修竹長松左右栽陳榻待君時
一下顧園有客莫驅回至今清夢依依在欲寄新
詩草草裁自是漫郎嫌俗子也應魚石有蒼苔

三月廿二日雨懷荆溪舊遊寄原道

憶昔荆溪棹酒船綠波搖蕩女蘿烟春茶未放仙
人掌雨巖先舒稚子拳岩間石上尋遺迹作賦題
詩多昔賢今日空齋獨對雨幽懷猶夢白雲邊
乙巳三月七日清明風雨憤憤因成長句

春風多雨少曾晴愁眼看花淚欲傾抱膝長吟酬
短世傷心上已復清明亂離漂泊竟終老去住彼
此難爲情孤生弔影吾與我遠水滄浪堪濯纓

次韻贈林泉民張孟辰

三逕誰尋二仲蹤一丘之木紫溪翁思尊張翰有
清識閉閣茂深多祖風午夢池塘春草綠輕陰窗
戶落花紅應懷錫谷林泉勝山色依微在望中

故吾一首

縹緲青山日欲晡瀟漫秋水興何孤鶴歸城郭生

新夢塵掩圖書尚故吾南畝藝苗傷碩鼠北窗臨
澗聽啼鳥醉歸倘乞封侯地便復移家傍酒壚

寄顧仲瑛

江海秋風日夜涼蟲鳴絡緯尚練裳民生惴惴瘡
痍甚旅泛依依道路長衰柳半欹湖水碧濁醪猶
趁菊花黃知君習靜觀諸妄林下清齋理藥囊

病中懷先友華陽外史用韻一首

憶昔時雍四海寧華陽外史住南屏春愁黯黯懷
仙卧幽鳥關關喚夢醒塞雁歸時鶯出谷園花落

盡柳縈青傷心南北數千里無復沙墩長短亭

雨中在林氏賦贈徐生

終朝風雨洗炎歊隱几無言思沈寥已絕鳴蟬咽
衰柳空吟翡翠集蘭茗嘉魚坊裏多名酒碧鳳橋
邊欲晚潮二子林徐有高致爲陳筆墨遠相招

寄陳庶子

高行昔聞陳太丘雲行好在思遠遊丹砂擬訪葛
洪井湖水堪乘范蠡舟爐銀欲變頭先白田林可
釀行歸休且排憂憤澄神慮奏刀已覺無全牛

歸錫麓

未訪西岩墨沼泉東家兒女笑相牽莫話艱難長
旅食敢忘蕭散送餘年穉稷雲黃秋雨後芙蓉霜
落渚鷗邊歸來何異遼東鶴荒塚纍纍思惘然

送葉道士再用懸字韻二首

愁心黯對夕陽懸忽見高標喜欲顛似與人民千
歲隔更詢耆舊一悽然青燈綠酒看成醉祕篋珍
圖自滿船歸去還臨劒池月定應歌此酌山泉
君到茅簷雨溜懸采芝期我碧山顛掀髯一咲非

徒爾隔世重逢豈偶然沙渚屐聲歸泖客晚潮帆
影下江船爲予一話艱危際雙淚沾衣似迸泉

學書

幾叢枸杞護藩籬一逕莓苔卧鹿麋獨許陶泓爲
口友更呼毛穎伴幽棲野鷺家雞成品第來禽青
李入書題臨池自歎清狂甚直好還同鍛柳稽

贈范壻

范公文杏園西宅喧寂一塵渾異宜鼓琴深林調
清越讀書稚子聲吾伊簾旌不動香如霧硯席生

涼雨散絲欲飲寒泉錫麓洞暫違清賞一題詩

題鄧氏扇上

鄧家層軒留十日陸郎酒船來百回
尊羹鱸膾亦已甚米甌雪碗何爲哉
江雲飄飄委坐席岸柳垂垂落酒杯
飲酣戲寫齊統扇山河微影月徘徊

二月二十日大風

南渚春風二月狂任船濯足鳴榔烟邊去
鳥暮山碧衣上飛花春雨香
□□□□遠懷不作悠悠語
忍躡飛鳧返故鄉

寫畫贈潘仁仲醫師

屋角東風多杏花小軒容膝度年華
金梭躍水池魚戲彩鳳棲林澗
竹斜疊疊清談霏玉屑蕭蕭白髮岸
烏紗于今不二韓康價市上懸壺未足誇

贈沈生賣墨

沈學翁隱居吳市燒墨以自給所謂不汲
汲於貴富不戚戚於貧賤者也烟細而膠
清黑若點漆近世不易得矣因賦贈焉

桐烟墨法後松烟妙賞坡翁已久傳麋角膠清瑩

玄玉龍文刀利淬寒泉山屨唯珍白鴛帖雲窗誰
錄古苔篇愛爾治生吳市隱收煤口室數登然



倪雲林先生詩集卷之五

五言絕句

題臨水蘭

蘭生幽谷中倒影還自照無人作妍媸春風發微笑

二月廿二日潘子素王叔明來慰藉臨別爲
寫水傍樹林圖

積雨開新霽汀洲生綠蕒臨流望遠岫歸思忽如
雲

題畫與溥泉

息景憩烟霞澄懷卧丘壑久遲蘇仙君莫驚松上
鶴

玄洲倡和十首繼趙魏公張外史作

奕奕三素雲團團如車蓋下有採芝仙遊神與天
會

右菌山

玉晨啓玄扉靈篇曖飛仙鍊景返洞官保真億萬
年

右羅姑洞

混淪青瑤流煥爛雲錦光飛輶駕神君宛在甸山
陽

右霞駕海

胎仙集丹臺真宰降玄居翕忽神飈散燒香禮太
虛

右鶴臺

密葉蔭方壇珍林寄深谷華源遠莫窮時有幽人
宿

右桐葉源

步虛朝東華高嘯追遠遊玄館授妙道逍遙宴神
州

右玄洲精舍

虛林想遺躅壇館廢仍存落葉藏丹竈清晨雲氣
溫

右紫軒

蒼雲乘白鶴傳說手栽松山室清眠夜千巖聞勁
風

右隱居松

玉標明霞秀靈炁混合成流光映金宮靈旆招萬
靈

右玉像龕

題自畫

東海有病夫自云繆且迂書壁寫絹楮豈其狂之
餘

青林藏曲密遠水間微茫飛鷺浴鳧處人家半夕
陽

夜作古木怪石因題

夜遊西園渚初月光炯炯徒倚巖石下愛此林木影

雨竹

雨過瀟湘渚風生渭水波暮窗揮醉墨翠霧溼烟蘿

竹石圖

雨過黃陵廟風生湘水波當時卸帆處苔石倚喬柯

寄友

風雨暮蕭蕭高人共寂寥何時截湘玉踏月夜吹簫

題畫

荆溪山水勝不到十年餘蔣氏遺基上寒藤學草書

茶圃

食茶雖云美茶苦薺自甘猶勝高陽徒羶葷自飫
酣

題秋亭曉色圖

園林夏雨歇
旭日照蒼苔
誰見竹亭裏
孤坐興悠哉

春江馱釣圖

春洲菰蔣綠
江水似空虛
望山以高咏
意釣不在魚

墨竹

明月臨書幌
疎篁舞翠鸞
馱吟苔石上
霜葉媚天寒

六言絕句

題良常草堂圖

結屋正臨流
水開門巧對
長松爲待神
芝三秀移居華蓋西峰

題畫

舟泊溪流曲
曲鳥啼烟樹
重重馱息白
鶴遺址好居五老雲峰

田舍

映水五株楊
柳當窗一樹
櫻桃灑埽石
間蘿月吟

哦琴裏松濤

山鳥下窺窗牖春風時過柴門避世何須鄭谷作
書已絕巨源

爲曾高士畫湖山舊隱

厭聽殘春風雨卷簾坐看青山波上鷗浮天遠林
間鶴帶雲還

南村草堂

雲溶溶兮覆渚波剌剌兮侵扉魚羣泳而自樂狎
鷗馴以不飛

雲溪佳處

誰覓雲溪佳處渚花汀竹迷藏去鶴原邊倚杖浮
鷗波上鳴榔

題竹圖

黃陵廟前雨過邯鄲谷口風生愛殺山人清致縱
橫淡寫秋聲

題畫

罨畫溪頭喚渡銅官山下尋僧水榭汀橋曲曲風
林雲磴層層

巳酉八月廿六日謾題

田父聊同爾汝狂夫從問如何昔日揮金豪俠今
朝苦行頭佗

題溪山雪霽圖贈張以中

水影山容黯淡雲林細篠蕭疎誰見重居寺裏雪
晴沙際吟餘

題畫

雨過黃陵廟下雲生玉女井邊野雉雒鳴斜日鷓
鴒啼破林烟

月下參差雙玉燈前蕭散孤鴻寄興只消毫楮寫
懷不用絲桐

竹上誰彈清淚如鉛春雨斑斑滿眼湘江波浪望
窮白鳥飛還

高樹長松共晚蒼筠野石同貞珍重王家公子翮
翻白鶴神清

高柳喬柯小閣水光山色衡門未老作閒居賦無
錢對北海樽

孝侯廟前雨過罨畫溪頭日曛舊迹如今夢裏春

風愁亂行雲

燕乳一首

燕乳雛成竟去鸞悲影隻難雙借問榮歸故甲何
如高卧北窗

畫竹

珍重黃華父子遺風得似洋州松雪于今寔寔房
山去後休休

我愛焦君味道筆端點綴清新規模虎兒早歲未
窺北苑入神

贈潘仁仲

瓶內花簪白萼庭中池養金魚馴虎只憑丹竈活
人惟畱素書

倪雲林先生詩集卷之五

終



倪雲林先生詩集卷之六

七言絕句

村居

疎疎梅雨橘花香
寂寂桐陰研席涼
怪底林間金彈子
枇杷都熟不知嘗

絕句四首次陶九成韻

我別故人無十日
衝烟艇子又重來
門前積雨生幽草
牆上春雲覆綠苔

斷送一生碁局裏
破除萬事酒盃中
清虛事業無

人解聽雨移時又聽風

沒逕春泥不出門山烟江霧晝長昏糟床聲雜茅
簷雨破却陰寒酒自溫

郊子論詩冀北空晤言千里意常同待晴紫陌堪
縈手行咏山光水影中

至正十四年二月廿五日雨郊君九成賦絕句
四首云杏花簾幙看春雨深巷無人騎馬來獨
有倪寬能憶我黃昏躡屐到蒼苔春色三分都
有幾二分已在雨聲中墻東兩箇桃花樹恨殺

朝來一番風十日春寒早閉門風風雨雨怕黃
昏小齋坐對黃金鴨寂寞沉香火自溫春寒時
節病頭風惆悵年華逝水同世事總如春夢裏
雨聲渾在杏花中倪瓚留宿高齋篝燈爲寫春
林遠岫圖并次韻四詩題画上時夜漏下三刻
矣佩韋齋中書

絕句三首

秋水清虛似汎槎此生汨沒似無涯蕭間堂上收
書坐八月芙蓉始著花

芙蓉花下坐鳴琴疑在湘江斑竹林翠節霓旌烟
雨溼秋來江水不知深

岳生孫子最清顛袁老彈琴和澗泉一簣松肪初
釀得賸將醉爾竹林前

一函贈馮文仲

知君近住西湖曲湖水淪漣似輞川窓下青松高
百尺時時落雪滿琴絃

寄安遇

隣家借得酒盈罍薄飯留君午不羨僧夏安居餘

半月重來相與說無生

題玄會菴壁間

風雨縈愁夢不醒紫薇花發渚南亭望中迢遞孤
烟起白鳥飛來菰蔣青

追和戎昱寄許鍊師

雲霧軒窓倚半空少霞銘處識新宮遙看一片秋
山色鶴影裴徊明月中

雙井院前小立

山色微茫好放船秋蕖野水夕陽邊西風更洒菰

蒲雨羨爾沙鷗自在眠

雨晴

江上白蘋風起波冷紋縈碧算烟和織成一幅鴛
鴦錦零落紅衣遠恨多

王季野示余米元章詩卷因次韻

喟然點也宜吾與不利虞今奈若何鴻鴈不來風
嫋嫋庭前樹子落杪攏

吳松江只蒲萄綠金井峰仍縹緲青說與弋人何
慕我高飛鴻鵠杳冥冥

大姚湖水生白烟長物都除絕世緣笙鶴不爲啼
鶴怨王生真是勝丁仙

題竹樹圖

海中鐵網珊瑚樹石上銀鈎翡翠梢烏夜亂啼江
月白檀欒飛影下窓坳

江邊樹影墨模糊江上青山日欲晡野息悵然無
晤語時來臨水照眉鬚

次韻曹都水

水晶茶經手自箋夜燒綠竹煮山泉莫留樵客看

棋局持斧歸來幾幾年

蕭閒館裏挑燈宿山厨重敷六尺床隱几蕭條聽
夜雨竹林烟幕煮茶香

惠麓小隱

錫麓洞前開竹扉孟公舊築草堂基已倩王維圖
別業更從裴廸賦新詩

次韻春雨

鸚啼花落罷琴尊山郭鳴鐘靄已昏莫嗔野鹿當
蘿逕只有春風到草門

青林微雨見東臯桑柘陰陰飛百勞可憐柳絮浮
春水無復縈空百尺高
黯黯春雲映戶輕綠蕪斜日忽開晴依微野逕泉
侵盡風落桐花遠思生
桐葉題詩憶君處望春惆悵夕陽沉憂來蝶夢飛
烟草黃髮蕭蕭曾不簪

水仙花

曉夢盈盈湘水春翠虬白鳳照江濱香魂莫逐冷
風散儼學黃初賦洛神

絕句

醉喚吳姬舞踏筵風欄花陣亦回旋愁生細雨寒
烟外詩在青蘋白鳥邊

拜石圖

米章愛硯復愛石探瑰探挾久爲癖石兄足拜自
寫圖乃知顛名不虛得

賦宜遠樓

宜遠樓前春可憐數峰依約亂流邊若爲倚劔崆
峒外回望齊州九點烟

別潘先輩

君來烟草正淒迷君去溪頭柳葉齊挂席中流竟
東上莫重回首向荆溪

懷曹都水

荆蠻野褐最清癡怕與高人話別離記得解攜雙
樹下風帆日短淚垂垂

贈墨生吳善

銅官山下白雲亭澗底長松長茯苓傳得潘生燒
墨法墨成持贈寫丹經

宿玄文館

玄館清虛五月秋
疎簾珍簟看瀛洲
窓前種得青桐樹
時有鳳凰棲上頭

奉荅范徵君雲林見懷

想見雨池春溜滿
唯應閒院綠苔生
落盡櫻桃杏花發
輕舟歸去看春耕

三月五日爲吳溥泉畫窠石平遠并詩

地僻林深無過客
松門元自不曾關
展將一幅溪藤滑
寫得溪陰數點山

爲原道題畫

二月東風溪水綠
幽林修竹影參差
杖藜日日溪西路
魚鳥相娛只自知

題張以中畫

密雪初晴僧舍深
地爐活火酒時斟
張家公子清狂甚
冒冷看山意不禁

今日披圖感慨深
與君對酒若爲斟
重居寺裏松杉合
劫火兵灰已不禁

吳采鸞像

誰見文簫逐采鸞碧山蘿月五更寒猶遺寫韻軒
中迹留得風流後世看

用陳子貞韻題畫

仙居乃在惠山東悟者方知色是空却坐西巖雙
樹下玉笙雲裏度清風

舟過梁溪

蕩槳清溪欲盡頭亂山出沒暮雲稠便當濯足聊
停棹何處飛來雙白鷗

宿義興先太初上人房

初公樓上雨蕭蕭楊柳垂烟隔岸搖何處舟人棹
歌發山長水遠望蘭橈

周將軍祠隔水近岳鄂五廟亦東隣百年故事誰
記憶風雨清明愁殺人

雪中折枇杷花寄吳寅夫

雪中自折枇杷花走寄城南處士家明日雪晴定
相過兩株松下煮春茶

雪不止重寄

清夜焚香生遠心空齋對雪獨鳴琴數日雪消寒

已過一壺花裏聽春禽

爲吳處士畫喬林礪石

山家日出無行踪
雪樹烟蘿遠且重
不見鹿眠磐石上
提壺自挂一長松

張外史素不善畫
醉墨戲寫張洞奇石頗一種
逸韻德明裝潢成卷走筆爲賦

書畫不論工與拙
顏公米帖豈圖傳
君看外史寫奇石
醉墨依稀似米顛

重送初上人參禮光公二首

西崦欣逢初上人
妙年藻思如春雲
育王塔前禮佛竟
應修白業益精勤

阿育王塔舍利存
山氣無雪春冬溫
蓮花臺近多羅樹
中有人談十二門

對雨遣懷

數日枇杷花落盡
可怜春事到櫻桃
聽風聽雨眠三日
排遣新愁付濁醪

寄友

二月江水青接天
楊柳隔江搖綠烟
一夜愁心似

春雪隨風舞影落君前

次韻題高房山画卷

屋邊昨夜春風起
蔣芽荇葉生春水
睡醒獨坐無人聲
歷歷青山水光裏

題趙榮祿揩痒馬圖次陳先生韻

韓幹真龍下筆肥
銀鞍羅帕落青絲
春風碧野和烟放
誰見林間揩痒時

竹枝詞

會稽楊廉夫邀余同賦西湖竹枝歌余嘗

莫春登瀕湖諸山而眺覽見其浦溆沿洄
雲氣出沒慨然有感於中欲托之音調以
聲其悲歎久未能成章也因觀斯作爲之
心動言宣爲詞凡八首皆道眼前不求工
也

錢王墓田松柏稀
岳王祠堂在湖西
西泠橋邊草春綠
飛來峰頭烏夜啼

湖邊兒女十五餘
烏紗約髮淺粧梳
却怪爹娘作蠻語
能唱新聲獨當爐

湖邊女兒紅粉粧不學羅敷春采桑學成飛燕春
風舞嫁與燕山遊冶郎

心許嫁郎郎不歸不及江潮不失期踏盡白蓮根
無藕打破蜘蛛網費絲

阿翁聞說國興亾記得錢王與岳王日暮狂風吹
柳折滿湖烟雨綠茫茫

春愁如雪不能消又見清明賣柳條傷心玉照堂
前月空照錢塘夜夜潮

嚶嚶歸鴈度春江明月清波鴈影雙化作斜行箏

上字長彈幽恨隔紗窓

辮髮女兒住湖邊能唱胡歌舞踏筵羅綺薰香回
紇語白氎蒙頭如白烟

題雲林小景圖

赤城霞暎神芝秀洞裏桃花不記春何事却將山
水脚鍾陵市上踏紅塵

後數年復用韻題

憶昔舟歸雪浦濱松林瑤草欲生春閒拈逸筆圖
清思今日披圖似隔塵

題畫

青山矗矗水舒舒相見郊原霽雨初絕似三高亭
上望人家依約樹扶疎

題來禽筠石圖送高霞還玄元館

烟雨蕭蕭墨未乾幽禽枝上語春寒玄元館裏多
筠石飯飽臨池自在看

寄德常別駕

長洲東去有僧居狂士來遊密雪初欲覓故人張
別駕清貧猶苦出無車

愛爾作官清海濱海濤嶺雪白如銀已占麩麥明
年喜漸有衣襦富昔民
廩食精豐養士多村童野老亦謳歌可無振厲新
科格選試能平定不頗

題畫

樓閣參差霞綺開峰巒重複水縈迴赤欄橋外垂
楊下步月吹笙向此來

題陳仲美畫次張貞居韻

杜老茅堂倚石根往來西讓與東屯一庭秋雨青

苔色自起鈎簾盡綠尊

斜日春風吹鬢絲披圖弄翰學兒嬉釣竿拂著珊瑚樹張祐題詩我所師

連雨

三月雨聲連子月五湖舟楫住南湖春愁黯黯如中酒捲地狂風撼不蘇

吳中

望中烟草古長洲不見當時麋鹿遊滿目越來溪上水流將春夢過杭州

爲蹇原道題竹木圖

疎篁古木都成老石澗莓苔亦有花排悶不須千日酒聊將小筆畫龍蛇

九日登華氏溪亭

茱萸黃菊稍斑斑野水蒼烟草莽間送客歸來逢九日華家亭上獨看山

寄曹都水

溪南山影碧叢叢水閣風林處處同周處廟前新漲澗數聲柔舫月明中

三月廿日題所寓屋壁

梓樹花開破屋東
隣牆花信幾番風
閉門睡起兼旬雨
春事依依是夢中

隣牆桂花盛開

扶疎桂樹隔隣牆
時有飛花到石床
起近南簷看月色
不須更炷水沉香

六月五日偶成

坐看青苔欲上衣
一池春水靄餘暉
荒村盡日無車馬
時有殘雲伴鶴歸

題寂照蔣君遺像

幻形夢境是耶非
縹緲風鬟雲霧衣
一片松間秋月色
夜深惟有鶴來歸

梅花夜月耿冰魂
江竹秋風洒淚痕
天外飛鸞惟見影
忍教埋玉在荒村

君姓蔣氏諱圓明字寂照暨陽人也年二十一
歸于我勤儉睦雍鄉里稱其孝敬歲癸巳奉姑
挈家避地江渚又一年不事膏沐游心恬淡時
年四十有七矣如是者十一年癸卯九月十五

日微示疾十八日清晨脩然而逝甲辰正月廿四日題

正月廿六日漫題

柳雲汀樹晚離離飲罷人歸野渡遲睡起香銷金鵲尾獨聽疎雨打窗時

二月十五日雨作

風軒紅杏散餘霞堤草青青桃欲花寒食清明看又近滿川烟雨亂鳴蛙

雅宜山詩

雅宜山舊名娜如山蓋虞道園所命名然未若娜如之名近古也施君宜之先隴在其處索余賦詩因爲竹枝歌二首遺之以復其舊焉

娜如山頭松柏青闔閭城外短長亭來山未久入城去駐馬回看雲錦屏

娜如山頭日欲西採香逕裏竹雞啼南朝千古繁華地麋鹿蒿萊望眼迷

送徐仲清還毘陵

昔年守義抗天兵
季子遺風尚足徵
牧守荒淫嗟末代
荒墟榛棘竟誰懲

有道楊公此駐車
遺言百世惑能祛
道鄉忠義埋黃壤
牛斗龍光尚擘如

六月十一日吉祥菴題

僧夏安居我息機
清風日爲掃柴扉
身形已似松梢鶴
還有悲歌續令威

二日又題

隨宜喧寂了殘生
飯飽悠悠曳履行
日落吳松半

江影莫將欣厭惱閒情

十三日雨窗排悶

俗患不侵忍辱鎧
道力可勝紛華兵
明月無心舍萬象
浮雲初不污圓澄
雨聲蕭瑟似秋塘
淡泊紅蕖滿意香
火宅任渠生熱惱
汪汪法海自清涼

十六日雨晴

道畊豈患粥材罄
德獵何憂肉食無
底事甘飡希厚味
曲肱飲水色敷腴

七月二十八日過丘氏林居秋風騷然至
莫大作終夜不息因成小詩

西風楊柳莫騷騷零落江雲起怒濤坐看荷花都
落盡倚窗孤咏楚天高

松陵一首

松陵原上望長洲綠玉平鋪江水流好取釀爲千
日酒大瓢酌月散煩憂

二月六日南園四首

雨裏櫻桃兩樹開北風吹盡臘前梅荒筠隅隩無

多柳細草汀洲併是苔

正月已闌烟雨寒泊舟東渚聽風湍山長水遠鳥
飛急不是離人也鼻酸

春月寒逾臘月寒盲風怪雨泊江干天工自不爲
人料一種春光有幾般

有子政如無子同異居邈若馬牛風人間何物爲
真實身世悠悠泡影中

秋容軒

乍見芙蓉開滿樹更憐楊柳綠含風秋容好處無

人會都在溟濛烟雨中

碧花翠蔓引牽牛叢竹黃葵意更幽不用田疇三日雨已輸穉稔十分秋

靈壁欹危四五峰枇杷細弱未成叢
檜籬西面雲千畝牛背時聞一笛風

村氓報本妙蓮華供佛燒香汲井花
獨有橋東白石叟依然傾酒食蝦蟆

松雪馬圖爲原道題

渥洼龍種思翩翩來自元貞大德年
今日鷗波遺

墨在展圖題咏一悽然

題墨萱

落盡幽花出一枝愛兒男草近清池水
仙唯數彛齊趙夏卉芳妍爾更奇

二月十九日夜風雨淒然南渚旅寓篝燈與

端叔共坐因念兵戈滿地深動故山之思

遂賦

春雨春風滿眼花夢中千里客還家
白鷗飛去江波綠誰採西園穀雨茶

題曹雲西画

吳松江水碧於藍怪石喬柯在渚南
鼓柁長吟採蘋去新晴風日更清酣

鵝次韻題

泛雪翻雲未足佳棲萍暖荇戲江沙
舉群此日籠歸去識得能書內史家

草青莎軟算烟和點綴春江愛白鵝
不似貪饕誇厭飫萬錢日食未嫌多

真迹黃庭世所珍當時聊復送鵝群
寧知雪後攻

城者使亂軍聲用進軍

雜賦絕句

恢公妙得華光法月影縱橫白尚玄
畱取禪門三昧法松滋楮穎過年年

空江水冷珮珊珊去國千年始一還
身似吹笙王子晉夜騎白鶴過緱山

一色清江四面同樓居如在画圖中
主人欲刻皆山記須得環滁老醉翁

曾傍江流築釣磯朱門華屋事都非
身如王謝堂

前燕歲歲猶過白板扉

痛飲酣歌未是狂有岐何處覓
羊芹羹朮煎茅君酒更醉人間一萬場

贈通上人

惠遠深心白蓮社湯休麗句碧雲篇
懺摩不懈香燈供般若仍通文字禪

雨後春池芹細細月明寒渚竹娟娟
東林門外聞鐘返只有陶公妙入玄

題画竹

本朝画竹高趙李慚愧後來無寸長
下筆能形蕭散趣要須胸次有篔簹

題李光祿墨竹

雲氣脩脩青鳳翎湘江鼓瑟倩湘靈
壁張此画驚奇絕醉倒茅君雙玉瓶

題宋仲溫竹枝

画竹清修數宋君春風春雨洗黃塵
小窗夜月留清影想見虚心不俗人

荅陳謝二參軍王長史

世故紛紜自糾纏南山修竹老風烟陳公懷抱政
如此清影蕭蕭月滿川

謝公好義今猶初不可親褻不能疎松陵父老猶
德爾援若功多自不居

經年不見王內史秋夜有懷如此何澄不爲清撓
不濁汪汪萬頃玉湖波

蕭蕭短髮不須冠何處繫舟雲水寬西塞山前夕
陽裏芙蓉青墮水精盤

百年苦樂孰深知何可旬月無我詩從渠推罵與

爭席不廢鷓鴣巢一枝

題畫與強仲端

日暮移舟何處泊強家亭子水西頭惠山只在緇
簾外雨後幽泉想亂流

題靈巖寺壁

我到靈巖古寺中雲烟樓閣鬱重重今朝醉倒山
前石留取綸巾挂偃松

船中

野水荒烟寂寞濱萋萋芳草也知春五湖雲浪浮

雪村詩集 二十一
天白好遣輕鷗狎隱淪

題墨竹

燈下蕭蕭玉一枝吳松欲雪算寒時憑君爲把青鸞尾大掃陰雲息怨咨

爲德常寫竹枝

張公宅裏挑燈話對影依依夢寐同坐到夜深喧境寂庭前疎竹起秋風

拜石圖爲王文靜題

米顛嗜古命宜輕玄寶厓珍禍患并盥沐閱書私

太尉可伶諂佞小人情

清文絕俗盛名譽不記坡翁獎拔初得筆無如蔡元度却言蘇軾劣於書

畫竹與張元實

髯翁中歲得麟兒漆點雙瞳玉作頤可惜空齋無楮穎爲拈秃筆掃風枝

寄張德常

聞道淮安之任去尊君今住叔兮家來城又鼓吳松柁好過苔磯弄釣車

吳仲圭山水

道人家住梅花村窗下松醪滿石尊醉後揮毫寫
山色嵐飛雲氣淡無痕

題畫贈崔子文

性癖居幽每起遲一來溪口意淒迷林亭曉色蒼
茫裏日送風帆過水西

睡起

睡起晴雲滿澗阿牛羊日夕下南坡浮生富貴真
無用政似紛紛蟻一柯

戲贈大雲

不問羊車與鹿車無三無二一乘耶何勞贊歎并
言說心悟方能轉法華

題畫竹

嫋嫋風枝墨未乾美人湘水逐笙鸞恍然一枕遊
仙夢清影縱橫山月寒

王叔明畫

筆精墨妙王右軍澄懷臥遊宗少文王侯筆力能
扛鼎五百年來無此君

因廬山甫便寄曹德

使者停車溪水西
借栽綠竹僦幽棲
玉川野客尋津去
悵望孤帆意轉迷

李伯時畫

飛仙遊騎龍眠
面貌得形模也
自奇句曲真人親
鑒定不須言下更題詩

畫竹

蟠虬舞鳳寒雲冷
挾以明蟾光炯炯
世人只解說洋州
小坡筆力能扛鼎

商學士畫次張外史韻

獨棹扁舟引興長
疎林遠岫見微茫
商侯畫筆張仙句
可比豐城寶劍光

贈金嬾翁製爪篴

聞君有漏與無漏
木杓爪篴都一般
欲覓嬾翁安樂法
無生話子說團欒

環綠軒

環綠軒中古逸民
瑟琴圖史硯爲隣
欲知此地多生意
試看窗前草色新

題畫贈原道

雪後園林梅已花西風吹起鴈行斜溪山寂寂無人迹好問林逋處士家

與錢伯行宿棲雲堂

小龍江上棲雲室望見石湖湖盡山來與錢翁住三日白雲妍暝滿中間

人我二首

人以秋毫軒輊我我心澹然如碧淵何期失脚墮塵網談笑區中飽世緣

醉中了了夢中醒好語狂言不用聽莫起黑風飄鬼國長教明月照中庭

爲仲章寫竹石

沈君好古嗜尤淡奇石幽篁心所欣爲寫雲林齋下景月明春露溼衣巾

次張師道韻

我愛張君真樂易樵談農語接懽欣每思靈石山前住六尺藤床一幅巾

題畫

南望銅官曉色新三株松下一茅亭何當濯足臨
前澗坐石間書相鶴經

坦腹江亭枕束書澄清江水自空虛修篁古木悠
悠思何處青山可卜居

怪石足當米老拜修竹定是王猷栽磊落瓊瑰雨
洗出團欒清影月移來

怪石雨餘苔蘚滋月明鸞尾影參差春風忽過庭
前樹會見清陰覆墨池

柯丹丘梅竹

竹裏梅花淡泊香映空流水斷人腸春風夜月無
踪迹化鶴誰教返故鄉

用潘子素韻題柯敬仲墨竹

古木幽篁春淡淡斜風細雨石蒼蒼何人識得黃
花老弄翰同歸粉墨囊

吳松江水似荆溪只欠山光落酒卮古木幽篁無
限思西風吹鬢影絲絲

題畫

琅玕節下起秋風寒葉蕭蕭烟雨中贈子仙壇翠

鸞帚杏林春掃落花紅

逸筆縱橫意到成燒香弄翰了餘生
窗前竹樹依苔石寒雨蕭條待晚晴

野店枯槎何處園千花羞澁不成妍
竹枝嫋嫋春石惡臥看歸鴻水拍天

落落長松生夏寒莓苔樗散共盤桓
王謝家庭多玉樹依然猶是晉衣冠

雨後池塘竹色新鈎簾翠霧溼衣巾
爲君寫出團欒影喜比他鄉見似人

斑斑石上蘚紋新陰落先生烏角巾
貌得兩枝初雨後可憐清興屬幽人

爲寫新稍十丈長空庭落月影蒼蒼
王君胸次冰霜凜剪燭談詩夜未央

舟過松陵甫里邊幽篁古木尚蒼然
何人得似王徵士靜看輕鷗渚際眠

逢著鄉人朱伯亮朱絃披拂共南薰
研池雨過添新漲特爲濡毫寫墨君

右臨青嶂左澄江未覺羲皇遠北窗
安得茅君酒

雲林詩集 卷之六 二十七
對酌幽人許致玉瓶雙

喬木叢篁倚苔石故家遺業總成灰二喬憶嫁周公瑾尚有枝孫氣不衰

寄陸鍊師

忽憶南湖陸鍊師若爲湖上住多時明朝擬望仙
帆至好買松鱸作膾絲

寄張處士

江邊楊柳綠絲烟影落清波萬里天處士時時驚
曉夢門前椎鼓發鹽船

題幽篁古木圖爲文靜徵君賦

環慶堂前翠竹多雨苔侵石樹交柯不遊罨畫溪
頭路奈此春宵月色何

題李遵道枯木竹石

我識黃巖李使君墨池詞氣靄如雲莫言但得丹
青譽曾有人書白練裙

寄人

無室無家老更顛草衣木食度年年開春若問桃
花宿先到俞君舊宅前

題畫竹贈西溪處士

雪葉霜枝耐歲寒，櫛風沐雨不成歡。
百年強健且行樂，畱取清溪作釣竿。

題曹德昭

谷口桐林落絳霞，仙帆初泊野人家。
蕭閒館裏青苔合，看到堦前芍藥花。

題畫贈單君

單君子達荆溪住，不到荆溪已十秋。
古木幽篁苔石路，每經行處思悠悠。

贈沈掾

蕭蕭白髮沈休文，問舍求田江水濱。
此夕一杯成酩酊，淋漓醉墨氣如雲。

寄王簿

客愁醉似未招魂，老去情懷孰與論。
詩寄句容王主簿，憶從白壁達天門。

太白嘗從金陵泝，流過白壁山。
翫月達天門，賦詩寄句容王主簿。

順逆

順逆推移莫愛嗔白雲終不染緇塵世情如火心如小屋裏須教有主人

次韻題黃子久画

白鷗飛處碧山明思入雲松第幾層能画大癡黃老子與人無愛亦無憎

烟鶴軒二首

林宗道新闢小軒南望平蕪烟樹眇然有千里之意因名之曰烟鶴蓋取韋刺史遠水烟鶴唳詩語爲賦二小詩著軒中

烟鶴軒前枕石眠聲清唳落江烟攬衣起望行雲急遠思憑虛忽欲仙

楓落吳江雲雨空曳然鳴鶴紫烟中坐看雪影橫江去明滅寒流夕照紅

贈張德常

老疾吟哦張判官僦居江海覺心寬好乘黃鵠風埃表萬里雲霄一羽翰
齷齪疲鴛飲齧餘鞭笞喘汗駕鹽車麒麟已老終超逸不受金羈去玉除

客舍咏牽牛花

小盤承露淨鉛華玉雪依稀染碧霞
弱質幽姿娛我老傍人離落蔓秋花

調玄度

江渚荷花落日紅画簷欄檻納涼風
何人得似張公子詩在烟波眺望中

清明後題

野棠花落又清明楊柳青青人耦耕
春物闌珊成底事半江疎雨暮潮平

再用前韻呈錢思復

目斷青山白鳥明姑蘇城下有人耕
越來溪水流遺恨嗚咽聲中似不平

再用韻

春泥滑滑暮霞明苔滿石田那可耕
眼底紛拏詩可遣胸中峯嶽酒能平

鶴盈軒西芍藥欲紅矣戲成絕句奉呈雪林
隱君求折一枝

堦前紅藥無人摘彩翠籠烟溪水南
爲折一枝和

雲林詩集 三十一
瑞露小窗卮酒咏春酣

聞鴨鳩

林影曨曨鴨鳩聲歐陽詩句最關情
四簷宮燭朝儀早欹枕船窗憶太平

四月七日雨

水宿風行冬復春汀花汀草思紛紛
泊舟無賴終宵雨夢入蒼梧萬里雲

追和蘇文忠墨蹟卷中詩韻

脉脉遠山螺翠橫盈盈秋水眼波明
西北風帆江

路永片雲不度若爲情

雨挾江潮來浦口霜凋木葉見山尖
寒波曾照飛鴻影髭雪朝朝與恨添

風雨翻江夢裏驚忽思風馭絳霄翎
世間那得麻姑爪痒處爬搔憶蔡經

湖邊窗戶倚青紅此日應非舊日同
太守與賓行樂地斲碑荒蘚臥秋風

奎章閣下掌經綸清淺蓬萊又幾春
三十六宮秋寂寂金盤冷露泣仙人

蔡公閩嶠雙龍壁蘇子儋州萬里船何似歸田虞
閣老醉吟清浦月娟娟
嗜酒狂吟禿髮翁華陽壇館百花風晚年傳得登
真訣歸臥南山澗谷中
窗裏晚山眉翠重汀前秋水眼波明白鷗飛處循
歸路眇眇新愁故國情

別陸氏女

去住情悰兩可哀天公與我已安排前途恐有寬
閒地未信狂夫事事乖

題畫

海鷗何處更相疑野老如今久息機旅泊一蓬南
渚上雲濤烟樹影依微

六月九日過以中野亭賦

豆苗引蔓已過簷荇葉團團菱葉尖野亭中間坐
至晚窗前竹影月纖纖

雨後

雨後空林生白烟山中處處有流泉因尋陸羽幽
棲處獨聽鐘聲息惘然

題畫贈王允同

湛湛綠波春雨裏娟娟翠竹曉風前此中著得玄
真子一棹夷猶獨醉眠

桐露軒前月滿窗竹聲樹影落春江青苔石逕無
人跡坐待歸來白鶴雙

江上

石侵春雨林間蘚竹帶沙汀日暮烟江上清陰隨
月落船頭白鳥傍人眠

二王遊騎圖

每憶開元全盛時二王遊騎日追隨鶴鴒原上雙
兄弟挾彈荒郊想鳳池

謝筆

陶泓思渴待陳玄對楮先生意未宣何似中書二
君至明窗脫帽一欣然

聞竹枝歌因效其聲

鈿山湖影接松江橘葉青青柿葉黃要寫新詩寄
音信西風斷鴈不成行

江流不住楚山青船到潯陽幾日程不忍寄將雙

淚去門前潮落又潮生

高尚書畫竹

石室風流繼老蘇黃華父子亦敷腴吳興筆法鍾
山齋只有高髯不讓渠

看花仕女圖

一畫圖常識春風面雲霧衣裳楚楚裁爲問人間春
幾許石欄西畔牡丹開

剖瓜士女圖

月彎削破翠團團六月人間風露寒誰覓東陵故

侯去但知華屋薦金盤

王都事家聽周子奇吹笙

隔水吹笙引鳳鳴十三聲外柳風清風流自有王
子晉畱取清樽吸月明

趙魏公蘭

天上宣和落墨花彙齋松雪擅名家遙看苕雪山
如玉雪後春風自茁芽

管夫人畫竹

夫人香骨爲黃土紙上蕭蕭墨色新悽斷鷗波亭

子上鏡臺鸞影暗凝塵

樹石小景

嘉樹幽篁澗石隈當年曾此好懷開如今寂寞空
山裏誰復緘情折野梅

墨梅

幽蘭芳蕙相伯仲江梅山礬難弟兄室裏上人初
定起靜看明月寫敷榮

題雜画

白雲孤鶴莫知還船泊錢塘看越山珍重今朝重

展卷吟詩作賦北窗間

新柳春柯未著鴉短籬茅屋野僧家放舟不怕歸
來晚白水田畦已有蛙

小坡曾寫雞棲石猶在荆溪山寺中幾欲規摹渾
忘却可憐零落墜秋風

松瀑飛流到枕邊道人清坐不須弦王君筆力能
扛鼎用意何曾讓鄭虔

庭樹霜黃尚有陰午窗危坐自鳴琴問誰得似沈
夫子北牖羲皇有此心

題畫

荷葉田田柳弄陰
菰蒲短短逕苔深
鳥飛魚躍皆天趣
靜裏游觀一賞心
一代舒王不數人
曾哦雪竹與松筠
雲林野思生幽夢
睡起濡毫一寫真

寄人

楊柳春風未放黃
晴天孤鴈不成行
忽思小謝生幽夢
芳草池塘路亦荒

懷呂君

三年不見呂高士
清夜時時夢見之
安得長風生羽翥
與君濯髮向咸池

寄人

秋光明可截并刀
一隼橫空厲羽毛
猶憶南汀縈手處
斲雲殘日下亭臯

烟雨

烟雨空濛遠樹齊
人家樹底自成蹊
只應三月吳松尾
渚際維舟聽竹雞

仲穆馬圖

花門舊進青驄馬天水王孫貌得真溪上猶遺光
祿宅海寧何以久風塵

墨水仙

宋諸王孫釋大雲清詩多爲雪精神誰言一點金
壺墨解寄湘江萬里春

絕句

要識清虛甘寂寞何如快活地中仙千巖萬壑松
窗裏爛醉吟哦石上眠
睡起晴雲滿澗阿牛羊向夕下平坡浮雲富貴真

何用政似紛紛蟻 柯

十月

十月江南未隕霜青楓欲赤碧梧黃停橈坐對西
山晚新鴈題書已著行

贈玄容

枯柳疎條棲鳥稀婦人稚子候簷扉政如十月江
南岸落日西山翠影微

松澗圖

青松澗底結淒陰老大還無用世心張洞西邊煮

雲林詩集 三十八
藥竈山靈虛閉白雲深

寄友生

周君讀書離墨山山中臥看白雲閒翻然遂逐雲
歸去松下草堂深閉關

題陳惟允畫

韓公曾聽穎師琴山水蕭條太古音不作王門操
瑟立溪山高隱竟何心

春雨

春雨蕭條獨掩扉庭柯逕篠綠依依莫思南渚停

舟處烟柳垂陰滿釣磯

寄王叔明

野飯魚羹何處無不將身作係官奴陶朱范蠡逃
名姓那似烟波一釣徒

寄韓伯清

何處田廬業可租金堂玉室夢全無爲謀蔬藥樵
漁地好在何山碧落湖

題趙承旨墨竹用張外史韻

籊籊生綃寫竹竿愁看春雨滿空壇風流誰識當

時意萬里鷗波烟景寒

晚照軒偶題

南湖春水碧於天
夢作沙鷗狎釣船
綠樹拂簷風雨急
覺來依舊北窗眠

簷前幽鳥自相呼
池上紅蕖映綠蒲
五月夜涼如八月
一窗風雨夢南湖

醉後贈張德機

允同日夕能求画
斬酒藏余更惜香
獨有館中張博士
誇余弄翰不尋常

博士今宵不用誇
竹枝嫋嫋趁風斜
莫煩更把官奴燭
且與狂吟野老家

西家飲酒不盡歡
東家燈下坐團樂
我儂自有一壺酒
不怕先生酒量寬

空折花枝插滿盆
清吟清坐想盤飧
主人欲勸松肪釀
謾道糟床尚苦渾

誰醒宜城竹葉春
竹枝空画損精神
詩成不壓乾喉吻
誰道傷多酒入唇

贈僧

雲林詩集 四十
清流堂上無塵事奇石修篁映梵書長日粥魚齋
鼓罷竹窗虛寂坐如如

題張元播扇

聽雨樓中也自涼閒停筆視靜焚香君來爲煮稽
山茗自洗冰甌仔細嘗

題畫

湖水清空好放船青山依約白鷗邊忽思周處祠
前路古木荒烟一惘然

畫竹贈申彥學

吳松江水似清湘烟雨孤篷道路長寫出無聲斷
腸句鷓鴣啼處竹蒼蒼
阿儂渡江畏風波聽渠聲唱竹枝歌淇園青青淇
水綠不似瀟湘烟雨多

青山

夕陽渡口見青山誰識其中有此閒我本爲樵北
山北賣薪持斧到人間

原上人

上人住近西山麓左右泉聲喬木深拄杖逍遙扣

門去臨池濡墨寫春陰

題木石贈丘志

古木幽篁丘氏宅江波落日妙蓮庄泊舟風雨留
三月臥看鳧鷖十里塘

贈伯清

市上休疑張伯清藥無二價制顏齡何當掃雪居
幽谷與我松根採茯苓

題画

長江秋色渺無邊鴻鴈來時水拍天七十二灣明

月夜荻花楓葉覆漁船

偶成

紫燕低飛不動塵黃鸝嬌小未勝春東風綠遍門
前草暮雨寒烟愁殺人

荆溪秋色圖爲卜震亨題

罨画溪頭秋水明上人逸筆息縱橫雲山多少玄
暉句不道毫端画得成

爲潘仁仲寫梧竹草亭

翠竹蕭蕭倚碧梧一亭聊以賦閒居浮杯樂飲思

潘岳藻思春江濯錦如

羔羊一首

羔羊跪乳猶有別林鳥返哺能無違彼哉微物具
至理感爾太息淚沾衣

巳酉元日題徐氏南園壁

九日塵污一日清南園池水濯冠纓
早早燕雀難喻大自展培風九萬程

六日題

寄居丘氏小偷閒盡室逃亾夜向闌
縣吏捉人空

里巷挈家如出鬼門關

韋羌草堂圖

韋羌山中草堂靜白日讀書還打眠
買船欲歸不可去飛鴻渺渺碧雲邊

題彥貞屋壁

王子五月廿七日呂君隱所余又來
輕舟短棹向何處只傍清波不染埃

絕句

枕幃柳席使安舒借我飛裙意有餘
更借裙拖三

百日高秋還子有佳書

題畫次韻

義獻才情似水清暑窗葵扇與桃笙中州父子黃
華老信是前賢畏後生

中州人物獨黃華父子詩畫逸出羶裘之表爲
可尚也觀澹游此卷筆意蕭然有蔡天啟風流
蓋高尚書之所祖述而能冰寒於水者於卷後
有歐陽承旨所賦詩不揆因次第其韻丙午六
月晦日

偶寓姚城江上村水如蛟舞石如龜清風明月許
元度爲余傾倒綠波軒

後二十三年爲戊申歲元度張君得此特以示
僕披卷如夢寐間也因援筆次外史詩韻詩已
爲之泫然外史已仙去張榮祿鑑禪師不見數
十年存亾不能知尤令人悽斷也九月十一日
題

正月八日宿禪悅僧舍題趙榮祿馬圖

小僧院裏無塵事夜雨燈前興不孤寥寥說竟無

生話更覽王孫駿馬圖

畫贈王生

白沙岸下幽人宅翠竹林中賣酒家好事江干王處士客來爲黍酒仍賒

題畫

笠澤依稀雪意寒澄懷軒裏酒杯乾篝燈染筆三更後遠岫疎林亦耐看

題畫贈盧山甫

盧君絕似米顛子品畫評詩也自佳我畫亦憎肩

汗汚手爲裝緝挂高齋

白石先生古貌古心輕財而重義實生於吾後之師令人寤寐不能忘但幽居默如潛逃則殊令人憤憤耳昨算辱醉中詞翰讀之洒然也因次韻希一笑

深感分嘗酒數罍醋雞聞勝駝蹄羨轟轟烈烈男兒事莫使磨拖過此生
空宇寥寥秋燕巢笑談誰與共遊遨南隣雖有幽貞士默默深潛如避逃

柯丹丘梅竹

山川搖落夜漫漫老木幽篁巧耐寒
畫裏陳侯有佳句皎如明月映琅玕

絕句

七月三日快哉風野亭不厭酒杯空
况有尊前沈腰瘦何妨醉倒田家翁

密雪時晴照日初東窗竹影寫扶疎
也知江渚張高士衲被敦敦偃仰餘

七月九日一杯酒吾友王君將遠遊
况有呂家張

處士逍遙江渚狎輕鷗

題画

絕憶丹陽蔡天啟秋深淡墨意縱橫
陳君筆力能扛鼎可見前賢畏後生

松雪馬圖

舊寫天閑八尺龍鷗波濡墨水晶宮
紛紛世俗爭模倣兒子門生亦秃翁

贈潘仁仲

良相良醫意活人得仁要亦在求仁
能調脾肺心

肝腎不出酸鹹甘苦辛

題画竹

三家市上沽村酒
亥夜明燈初自酉
官奴把燭我所無
幽篁亂寫非風柳

倪雲林先生詩集卷之六

終

倪雲林先生詩集附錄

雜著

鶴溪先生画像贊

家庭教子佩學詩學禮之言巖穴置身有憂國憂民之色是知克仁而壽能文而德也

趙士瞻小像贊

處乎寂寞之濱乃有悅豫之色將儕於列仙癯於山澤我知之矣豈登山臨水以忘歸貧賤不足爲其憂富貴不足爲其懌者非耶

陳天倪處士画像贊

其介特孤峭非松瀑之甥而能然歟其好學能文
蓋嘗從遊於草廬棲遲衡門之下鼓瑟動操之間
令衆山響與之俱童冠風雩以閒咏逮乎暮春之
初

王季野画像贊

粹然春溫者猶有若翁素履之德容也凜乎秋清
者得乎湘纍楚騷之遺風也與時上下人莫知其
所存乎中也匪以吾義吾將曷從也喬木鶯鳴雲

山鶴飛輕薄紛紛吾何是非登山臨水聊消搖以
忘歸

良常張先生画像贊

誦詩讀書佩先師之格言登山臨水得曠士之樂
全非仕非隱其幾其天雲不雨而常潤玉雖工而
匪鐫其據於儒依於老逃於禪者歟

錢塘王生思善画德常時年四十二矣東海倪
生贊之曰云云德常高情虛夷意度閒雅顧非
顧長康之丘壑置身曹將軍之凌烟潤色又那

緣得其氣韻耶王生蓋亦見其善者幾耳今日因過德常草堂出此圖求贊且欲作樹石其旁乃先綴數語像上樹石俟他日補爲之

謝仲野詩序

詩亾而爲騷至漢爲五言吟咏得性情之正者其惟淵明乎韋柳冲淡蕭散皆得陶之旨趣下此則王摩詰矣何則富麗窮苦之詞易工幽深閒遠之語難造至若李杜韓蘇固已烜赫焜煌出入今古踰前而絕後按其情性有正始之遺風則間然矣

延陵謝君仲野居亂世而有怡愉之色隱居教授以樂其志家無瓶粟歌詩不爲愁苦無聊之言染翰吐詞必以陶韋爲准則已西春攜所賦詩百首示余於空谷無足音之地余爲諷咏永日飯瓦釜之粥糜曝茅簷之初日怡然不知有甲兵之塵形骸之累也余疑仲野爲有道者非歟其得於義熙者多矣

陳惟寅儗屋疏

陳惟寅甫與弟惟允閒居養親棲隱吳市不耻貧

賤不樂仕進熙怡恬淡與物無迕雖過朱門如遊蓬戶也世本蜀人其大父居五老峰下父天倪先生因遊吳愛錫麓洞有好流水家於惠山之陽久之有少日同舍生趙從事招往館于其家遂復留吳市焉兵後棲棲無定居江右同邑人饒介之爲之僦屋使得以安菽水之奉而僦屋之資則非一人所辦饒君素清苦又不欲以外事累人也僕遂爲之一言世豈無急人之急憂人之憂解衣推食指廩借宅豪傑侷儻如古之人者哉老杜所謂安

得大廈千萬間大庇天下寒士俱歡顏者請爲諸君誦之至正壬寅十二月九日倪瓚言

題良常草堂疏 捐捨趙榮祿正書一卷

昔王錄事寄少陵之資近代趙文敏千岳氏之助皆有實效不事虛文今德常欲構草堂所求者柯張杜三君或宿諾而寒盟或解嘲以調笑遄求其實則罔所知數年之間三君已矣草堂適成載覽標題重增嗟悼捐予珍祕永鎮所居

題畫

至正辛丑十二月廿四日德常明公自吳城將還嘉定道出甫里楸柁相就語俯仰十霜恍若隔世爲留信宿夜闌更秉燭相對如夢寐者甚似爲僕發也明日微雪作寒戶無來迹獨與明公逍遙渚際隔江遙望天平靈巖諸山在荒烟遠靄中濃纖出沒依約如画渚上疎林枯柳似我容髮蕭蕭可憐生不能滿百其所以異於草木者猶情好耳年逾五十日覺死生忙能不爲之撫舊事而縱遠情乎明公復命画江濱寂寞之意并書相與乖離

感慨之情悰 德常今爲嘉定同知於民有惠政卽昔日之良常山人也朱陽館主蕭閒仙卿倪瓚言

懶遊窩記

昔司馬子長遊涉萬里壯麗奇偉之觀前賢往聖之迹有以泄其懷古感今憤懣鬱律之氣史記之書旣成藏之名山以俟後聖君子也宗少文壯歲好遊晚以所歷名山畫屋壁曰老疾俱至名山恐難徧覩唯澄懷觀道臥以遊之子長雄奇之文

少文神妙之画善而猶有待又烏覩神馬車輪與造物遊鴻濛之外者哉若夫登化人之居遊華胥之國是皆神遇豈復有待乎金君安素高臥林居慕楊許得尸解上道乃怡神葆和內視密盼煥標霞之孤映朗性月之獸照因名其齋居懶遊焉噫尸居而龍見不出戶知天下善行無轍迹蓋神遊無方非拘拘局於區域逐逐困於車塵馬足之間安素仙仙乎道矣王方平嘗與麻姑言比不來人間五百年蓬萊作清淺流海中行復揚塵耳孰耶

鄆之黃梁婦華表之白鶴人間紛紛如絮時一飛神遊盼吾固知安素不與悠悠世人同一悲慨也

書画竹

以中每愛余画竹余之竹聊以寫胸中逸氣耳豈復較其似與非葉之繁與疎枝之斜與直哉或塗抹久之他人視以爲麻爲蘆僕亦不能強辨爲竹真沒奈覽者何但不知以中視爲何物耳

跋環慶王氏所藏趙榮祿六帖

右趙榮祿與覺軒先生手簡其六紙有以知交誼

之深家世之舊也先生學行純正爲宋琅琊王仲寶之後仕至蘭谿州判官今獲觀於其孫光大之羹齋老成典刑不可復見矣尚賴翰墨文章有以想其風流哉庚子二月十日倪瓚題

忠靖王廟迎享送神詩有序

至順元年春吳楚薦饑天災流行連數郡道殣相望沴氣薰襲爲瘡爲札錫之民咸被漸染大小惴惴無所請命邦之遺老相與言吾邦西山之陽有嶽祠祠有明神焉曰忠靖王胙爵東平生能奮忠

死有遺烈赫聲耀靈福我錫民自有年矣在昔季宋大疫用禱於神變沴爲祥德載歌咏民病亟矣宜從故事乃合群謀籲衆感卒從祠下饒鼓鏜鉦旗纛晡導駢駕以臨城南香雲漲空耄稚奔走衆心推誠祈祀惟謹惟神顧歆來格來享若沐神水若濯冷風毆攘妖氛民疾用瘳丕殫神化無遠弗暨隣邑之民祈者踵接環甸吳四封所活幾萬人焉是神有大造於吾民也禮神能禦大菑捍大患者則祀之矧威烈若此是宜尸祝而社稷之舊

祠焜於火未幾民更興復其制瓚嘗以母病致禱
立愈因作迎享送神辭二章刻諸山阿俾錫以祀
之辭曰

靈皇皇兮岱宗神之來兮駕蜚龍赫蒼顏兮朱髮
如火紛羽衛兮岳祇業礮青霓旒兮白容裳降大
荒兮祓不祥毆野仲兮逐游光惠我民兮神樂康
羅帳兮雲幄湛寒泉兮瑟蘭夕舞偃蹇兮歛參差
薦芳馨兮神亨之靈娛娛兮奈何樹紫檀兮山之
阿匪斯 兮福斯土沐神休兮千萬古

神之去兮驟雲螭風刻兮吹靈旗悅臨風兮延佇
悵神游兮難駐神游兮翩翩撫一氣兮周八埏朝
騰駕兮西神夕弭節兮東魯噫神往兮莫我顧民
有顛兮載福斯祐折瓊花兮遲神歸歲復歲兮神
寧我違石戔戔兮流水壽我民兮報祀無已

樂府

清平樂在荆溪作

汀烟溪樹總是傷心處望斷溪流東北注夢逐孤
雲歸去山花野鳥初春漁郎樵叟南津誰識摧頽

老子醉人推罵從嗔

凭欄人贈吳良國

客有吳郎吹洞簫明月沉江春霧曉湘靈不可招
水雲中環珮搖

人月圓

傷心莫問前朝事重上越王臺鷓鴣啼處東風草
綠殘照花開悵然孤嘯青山故國喬木蒼苔當時
明月依依素影何處飛來

又

驚回一枕當年夢漁唱起南津画屏雲嶂池塘春
草無限消魂舊家應在梧桐覆井楊柳藏門間身
空老孤蓬聽雨燈火江村

太常引傷逝

門前楊柳密藏鴉春事到桐花敲火試新茶想月
珮雲衣故家苔生兩館塵凝錦瑟寂寞聽鳴蛙芳
草際天涯蝶栩春暉夢華

殿前歡

搵啼紅杏花消息雨聲中十年一覺揚州夢春水

如空鴈波寒寫去踪離愁重南浦行雲送水弦玉
柱彈怨東風

水仙子

東風花外小紅樓南浦山橫眉黛愁春寒不管花
枝瘦無情水自流簷間燕語嬌柔驚回幽夢難尋
舊遊落日簾鉤
吹簫聲斷更登樓獨自凭欄獨自愁斜陽綠慘紅
消瘦長江日際流百般嬌千種溫柔金縷曲新聲
低按碧油車名園共遊絳綃裙羅襪如鉤

折桂令擬張鳴善

草茫茫秦漢陵闕世代興亾却更似月影圓缺山
人家堆按圖書當窗松桂滿地薇蕨侯門深何須
刺謁白雲自可怡悅到如今世事難說天地間不
見一箇英雄不見一箇豪傑

又辛亥過陸庄

片帆輕水遠山長鴻鴈將來菊蕊初黃碧海鯨鯢
蘭茗翡翠風露鴛鴦問音信何人的當想情懷舊
日風光楊柳池塘隨處凋零無限思量

水仙子因觀花間集作

香腮玉膩髮蟬輕
翡翠釵梁碧燕橫
新粧懶步紅芳
逕小重山空
画屏繡簾風暖
春醒烟草粘飛絮
蛛絲罥落英無限傷情

江城子感舊

窗前翠影溼芭蕉
雨蕭蕭
思無聊
夢入故園山水
碧迢迢
依舊當年行樂地
香逕杳
綠苔饒
沉香火底坐吹簫
憶妖嬈
想風標
同步芙蓉花
畔赤欄橋
漁唱一聲驚
夢覺無覓處
不堪招

柳梢青贈妓小瑤英

樓上玉笙吹徹
白露冷飛瑤珮
玦黛淺含顰
香殘棲夢子
規啼月揚州
往事荒涼
有多少愁
繁思結
燕語空梁
鷗盟寒渚
画欄飄雪

南鄉子東林橋雨篷夢歸

篷上雨潺潺
篷底幽人夢故山
礪戶林扉元不閉
蕭閒
只有飛雲可往還
波冷玉珊珊
一徑松風引
珮環
咏得池塘春草句
更闌行盡千峰半霎間

太常引壽彝齋

雲林詩集

附錄

及古詞

柳陰濯足水侵磯香度野薔薇芳草綠淒淒問何
事王孫未歸一壺濁酒一聲清唱簾幙燕雙飛風
暖試輕衣介眉壽遙瞻翠微

鵲橋仙

富豪休恃英雄休使一旦繁華如洗鵲巢何事借
鳩居數載主三易矣東家烟起西家烟起無復碧
暈朱啟我來重宿半間雲舊製唯餘此耳

鷓鴣天

笠澤沿回十五年親知情義日堪憐偷兒三顧吾

何有俗士群譏自省愆聊復爾豈其然田翁輕慢
牧童顛乃知造物深相與急使江湖棹去船

如夢令

削跡松陵華寓藏密白雲深處造物已安排萬事
何須先慮歸去歸去海鶴山猿同住

踏莎行

春渚芹蒲秋郊梨棗東風沃野收紅稻簷前炙背
媚晴陽天涯轉瞬淒芳草魯望漁村陶朱烟島高
風峻節如今掃黃雞啄黍濁醪香開門迎笑東隣

老

小桃紅

陸庄風景又蕭條堪嘆還堪笑世事茫茫更誰料
訪漁樵後庭玉樹當時調可憐商女不知亾國吹
向紫鸞簫

一江秋水淡寒烟水影明如練眼底離愁數行鴈
寫晴天白蘋紅蓼參差見吳歌蕩槳一聲哀怨驚
起鷺鷥眠

五湖烟水未歸身天地雙蓬鬢白酒新菊會隣近

主酬賓百年世事興亾運青山數家漁舟一葉聊
且避風塵

憶秦娥

昨日嘗賦憶秦娥一首以介石齋前木犀
盛開俾具一卮酒無使花神笑人寂寞蓋
以風雨傷懷耳茲重改呈又作一首共寫
呈二君却不可默然也

扶疎玉蟾宮樹影闌干曲一襟香露幾枝金粟姮
娥鏡掩秋雲綠無端風雨聲相續不須澄霽爲酤

雲林詩集
十三
滿城風雨近重陽
溼秋光
暗橫塘
蕭瑟汀蒲岸
柳送淒涼
親舊登高前
日夢松菊逕也應荒
堪將何物比愁長
綠泱泱
遶秋江
流到天涯盤屈九回腸
烟外青蘆飛白鳥
踰路阻思微茫

參差玉笙聲
算起瑤臺曲
輕風香浸夜涼肌
粟黃雲巧綴飛霞
綠清吟未斷
秋霖續恐孤花意
倒尊中醪

江城子

蝶戀花

蝶戀花

夜永愁人偏起早
容髮蕭蕭鏡裏看
枯槁雨葉鋪庭
風爲掃
閒門寂寞生秋草
行路難行悲遠道
說著客行真箇令人惱
久客還家貧亦好
無家謾自傷懷抱

壬子九月廿五日訪照菴高士畱飲因書近詞
求是正之益

題雲林詩集後

鮑謝才情世不多
手封詩卷寄江波
宅邊東海鯨

魚窟好著輕舟一釣簑

虞集伯生

題雲林先生小像

才之英德之精坐松石儼像形噫安得斯人兮復生

天師張

故元處士倪雲林先生旅葬誌銘

雲林姓倪諱瓚字元鎮所居雲林故號雲林先生其家常州無錫富家至正初兵未動鬻其家田產不事富家事事作詩人竊笑其爲慙兵動諸富家剝剝費田產人始賞其有見性好潔盥頸易水數十次冠服著時數十次拂振齋閣前後樹石嘗洗拭見俗士避去如恐免從王文友讀書文友死殮葬不計所費一如其所親交張伯雨後伯雨至其家會鬻田產得錢千百緡念伯雨老不載至推與

雲林詩集

附錄

及古閣

不畱一緡盛年清名在館閣晚當至正末飄流中
作詩益自喜其詩信口率與唐人語合年七十四
旅葬江陰習禮子二孟民孟羽孟民早卒女三其
詩散逸人咸惜之

銘曰捐所優心何求吁嗟乎其爲安所繇身何
投吁嗟乎其時蠲所修名何畱吁嗟乎其詩

長樂王賓撰

故元處士雲林先生墓誌銘

雲林倪瓚字元鎮元處士也處士之志業未及展
于時而有可以傳于世誦其詩知其爲處士而已
蓋自詩法旣變而以清新尚莫克究古雅處士之
詩不求工而自理致冲淡蕭散尤負氣節見於國
朝風雅而與虞范諸先輩埒今板行於世故弗論
若處士之世系固不可無述也按倪之先漢御史
寬之裔也十世祖碩仕西夏宋景祐使中朝畱不
遣徙居淮甸占籍都梁爲時著姓建炎初五世祖

益挈其家渡江而南至常州無錫僑梅里之祇陀
愛其地勝俗淳遂定居焉厥後族屬寢盛貲雄於
鄉高祖伋曾大父淞皆厚德長者隱而弗耀大父
椿父炳勤於治生不墜益隆母蔣氏而處士嚴出
也生而俊爽稍長強學好修性雅潔敦行孝弟而
克恭於兄相其樹立率子弟以田廬生產悉有程
度有餘財未嘗資以爲俚俗紛華事其師輩昌王
仁輔老而無嗣奉養以終其身歿爲制服執喪而
葬焉若宦遊其鄉客死不能歸櫬者則割山地以

安厝之見義則爲不以兒婦人語解尊官顯人樂
與之交於宗族故舊煦煦有恩尤喜周人之惡神
精朗朗如秋月之瑩意氣靄靄如春陽之和刮摩
豪習未嘗爲紈綺子弟態談辯絕人疊疊不倦好
客之名聞於四方名傳碩師方外大老咸知愛重
所居有閣名清閼幽迴絕塵中有書數千卷悉手
所較定經史諸子釋老岐黃紀勝之書盡日成誦
古鼎彝名琴陳列左右松桂蘭竹香菊之屬敷紆
繚繞而其外則喬木修篁蔚然深秀故自號雲林

每雨止風收杖屨自隨逍遙容與詠歌以娛望之者識其爲世外人客至輒笑語留連竟夕乃已平生無他好翫惟嗜蓄古法書名畫持以售者歸其直累百金無所靳雅趣吟興每發揮於縑素間蒼勁妍潤尤得清致奉幣贊求之者無虛日晚益務恬退棄散無所積屏慮釋累黃冠野服浮遊湖山間以遂肥遁氣采愈高不爲諂曲以事上官足跡不涉貴人之門與世浮沉耻於銜暴清而不污將依隱焉世氣頗靜復往來城市混跡編民沉晦免

禍介特之操皦然不踰年旣老而耳益聰目益明飲啖步履不異壯時氣貌充然其所養可知矣處士所著有稿句曲張天雨錢塘俞和愛之爲書成帙藏于家洪武甲寅十一月十一日甲子以疾卒享年七十有四娶蔣氏先處士七年卒子二長洗孟民字也次孟羽號逸女三長適徐瑗次適陸頤幼爲母舅蔣氏女孫男女若干人旣以其年某月日奉柩葬于無錫芙蓉山祖塋之下而刻石識歲月且遵治命來徵銘余辱游于處士甚久處士

來吳嘗主余家山肴野簌促席道故舊間規其所
偏未嘗慍見或吟詩作画縱步徜徉今年秋仲留
詩爲別而孰知遂成永訣乎余少處士七歲而將
衰行將與草木俱腐何足以任其托乎雖然詎可
愬然亾言乎輒舉其槩爲銘以畀之聊以紓余哀
云耳

銘曰受才之美有其時曷賈弗售卒不施依隱
玩世與時違安常處順全吾歸嗇不使祿昌載
詩寢言歌之其聲希沒而不朽惟在茲

拙逸老人周南老撰

余向粹雲林遺予銘則凡受母兄師友間真不媿古君
子已足見其品也但存悲世憤似之懷所謂公君子也
古以存不務其名者不謬其詩亦能令人泣下沾襟
也因以梓其詩以爲予卷門也張子宜臨句云襟子襟
臨孫時時寫竹頭詩任君分可謂知以甚述懷詩二
十六韻殆即雲林子自傳云海雲毛公淺

雲林詩集

十九

沈

雲林詩集卷末



國家圖書館, NATIONAL CENTRAL LIBRARY, TAIWAN, R.O.C.

倪雲林集外詩

海虞 毛晉子晉 同訂

馮武實伯

四言

至正乙未素衣詩

素衣內自省也督輸官租羈繫憂憤思棄田
廬歛裳宵遁焉

素衣涅今在彼公庭載傷迨隘中心怔營彼苛者
虎胡恤爾氓視氓如獾寧辟尤詬禮以自持省焉

內疚雖曰先業念母盪失守而不遷致此幽鬱身
辱親殆孝達義屈蔚蔚荒塗行邁靡通雖鳴鳳
世莫之逢夕風淒薄曷其有旦吁嗟民生實罹百
患先師遺訓豈或敢忘簞瓢稱賢樂道無殃予獨
何爲悽其悲傷空谷有芝窈窕且廓爰宅希靜菽
水和樂載弋載釣我心不忤安以致養寤寐忘憂
修我初服息焉優游

徐良夫耕漁軒

鄧山之下其水舒舒林廬田圃君子攸居載耕載

漁爰讀我書唐虞緬邈愴矣其悲棲遲衡門聊得
我娛敬慎誠篤德罔三二四勿是事三益斯萃彼
溺于利我以吾義彼自暴棄我以無智匪今之同
惟古是嗜虛邪消搖隱約斯世

五言古詩

韓伯休

韓康抱淵靜匿影以逃名亦有梁伯鸞五噫出漢
京諒哉古賢達道與人俱貞不以身徇物物固莫
之撓胡爲貴目前狗苟且蠅營粗計一時得不禍
害乃生爾其繩祖武景行尚勉行

畧上人松月軒

虛牖宿閒雲長松掛明月道人初定起淨境無炎
熱手持青鸞帚衣掃石上雪冷然滌心塵寂照光

雲林集外詩

國家圖書館 NATIONAL CENTRAL LIBRARY, TAIWAN, R.O.C.

不減

和拙逸先生閒居韻

芻豢非所悅甘我藜藿味無辱奚必榮知足方可
慰客行值炎天嘉木予來墜禁汝忿忿心養此浩
然氣見義思必爲舊若泉臆沸學焉苟無成斯亦
不足畏

道翁先生取予棄筆戲成五言因次韻

生與硯爲鄰惟知楮穎珍饑鳶雜吟嘯那用憂空
困夭矯鍾王跡道媚骨肉勻澄懷靜臨寫時時見

天真

遜學辭親秋暑將事于役因寫幽欄寒松圖

并詩以遺之亦若招隱之意云耳

秋暑多病嗚征夫怨行路瑟瑟幽澗松清陰滿庭
戶風聲雜湍激古音奏韶護張幄儼停雲垂帷祭
繁露諒哉如金玉周子羨無度息景毋狂馳笑言
以胥晤

拙逸先生賦古意見招次韻奉荅

楚狂昔悲歌鳳兮何德衰行邁心搖搖薺青麥離

離雨雲嘆輕薄交道傷嶮巖鴻鵠志自遠燕雀棲
其卑風吹枳棘藜月照琅玕枝姦慝與賢智邪正
亦易推忠本由恕立義豈爲利移瞳子分瞭眊履
蹈知醇疵折柳以樊圃狂夫尚睢睢不以禮自防
言動輕乖宜友焉不以道異端固紛披君看枯魚
泣魴鯉慎所之

宿王耕雲山居

城市厭煩燠江山玩清遠盥濯臨石湖吟嘯望雲
巘范公游集地登陟塵情遣悽悽靡遺構鬱鬱猶

荒苑仙人王子晉抱道雲舒卷鳳吹翔河汾鶴巢
來棲偃涼風縱逸棹溪水清浣浣何當采靈芝忘
年從嵇阮

吳淞山色圖

吳淞春水綠搖蕩半江雲嵐翠窓前落松聲渚際
聞潘郎狂嗜古容我醉書裙鼓柁他年去相從遠
俗氛

題畫

惟寅友兄雅志林壑遠寄佳紙命僕寫圖賦

詩因作此以寄歲已亥五月八日

齋居誰爲友毛穎與陶泓有客附書至云是楮先生潔白中含素柔滑表至精愛此風林意更起丘壑情寫圖以間詠不在象與聲

題吳仲圭畫次韻

元初真士嘗居嘉禾紫虛觀好與吳仲圭隱君遊故得其詩畫爲多今年十月予始識之初卽出示此幀命僕賦詩因走筆次吳隱君詩韻題于上隱君自號梅花道人云

鴛湖在嘉禾湖水春浩蕩家住梅花村夢遶白雲鄉染翰自清逸歌詩更悠長緬彼圖中人看君杖
枕榔

畫竹

至正己巳五月三日過開元精舍希遠首座爲設湯餅煑茗焚香相餉明日將還穹窿寺因寫竹枝賦詩贈別

僧夏已安居還山寺在郭初心了玄解自不爲律縛渡水獨浮杯采苓時負鑿余亦漫浪人枵然慚

獲落

余自與庸叔別後不相見近十載矣今年冬
邂逅吳下班荆道舊殆若隔世因寫霜林
遠岫圖并賦詩以贈

賀公雅吳語嘗誦少陵詩遠孫有古風隱居淮水
湄開牖望青山尋真歌紫芝鏡湖似清淮烟濤春
湫瀾何當棹酒艇與爾相娛嬉永言以鼓瑟獻酬
斟酌之伊昔龍眠莊山水含清暉松桂蔚佳色田
疇足耘耔結茆飯松朮忘年樂熙熙贈此以爲好

同心勿乖違

寄叔方

乖阻方徂秋忽然已改年樓前櫻桃花開落春風
顛米船到家日雨砌溜涓涓綠酒仍滿眼素琴久
無絃呼我共斟酌歡劇更惘然處窮則已固言達
誰當先俯仰嘆鳶魚浮沉各天淵慎勿傷本性木
雕而土埏鸞翔安可挽青雲氣翩翩猶羨羲皇人
清風北窓眠

寄良夫契友

雲林集卷之六

昔者安豐董朝耕暮讀書親樂以妻順山樵而水
漁徐子慕古義林臥獨端居彈琴咏王風宵然觀
化初月窓淡踈竹跣趺當久如

荅徐良夫

八月七日偕耕雲叟訪耕漁隱者風雨寂寥
中爲留三日日有圖書筆硯之樂九日耕
隱賦詩見贈次韻奉荅

雲臥雨聲集庭樹颯以秋身同孤飛鶴心若不繫
舟燕俎登松菌匏尊斝礪流蘭芳日凋悴吾生行

歸休不作螻蟻夢遊神鳳麟洲青山澹相對白髮
忽滿頭仙去雲冉冉鳳鳴竹脩脩諒哉伐木詩鳥
嚶尚相求居吳二十載未及茲山遊君才如鮑謝
摘辭亦云優歡然敬愛客能不爲爾留桑土夙所
徹戶牖何綢繆地無車馬塵路轉巖穴幽旣晴引
飛簷回望林間樓

廿二日贈別耕雲

王君瑚璉器清鑿涵水鏡忍窮如鍊石居易安義
命鳳兮出非時不與凡鳥並勤勞世勲胄忠孝本

天性白圭絕微瑕朱絃駭羣聽任直唯疾讒亂雅
猶惡鄭悄悄慍迫隘咄咄恥奔競西壠松桂林白
雲森相映巖僧同棲止林叟奮嘯咏於時無美刺
托物善比興藹然顏淵樂陋彼原憲病瑗乎知非
久慧也安心竟怡性壽而康克戰道斯勝蕙草秋
更綠松聲寒愈勁何當戲玄洲相期適遐廻

廿三日聞耕雲至北村將來此

自予來南邨忽忽數日矣犬豕混人目烏鳶聒人
耳不見佳友生如逃空谷底足音聞楚然云胡而

不喜

曹君達卿婁江西渚隱君子也自號古民息
景燕處以禮義悅心亦不求知於人今年
七十三而耳目聰明體力強健有三男子
皆能愉婉其容色以爲養又信而智古之
樂以悅生優游以佚老者吾昔聞而今見
之矣耕學叟命爲之詩

隱處婁江渚逍遙古逸民苔石作牀坐青山爲主
賓商巖黃綺輩北牖羲皇人漁郎問津去源上桃

雲林集外詩

花春

遠廬詩

遠廬子蔡質子賢也

有逸人居長洲東荒寒寂寞之濱結茅以偃
息其中名之曰遠廬且曰人世等過客天
地一遠廬耳吾觀昔之富貴利達者其綺
衣玉食朱戶翠箔轉瞬化爲荒烟蕩爲冷
風其骨未寒其子若孫已號寒啼饑於塗
矣生死窮達之境利衰毀譽之場自其拘
者觀之蓋有不勝悲者自其達者觀之殆

不直一笑也何則此身亦非吾之所有况
身外事哉莊周氏之達生死齊物我是遊
乎物之外者豈以一芥蒂於胷中莊周我
所師也寧爲喜晝悲夜貪榮無衰哉予嘗
友其人而今聞其言如此蓋可嘉也庚戌
歲冬予凡一宿遠廬賦贈

天地一遠廬生死猶旦暮奈何世中人逐逐不返
顧此身非我有易晞等朝露世短謀則長嗟哉勞
調度彼云財斯聚我以道爲富坐知天下曠視我

不出戶榮公且行歌帶索何必惡

癸丑八月訪耕雲高士於西巖因寫耕雲軒


圖又爲之詩

芝田耒耜閒石廩山雲滿渚際荷衣翻巖前蘿帶
緩垂露藹輕帷芳池沃清盥霞餐非腥腐物化自
修短空困未足憂服食滋楨幹

題高士圖

僵臥雪塞戶汝南袁邵公冠蓋洛陽令掃雪見高
風冷竈不生烟虛竿久塵蒙投謁非吾事舍君其

誰從



七言古詩

古劍行

雍公孫子氣甚清示我楊顛古劍行劍峯詩律兩
竒絕秋蓮光彩玉庚庚楊顛健筆老縱橫是亦鐵
中之錚錚吐詞鬱崱鳴不平鳳皇來爲盛世鳴一
代惟數虞翁生余也學書學劍旣老何由而成名
和周正道拔時髦韻

何處林間搭鳳毛鳳兮歲蕤潛九苞空林春風露
稍稍雉雉不聞鶴鳴皋雲中金支紛翠翹龍鸞天

矯羣仙翺網羅張弛野喧囂羣飛畢命罔遁逃隕
身折翮隨所遭母啄我穀傾我巢鳳兮麟兮遠莫
招腥風血毛灑林郊隼鶻飛擊當絳霄西飛鷓鴣
東伯勞旭日鳴雁聲嗷嗷鬼車鷓鴣鷓鴣風雨
如晦聞呶號時乎時乎孰如嘲吁嗟清濁寧混淆
拔乎其萃皆時髦

春草堂

是日袁君子英同集軒中

春草軒中隱几坐中有袁髯閒似我欲浮清海狎
羣鷗擬向鴟夷借輕舸二月水煖河豚肥子苦留

我我懷歸半鐺雪浪薰香茗掃榻蕭條共掩扉麝
煤蠟紙高粱筆寶繪珍題品神逸洗滌古玉龍眠
池臨榻竒蹤淨名室紅蠶捲碧春歸酣檳榔萋葉
嚼香甜夜闌更鼓湘妃瑟笙磬同音詠雅南別君
此去何草草山爲迴旋海爲側令威白鶴會重來
世人胡爲易衰老

至正丁酉十一月五日余友陳兄惟允過余
旅寓鼓楚詞一再行因寫墨君并走筆賦
長句以贈時漏下二刻矣筆硯荒落自愧

草草惟允當有以教我耶

陳郎鼓琴初月明能對楚人作楚聲江風動地波
撼席蘆雪撲帳雲棲薨每驚遠道意慘愴忽此聚
首心怔營賦詩寫圖以爲贈比竹貞德琴亮清

寫松江山色并詩贈子俊茂才

窮冬舟過吳淞渚千里交歡少稽呂范張一室小
如壺雞黍時時慰羈旅阿兄彈琴送飛鴻讀書頗
有沉潜功阿弟煮茶敲石火滿江春雨聽松風圖
書四壁醒愁睡隱几嗒然忘世慮扁舟一葉五湖

遊身與閒雲共來去三月六日天氣清爲爾咏出
詩無聲袖有青銅錢二百爲余沽酒作魚羹

壬子九月望日過孤雲大士寶淨精舍留宿

十九日爲寫林亭遠岫圖并賦

敬亭山色青如染妙德端居在西崦片雲出岫本
無心佛石縈林晴冉冉江西帆影又江南笑看羣
狙芋四三道遇化城聊暫止更營寶淨小禪龕

題張外史剪韭亭

外史詞華耿霜月劒花秋瑩鸕鶿膏皎然光燄照

綠水不假雕琢慚鉛刀雅音自出性情正庸工徒
爲血汗勞若人逝矣不復作稂莠雨深那可薈

題畫雅宜山齋圖

靈巖對直雅宜山穹林巨石憶蒼灣若翁遁跡在
其麓有子讀書常閉關松根茯苓煮可掘林下慈
烏去復還寫圖愛此錦步障白雲紅杏春闌斑

戲贈東方生

國士腰間玉鹿盧猛將手中金僕姑英雄往往出
屠釣輕薄紛紛能詔諛寶劍生塵無所用黃流明

月若爲汚楊雄枉儼相如賦今日論兵重武夫



長短句

泉南義士行

泉南兩義士異姓乃同心同心而同居利矣能斷
金不見橫海虹夢見海畔路夢隨春雪舞迴風思
逐奔瀉向東注婁江之水沄沄其波方舟容與遊
岬以歌落葉不息飄揚無蹤大風雲飛嗟彼斷蓬
人生乖離式與此同翩翩者鴻飛鳴相隨睠彼儉
人我心實悲兄弟戕賊室家瘡痍背義競利曾弗
之思兩士相尚以義其誰似之

NATIONAL CENTRAL LIBRARY, TAIWAN, R.O.C.

富貴咏

富貴詘於人曷若貧肆志何從得此言問之魯連
子鴻飛冥冥天爲低下視俛啄何卑微去去烟蘿
碧巖裏瀑流千尺洗塵衣

食無肉

食無肉兮出無車旅無依兮歸無家秋風嫋嫋江
漢澹遠波落日明荷花枳棘萋萋道云賒飛蓬蕭
颯雙鬢華夜有吟蛩晨有鳴蛙玉琴在匣但聞滛
哇龍劍掛勝幽遐吾生有涯知無涯世迫隘兮紛

浮華思從句漏求丹砂忍食安期棗如瓜高臥白
雲餐絳霞

趙善長氏妙於繪事以荆關法爲遜學周君
畫天香深處圖復賦此篇

周君洵美王色溫有宋尚書之子孫尚書第宅古
閩國秋風老桂蒼雲屯有子五人總攀桂孝友才
華稟忠義周君今住讓王城澤流綿延俄八世載
懷先世發咏歌月明珠樹粲交柯白榆歷歷不可
數手援北斗酌天河尚書父及子騎箕入霄漢逝

波逐回風翕忽驚世換清芬沾灑後人多翠靄金
葩影零亂鳳歌我亦楚狂人吳市經遊幾度春泛
泛去來舟不繫狎鷗決去忽難親天香深處留茶
屋爲愛珍圖思超俗好繩祖武揚德馨公侯之始
尔其復

次遜學廣文舟出金焦山韻

眼前金芙蓉一朵迎人青焦山岌嶪蒼石稜長江
無波素練平蛟鼉出沒魚龍變化翕忽徙南溟絳
霞晴虹映朝日光彩激射雲錦屏指點齊州瞰吳

楚欬唾萬里吞爲吐江水潺湲橫涓流古人去我
今幾秋有子仲謀才不世多情庾亮晚登樓邈流
轉柁鳴津鼓歷亂沙鷗起檣櫓當時行樂恣經過
舉酒觀魚登網罟海若決水不滿酌任公釣鰲且
胥組棹謳清綿斷復續瑤草琅玕動盈掬豈意一
朝憂患生夫君處南予處北江流東去不西迴爾
亦胡爲乎嗟哉寒蜂長吟送落景砌蛩悲切助予
哀仙人王子喬吹笙駕風雲招邀女媧補天手鍊
石看作五色文

題虞勝伯畫仙臺高士圖

仙臺有高士聞在最高峯濯足五湖水結巢千歲
松霞屏雲扃闕丹靛落花如雪吹微濛醉顏高卧
日瞳瞳飛鳧蹴踏金芙蓉紫芝眉宇王鍊容往來
倏忽其猶龍誰能貌此世外蹤青城山人仙臺翁
運筆直與天同功倪生作詩以詠歎凌跨倒景他
日期相從

送友之紹興

賀監宅前路荷花今亦無空餘湖上月照見水中

蒲送爾作官幽絕處錢唐江頭飛柳絮廳署臨堤
滿夕嵐惟有沙鷗自來去



五言律詩

八月十五夜湖上翫月

平湖秋似練寒月白於銀
法法衣上露青青水裏
蘋歡言一杯酒聊樂百年身
茲夕對澄景况值高
懷人

過惠山

重過湛公宅因嘗陸子泉
佛香松葉裹僧飯石巖
前市駿唯憐馬池荒憶種蓮
清心有妙契塵事久
終捐

三才集外詩

寓法藏禪寺

風雨入城府禪扉三日留清齋
聊弄翰曉浴更梳頭石鉢香烟細
經幢樹影稠移舟未塞霽少泊聽
鳴鳩

浦城春色圖寫贈遜學

七閩嵐翠合山色浦城高春靄浮
青壁晴曛醉碧桃吟猿倚木客飛
瀑亂松濤夢入千峯裏雲霄一
羽毛

聞鶯送別鄭徵士

春日陽關道榮聲滿上林來從金
谷曉飛度玉樓陰柳嫩難分色歌
停稍辨音明朝空解語人去落花
深

新涼戲呈甘白

閒靜幽人宅蕭條樂園亭炎暑浹
旬劇遠山當戶青涼生猶病瘥愁
解如酒醒臥看風篁影落月滿階
庭

贈郭本齋

高人郭本齋輕舟東渡淮賣藥不
二價向人多好

懷世方憂賜死我豈與時乖欲覓金光草相期弱
水涯

画贈耕雲

戢柅泊清陂禪居獨下帷軒扉雨寥落草木晚離
披野老無機事江鷗更不疑虛舟身世遠萍葉任
飄吹

贈陳維寅有跋

十二月九日夜與維寅友契篝燈清話而門
外北風號寒霜月滿地牕戶聞寂樹影零

亂吾二八或語或默寤寐千載世間榮辱
悠悠之話不以汚吾齒舌也人言我迂謬
今固自若素履本如此豈以人言易吾操
哉維寅言歸因賦詩并書此爲贈慎勿以
示顯貴者必大笑以爲謬語也十三日瓚
書于蝸牛廬中歲壬寅

陳君有古道夜話赴幽期翳翳燈吐焰寥寥月入
帷冰澌醕酒味霜氣折琴絲明月吳門道寒聽獨
爾思

六月六日盧氏客樓對雨一首呈維寅

無家隨地客小閣看雲眠
涉夏雨寒甚似秋風颯
然舞鸞悲鏡影飛雁落
箏絃好轉船頭去江湖萬
里天

題郭天錫畫

天錫掾郎與予交最久死別忽忽二十餘載
念之悵恨如何可言錫山弓河上玄元道
館錫麓玄丘精舍其畫壁最多今或爲軍
旅之居或爲狐兔之窟顏垣遺址風景亦

異雖予之故鄉乃若異鄉矣不歸吾土亦
已十年因勝伯徵君攜此卷相示爲之展
玩感慨并叙述其疇昔相與之所以然者
其中有不能自己也捉筆凄然久之至正
二十三年歲在癸卯十二月十日夜笠澤
蝸牛廬中寫

郭髯余所愛詩畫總名家水際三叉路毫端五色
霞米顛船每泊陶令酒能賒猶憶相過處清吟夜
煮茶

十一月一日燈下戲寫竹石霜柯并題

久客令人厭爲生只自憐每書空咄咄聊偃腹便
便野竹寒烟外霜柯夕照邊五湖風月迥好在轉
漁船

惟乞契友工爲詩謔而圍棋鼓琴無一不造
其妙雖游名公卿間無意於仕進故寫竹
枝奉贈又賦此詩

岷江陳秀士棲隱闔閭城覓句仍工畫看山不愛
名棋枰消永日琴調寄閒情摩捋鬚髯美春苗紫

過纓

寄友

吳淞江上宅青翠映丹楓欲覓幽人去遙憐雅好
同玓圖藏顧陸蓮社憶雷宗聞道秋風夜清琴寫
澗松

八月廿日爲叔平畫紫芝山房圖并賦

山房臨碧海燁燁紫芝榮雲上飛鳧鳥月中聞鳳
笙木烟生石竈竹雪灑茆楹誰見陳高士希夷善
養生

雪林集外詩

有立微君名其齋曰端居室讀書學道咏歌

先王之遺風於其中爲之題贈

五畝幽人宅端居思沈寥圖書克棟積心跡去人
遙卷幔松風入當堦蘭雪飄善求顏子意陋巷樂
簞瓢

徐良夫耕漁軒

僕來軒中自七日至此凡四日矣風雨乍晴
神情開朗又與耕雲耕漁笑言娛樂如行
玉山中文采自足照映人也喜而賦此詩

溪水東西合山家高下居琴書忘產業踪跡隱樵
漁積雨客留宿新晴人趁墟厭喧來洗耳清泚遶
前除

至正癸亥秋七月三日乘雨至西園因寫此
圖賦詩以紀勝遊

卜宅清溪上烹茶秋樹根書堂微雨霽石榻古苔
痕松葉飄琴薦荷香罩酒罇邵公敦古道幽尚竟
誰論

宿樂園林居

予來城郭而暑氣熾甚偶憇甘白先生之樂
園林居不覺數日相與蔭茂樹臨清池誦
羲文之象爰彈有虞之南風遂以永日忽
忽已淹留久如閒成此詩以寓笑樂耳甲

寅六月十六日

暮投齋館靜城郭似山林落月半床影涼風孤鶴
音汀雲縈遠夢桐露濕清琴喧卑靜塵慮蕭瑟動
長吟

爲耕雲賦山居

高木垂帷密清池拭鏡明
垂書葉字古風織浪紋
輕悄悄悲秋意悠悠惜別情
古人雖已矣得失未
須驚

示友人

子處窮愁際我居憂患中
貪饕如鬼國喜怒屬狙
公莫笑淮陰俛誰同鮑叔
風雪汀留雁迹飛舞任
西東

題梅花道人墨菜詩卷

肉食固多鄙菜烹元自癯
曉畦含露氣夜鼎煮雲

瘦春醪時一進林筍與之俱游戲入三昧披圖聊我娛

七言律詩

擬賦岳鄂王墓二首

第一首與本集不同因重錄

姦任忠誅轉謬悠鄂王固豈爲身謀中興可望墮
成業南渡何心報虜讎廢壘山河猶帶憤悲風蘭
蕙總驚秋莫言當日民遮哭更使他年過客愁
丹楓落日隱荒祠蕭瑟清秋志士悲復國豈期讒
賣國出師何遽詔班師少康一旅應無計李牧多
功徒爾爲汨汨江流寫餘恨可憐宋祚亦終移

盧公武甫當世衰道卷之際獨能學行偉然

不但賢於流俗而遂已不愠人之不知嗜
古金石刻辭汲汲若饑渴隱居婁江之鹿
城澹泊無營若將終其身焉命予賦鹿城

隱居詩因賦

避俗龐公隱鹿門鹿門靜亦絕塵喧釣緣水北菰
蒲渚牕俯江南桑柘邨書蠹字殘繡汗簡石魚名
古刻窪尊地偏舟楫稀來往獨有烟潮到岸痕

和甘白先生樂圃林居二首甲寅六月五日

關關幽鳥綠陰濃林塢陂池曲曲通荷雨逗涼侵

北牖汀雲度水迅南風清琴詠雅寧諧俗濁酒攻
愁似有功聞道秋來偏起早一簾晨露引高桐
竹裏齋厨柳下渠幽林風景自應殊家無甌石惟
憂道鄰斷炊烟急索租山水巍湯聊足樂雨雲翻
覆豈吾徒遽遽栩栩天涯夢楚水湘雲斗鷓鴣

十六日夜聽甘白彈琴

溥溥夕露淨衣巾虛牖琴聲向夜分變雅變風由
正始江濤江雨洗炎氛烟中雉雘登春木石上猿
吟隔嶺雲山意寂寥知者少匣藏無使世人聞

廿八日又一首

白蘋風起日初沉
露坐鳴琴望碧岑
七月炎熇已流火
一聲冰玉落空林
胡沙幽結嬋娟恨
飛佩空遺縹緲音
清景娛人羣動寂
冷然真足洗予心

貞壽堂爲吳縣尹楊彞作

貞壽堂前風日遲
天天寸草荅春暉
兒兮事育心無作
母氏康寧志不違
後日腰懸季子印
只今身着老萊衣
熙然鶴髮照綠酒
金鴨火溫香靄微

因儒者董惟明至荆溪輒寫贈別士元鄉契

一詩以呈厓翁知已承數念及恐欲知近况何如耳

古德乖違已數年
相逢吳苑話迤邐
木魚晨粥同僧赴
仙掌春茶破悶煎
採藥童歸隨買市
眠松老鶴伴棲禪
語離更問余何適
思屬江雲浦月邊

兩往候見皆不得
面賦此奉寄以寫我心須稍涼再謁耳
贊上惟寅高士

兩到幽居不一逢
青苔行逕白雲封
敲門自看池上竹
悲嘯更倚風前松
足疲塵土三伏日
思屬雲

屏九疊峯解帶墻陰憇孤寂暮歸林下已鳴鐘

野舟西堂吾鄉之英才也辛酉冬仲邂逅於

簡郵蘭若爲寫江山夕照圖并詩以贈野

舟又號牧菴故云耳

鵬搏鯤化未逍遙大呂黃鐘久寂寥燕處丘園真
足樂貪愚海賈定難招能禪豈復沉空寂善牧寧
當犯稼苗逢着吾鄉閒老子地爐連榻話連宵

題陳虛碧畫

虛碧真人物外遊尚遺餘跡雪鴻洲城荒鶴怨無

窮恨雨駭風驚滿眼愁紅樹青山棲石馬碧花翠
蔓引牽牛我來彷彿三千歲清淺蓬萊幾度秋

八月二日雨涼寄道翁

飄颻江雨沃秋陽戢翼幽禽葉底涼庭砌苔滋連
竹淨陂塘荷氣勝花香結茅何處足松水歸夢遠
林餘磻岡惆悵同心阻携手掩扉山室聽鳴蟬

留別道翁二首

一室蕭閒無市聲浦雲沙鳥到堦庭朋來直諒惟
三益心醉離騷與六經曠世有懷頭已白經年不

見眼猶青江村又作思君夢睡起長吟月滿汀
綠雲幽思接飛猱與子乖違更鬱陶門掩候虫秋
寂寂窓鳴風柳夕騷騷滄江波外孤帆舉太華峯
顛一準高歸去青苔黃葉落托鄰樵牧共遊遨

題顧定之爲周正道寫篔簹圖

蕭蕭瑟瑟一林風寫與城東拙逸翁石室先生仙
去遠虎頭孫子獨稱雄霜毫淡墨陰晴外曙月寒
牕夢寐中對月懷人一悲慨雪泥蹤跡似飛鴻

和拙逸翁謝惠紙扇之作

楮筴輕於一葉桐淒淒懷袖灑溪風吟搖楊柳春
烟綠醉障荷花落日紅疑是片雲飛忽墮修成寶
月樣偏同美人半掩歌唇小翠黛清眸莫惱公

次拙逸叟立春韻

雪泥踪跡歎飛鴻逐逐馬牛千里風去日年光悲
少壯中星時節自西東園梅破臘花渾白詩老逢
春語更工獨有無家霜髻客寒廳咄咄坐書空

題周遜學天香深處卷

城柝啼烏風滿裳月明琪樹影侵墻霏微露下琴

尊淨鬱勃胷中書傳香山隔浦城迷去雁草荒吳苑泣寒蟹黃雲堆逕無行跡幽思迢迢夢故鄉

次遜學道經錫麓懷外家韻

九龍峯色葉蒼茫雲臥西溪夢洛陽鴻漸草堂泉石在春申祠宇草苔荒千年仁術傳鄒孟萬里風烟壯帝鄉欲覓外家成惆望船窓風雨灑微涼

一菴大士舊雖識未深相知庚子二月十四

日復訪之於壽明郎留三宿挹其風標聽其言論始知古德師也余恐其慈忍拯溺

之心過甚未卽深僻幽閒之地乃寫竹梢并賦以撼之云爾十六日懶瓚和南

壽明寺裏連宵話震澤汀前永日留雨葉風梢愁寂寂陶泓毛穎思悠悠蓬萊莫道仙人遠兜率還同大士遊乞子玉窓清鳳尾能從歸掃白雲不

壬子正月廿三日邂逅芝年講主於婁江朱氏之芥舟軒中芝年熟天台三教旨嚴菩薩之戒儀七遮旣淨一乘斯悟與語久之歛衽敬歎因寫圖賦詩以贈

優鉢曇花不世開道人定起北巖隈遠山迢迢窓
中綠垂柳低昂水次栽丈室淨名禪不二三生園
澤夢應迴閒雲野鶴時相遇草草新詩爲爾裁

七月六日雨宿雲岫幽居文伯賢郎以紙索

畫因寫秋亭嘉樹圖并詩以贈

風雨蕭條晚作涼兩株嘉樹近南牕結廬人境無
來轍寓跡醉鄉真樂邦南渚殘雲宿虛牖西山清
影落秋江臨流染翰摹幽意忽有衝烟白鶴雙

留別勝伯徵君

清修卓行虞徵士食粥三年致母喪詩學道園能
入室術傳洪谷早升堂獨高落落松筠節不逐悠
悠鵝鷺行此日別君江海去波光鷗影思微茫

寄惟允

我別陳公才五霜未應髮白視茫茫句哦夜雨懷
無已寇着方山似季常夏沼已浮蓮蘆碧春衣猶
怯樹陰涼久知服食清虛甚更試山翁煮石方

題安處齋

湖上齋居外史家淡烟疎柳望中除安時爲善年

雪林集外詩

年樂處士謀身事事佳竹葉夜香缸面酒菊苗春
點磨頭茶幽棲不作紅塵客遮莫寒江捲浪花

送虞勝伯之雲間求先世遺書

虞勝伯徵君隱居行義家甫里垂二十年不
以姓名求知於時之聞人道園先生其從
叔祖也先世雍公遺文道園先生欲求而
不可得勝伯必欲以意購取之可謂有志
而不忘其所自矣聞此書藏松江俞子中
推官宅推官沒已久而子俊州尹其弟能

假以歸勝伯非仁人義士之存心乎州尹
吾故人也因書以爲之請陶蓬大尹見之
當有以教我

州谷沄沄逝水波雍公勛業未消磨况當異代求
文字尚有聞孫校舛訛京國不聞收汗馬草萊終
見沒銅駝誰陳聖主賢臣頌奈爾陰山勅勒歌

上平章班師

金章紫綬出南荒戎馬旌旗擁道傍奇計素聞陳
曲逆元勳今見郭汾陽國風自古周南盛天運由

來漢道昌妖賊已隨征戰盡早歸丹闕奉清光

次韻畚陳叔方早春見懷

隔江山翠晚依微隱映江邊白板扉事往依依驚
歲改老來念念覺前非已看庭草侵行徑漸有汀
花拂釣磯慚媿詩篇慰幽獨白頭從此莫乖違
清夜哦詩手自書也應把燭倩官奴瘦牛犂確荒
田隴肥馬蹠跚笑瓠壺且釀松花江水碧更分煎
木嶺雲腴人間誰覓玄真子春雨扁舟釣綠蒲

贈周校書

中元習靜松江渚回首塵埃多厚顏富貴不如長
處賤奔馳何似得心閒叅天竹樹存貞碧動地波
瀾任往還輸與荆溪周處士避人探道掩松關
壬子七月一日留昌言高尚書堂寫圖賦贈
七月一日風雨集桐里湖邊吹夕涼柳葉顰烟籠
翡翠荷花濺泪濕鴛鴦却疑身在瀟湘渚且著舟
停雲錦鄉顧我自非徐孺子陳蕃下榻更銜觴

送朱善良

之子才華足起予迥如明月麗清渠方誇道韞哦

春雪已見梁鴻挽鹿車榕葉擁厓山店遠海濤喧
枕夜城虛明年好鼓澄江柁歸奉江波雙鯉魚

老唐有詩見寄謂冷淡無錢覓郎欲返棹豈
知不冷淡而冷淡中有溫甘者存焉

春風春雨不勝寒江路無泥雨卽乾千樹梅花明
屋裏一痕山翠出林端高情不許庸人識俗眼何
從妙畫看若對陶公談世利唐翁可謂沐猴冠

易尚賢赴鮑郎場司丞次王叔明韻

江山寥落白雲飛城郭烟濤獨鶴歸碧落輕帆來

縹緲夕陽遠樹見依微熬波霜雪良艱苦富國魚
鹽果是非猶歎蝸牛廬底客焜黃時節尚絺衣

白馬寺通長老修圓覺期化緣

惠遠深心白蓮社湯休麗句碧雲篇懺摩不懈香
燈供般若仍通文字禪雨後春池芹細細月明寒
渚竹娟娟東林門外聞鐘返惟有陶公妙入玄

至正九年八月十六日計籌山呂尊師訪予

蕭閒館爲予言顧仲瑛徵君玉山隱居之
勝輒想象賦長句以寄他日尚同袁南宮

携琴嘯咏竹間也

解道玉山佳絕處山中惟有呂尊師已招一鶴來
庭樹更養羣鵝戲墨池松風自奏無絃曲桐葉新
題寄遠詩若許王猷性狂癖徑來看竹到堦墀

八月廿三日留南宮岳山人飲明日岳山人

過玉山南宮老矣不知復幾聚首觀花聽
琴情不能堪因賦蕪柬玉山

芙蓉著花已爛熳濁酒彈琴聊少停數聲別鵠隔
江渚一醉秋風空玉旒况當賓客欲行邁忍使風

雨郎飄零攀條掇英重惆悵但願花下長不醒

彥楨繼和復荅

鳥啼花落水西潯春水侵門雨尚深破屋猶寬千
戶邑遺經真富一簾金殘年樗散仍憂國短髮絲
垂獨苦心可似桃源潔身去漁舟何處得重尋
風生水國晝多陰錯莫遲回意自深鮑叔今封馬
鬣冢鐘期誰範褭蹄金一官政不爲人役七字真
能慰我心乳燕鳴鳩更無賴片時春夢不堪尋

因吳國良過玉山草堂賦詩奉寄

玉山樹色隱朝陽更著魚莊近草堂何處唱歌聲
欸乃隔雲濯足向滄浪瓊羞每送青絲絡佳句多
投古錦囊幾問掉船尋好事辟疆園圃定非常

昔張外史有古銅洗種小蕉白石上置洗中
名之曰蕉池積雪軒西園老人追和張劉
二君詩書掛軒中余亦爲之次韻

雪中芭蕉見圖畫蕉池積雪終凋零風翻窓裏浪
花白雨壓牀頭雲葉青詩人超軼有遠思造物變
幻難逃形爾亦林居喜幽事曉浥石榴攜銅瓶

題良夫遂幽軒

來訪幽居秋滿林塵喧甃可散煩襟風迴研沼搖
山影夜靜寒蛩和客吟危磴白雲侵野屐高桐清
露濕牕琴蕭然不作人間夢老鶴眠松萬里心

贈茅山陳太虛

三茆山色隱晴空君住華陽第幾峯陰礪石梁懸
蟠竦曉牕雲氣結芙蓉南遊白拂凝塵久西去青
牛何處逢歲晚棲息足松水遲予飛屨住相從

題朱澤民爲良夫作耕漁軒圖

寂寂溪山面碧湖輕舟烟雨釣菰蒲曉耕畝際看
雲起夕偃林間到日晡漢書自可掛牛角阮杖何
妨挑酒壺江稻西風鱸膾美依依蓐食待雙蘇

和正道哭外孫張汶二首

幼能爲學日劬書一病兼旬遂隕軀已怪飛來坐
隅鵬俄驚斃此渥洼駒窓間夜雨青燈曉庭下微
霜碧樹枯谷鳥呼兒聲慘惻傷心慈母體爲痛
富貴壽夭柄誰操造物無情偶自遭病葉辭柯驚
宿雨殘燈照室歛餘膏外翁携幼情如失慈母思

兒夢亦勞忍聽風前泣幽咽城樓吹角月當壕

送賴善卿采詩

陳詩昔在周盛日刪詩已是哀周餘祖述孰能加
四始研窮我已後諸儒嗟子用意亦勤厚聽音知
政非迂踈願排闥闔獻采錄坐變四海如唐虞

題本立中上人雲山望松圖

西望雲山何處亭鶴歸松栝秋冥冥上人不廢蓼
莪句山室長書貝葉經未應佛法外孝弟定感仙
手鐫碑銘過家上冢世代隔慟哭亭前蘿月青

次孟辨見寄蕪東立中蘊中二大士

江水空青好卜居會衝春雨過平湖雲山欲覓無
聲句花果誇傳沒骨圖莫倚陸機曾入洛最憐張
翰獨思吳本瓊二士平安否應共清吟對酒壺

贈述首座

述也嘗爲第一座袈裟曾染苾芻尼烏鳶翔舞隨
施食龍象森巖聽白椎歸錫湖崩沙際路長食笋
茁岸邊籬何當就子西汀樹著我輕舟一暫維

九日田舍小酌

身世浮沉如漏舟師亡道喪獨悲秋蛩寒尚復吟
秋草狐死猶能正首丘強理篋書聊自慰急呼家
釀與澆愁不堪萸菊生佳色悵望雲山憶勝遊

和默菴遊林屋二首

聞道尋真林屋洞歸來笠澤路應賒未須勅賜鑑
湖水所憶傳經許椽家蒸木烟侵雲去逸歸樵路
逼澗崩斜只恐武陵迷去向移船處處遍桃花
君向山中餌絳霞行經丘壑路忘賒仙公久住金
庭館秘訣應留玉斧家湖上帆將青影度烟中鳥

趁夕陽斜亦欲維舟候春水華林相約采松花

題竹

歎息真成汗漫遊經春歷夏又嗟秋林居已是能
鳴士顧我寧非不繫舟江渚出吟聊自適竹梢清
淚浩難收王孫莫道歸來好芳草天涯恨未休

三月廿日遊海雲蘭若寫竹石古槎

春盡湖濱偶獨來高僧煮茗話和諧鳥啼花落忽
如夢水影苔文渾上堦坐水遠遊悲世慮閒將曠
遠遣愁懷竹林生筍還相別人事睽離亦易乖

十三日晚步良輔南園

晚步南園秋滿林蒼茫斜日一登臨清池風度搖
山影陰砌蛩悲和客吟窓下玉琴桐露濕竹間幽
徑野泉侵雲樓不作人間夢白鶴眠松萬里心

贈友

開元道士來相訪索寫雲林春霽圖別我梁谿已
二載去濯滄浪遊五湖滿目波容蘸山黛撩人柳
眼亂花須避喧政欲尋耕釣源上桃花無處無

洪武甲寅中秋夜寓姻鄒氏病中咏懷

經旬臥病掩山扉巖穴潛神似伏龜身世浮雲度
流水生涯煮豆爨枯箕紅蠹捲碧應無分白髮悲
秋不自支莫負尊前今夜月長吟桂影一伸眉

西神山行

載錫山志

昔在九龍雲霧中泉邊蠟屐遍行踪南樓明月看
時好西澗故人行處逢亂後不聽驚鶴錫夢回猶
憶下堂鍾休兵卽欲幽棲去見說禪房膝可容

贈別仲溫高士

至元乙巳三月廿四日仲溫高士與沈文舉

共載訪余笠澤東渚之蝸牛廬中相從過
玉明宅煮茶留坐遂以永日吹笙鼓琴於
水光林影間但恨吾子儀遠在數十里外
不得同此集也廿五日仲溫別余他之漫
成長句以寫余懷

三月將闌春欲夏循簷共看辛夷花階前淪茗香
照色坐上吹笙清不譁柱杖偶過公子宅班荆宛
似山人家宋玉才情何可得肯拋塵土踏江沙

荅克用次叔勝先生韵

朱絃流水寫徽音古意寥寥何處尋道力已消金
鑿淨禪那曾住嶺雲深毀譽不得逍遙樂愆室應
無忿忿心說與先生惆悵恨牛山何日見成林

重改次韵奉荅

朱絃流水寫徽音古意蕭寥尚可尋道業已消金
鑿淨禪那曾住嶺雲深猿猱騰攫初何怪風雨飄
搖不動心笑爾自戕成濯濯牛山何日見喬林

五言絕句

寫竹枝爲子中陳君

子中高世士脫帽着黃冠久勵冰霜操虛心共歲
寒

題鶴

海月生殘夜遼天入莫秋安期應有待清暖起玄
洲

題畫鶴

白鶴何僂僂翠石亦岌岌風日媚幽芳春禽飛相

雪林集外詩

及

題王叔明小畫

餘不溪上路不到已三年范蠡扁舟小披圖思惘然

題夏圭統扇圖

孰識琴中趣山峩水深深馬史妙於畫無言會古音

題畫

筆鋒雖小劣景物亦清新蕭瑟風林晚江湖有逸

民

杳杳碧山岑森森灌木陰幽亭足清眺臨風聊鼓琴

江城秋雨後竹石曉蒼蒼聊以規摹此留看宿鳳凰

荆溪

荆溪清遠地水秀石幽貞誰識懷歸者終朝憤憤情

題畫贈彥貞

翠竹並竒石蒼蒼留古柯
明窓坐相對試問興如何

遠山清欲滴疎林淡生烟
春潮晚來急維定渡頭船

贈別仲溫高士

宋公天下士畫竹能鼓琴
來我北渚下相從論古心

六言絕句

壬子十一月五日余遇牧軒于吳門客邸求

寫贈安素高士并賦

石潤苔痕雨過竹陰樹影雲深
聞道安素齋中能容狂客孤吟

至正癸卯九月望日畫贈勝伯徵君并題

江渚暮潮初落風林霜葉渾稀
倚杖柴門閒寂懷人山色依微

東吳十詠

望洞庭

一望洞庭秋水相逢南浦孤蓬江干有興騷客閒
居久約漁翁

泛石湖

遙接太湖惘然尚留公壁圖景越來溪水東西香
雪寒梅飄影

遊靈巖寺

此山勝景玄賞舊遊一日皆非籃輿林間烟暝爛
柯谷口忘歸

登姑胥山

吳王館娃西子兩人汗漫重游斷送長流麋鹿淚沾荒草故

泊橫塘

山寺微茫深渡寒洲蒼莽橫塘杖梢自挑村酒船
頭猶夢漁郎

懷甫里

筇行依依故里石刊翰墨模糊龐公力田二頃拾
遺扁舟五湖

雲林集外詩

過盤門

將軍南過吳國魚龍跳下江潮無限吁嗟神跡怕
聞淒涼洞簫

過獨墅

短棹微風窈窕片帆落日橫斜舍傍誰開酒肆牛
疲知是田家

過車坊漾

蕩舟滄波萬頃搖櫓白鷗渚傍不知新月東起回
頭過盡東方

歸闔閭浦

極目烟江盡頭屈指搖城渡口世人不理曲肱自
餉黃雞白酒

畫竹

珍重黃華父子遺風得似洋州松雪于今冥冥房
山去後休休

八

七言絕句

聽琴

久滯鄭衛亂吾耳忽復古初之雅音我思古人禁
忿欲用此養正而鈎深

題周遜學天根月窟軒

手攀月窟躡天根已識乾坤卽此身安樂窩中方
寸地浩然三十六宮春

正月四日夜風雨拙逸齋賦

荒烟漠漠古長洲倦客悲吟歎滯留風雨打窓歸

夢短一尊聊作醉鄉遊

爲蒙菴題吳仲圭竹枝便面

十年害眼今年較障眼前
葵始暫離紈扇篋藏無
棄置三收吳叟碧筠枝

竹樹小閣

竹影縱橫寫月明
青苔石下聽鳴箏
我來彷彿三生路
琪樹秋風夢亦驚

題畫贈均玉

笠澤汀前竹樹稠
白頭垂釣荻花秋
有時乘興入

城府獨放扁舟任去留

西湖竹枝詞

愁水愁風人不歸
昨夜水沒釣魚磯
踏盡蓮根苦
無藕着多柳絮不成衣

桐樹原栽金井西
月明照見影離離
不比蘇公堤
上柳烏鴉飛去鷓鴣啼

題日本僧畫

五老西來第幾峯
道人定起對長松
掛帆東海還
歸去貌得香爐雲氣濃

雲林集外詩

題畫

何處青山落照邊
隔林零亂走寒泉
山如十月江南草
閒倚荒邨泊釣船

題竹

舟過甫里夕陽微
相見故人潘仲輝
爲寫石壇青鳳尾
不知雲落已沾衣

次潘瓠齋韻題丹丘墨竹

柯公自比米顛子
文采照耀青琅玕
只今耆舊凋零盡
剩得潘君瘦影寒

題鄭所南蘭

秋風蘭蕙化爲茅
南國淒涼氣已消
只有所南心不改
淚泉和墨寫離騷

己酉十月八日訪伯凝文學寫圖以贈

江水清空霜葉稀
竹深依約有窓扉
留連竟日忘羈思
閒與休文詠落暉

寄良常

不到荆溪二十年
舊冬十月擬同船
夏秋好遣漁童至
定去靈常古洞前

四月訪衡齋高士

不來新里四經年
首夏清和又繫船
笋脯松醪三日醉
西山在望已醒然

題芭蕉仕女

鳳釵斜壓髻雲低
望斷羊車意欲迷
幾葉芭蕉共憔悴
秋聲近在玉階西

歲庚子十一月廿日邂逅雲岡道師於長洲

邑東之衍慶院以此紙命寫竹石并賦詩而紙筆皆不佳漫爾作此愧不能工道師

憫世憂國以道德爲己任汨汨城邑之中不以爲苦不肯自超於風埃之表也故末句諷之

天如廟裏曾遊處
怪石叢篁漫雨苔
今日江湖重回首
卜居南嶺白雲隈

四月廿日過江渚茅屋雜興四絕句錄呈雲浦明公以代對面

百年風雨幾興亡
睡起西山尚夕陽
四月維舟向茆屋
一庭春草獨焚香

燕子低回掠地飛海鷗來去水侵扉中流雲度他
山影落日帆從何處歸

燕雀生成喜近人家殘屋破去踈踈可人惟有閒
庭草蓬戶朱門一樣春

姑蘇城郭草茫茫城外腥風舊戰場花落空垣車
馬絕獨餘梁燕說興亡

畫竹

苦憶能詩梁上人明窓竹几淨無塵爲君戲寫團
團影多入湘江野水濱

題畫

落月團團照屋梁能仁寺裏白雲鄉只今却笑菴
中叟竹樹小山凝雪霜
幽篁古木杯餘畫贈與松陵沈仲良今夜泊舟依
古柳一篷疎雨夢清湘

蘭亭

辨說蘭亭猶聚訟精良此刻更何疑辨才囑付昭
陵後玉匣爲塵世祚移

古木竹石

劍光出匣耿秋蓮磨礪崢嶸濯澗泉又是一番風
雨過青楓月下竹娟娟

題張遜鈎勒竹

霜松雪竹當時見筆底猶存歲晏姿文采百年成
異物西風吹淚髻絲絲
髯張用意缺鈎鎖書法不凡詩亦工清苦何憂貧
到骨筆端時有古人風

題畫

服食清虛帶瘦容菖蒲花發紫茸茸滌煩磯上營

茆屋千仞巖巒一箇松

畫竹次鄭元祐韻

曾向清湘斬釣竿蒼蒼烟景暮江寒遠山一脉西
來意付與高人面壁看

筠石喬松

蕭蕭風雨麥秋寒把筆臨摹強自寬尚賴俞君相
慰藉松肪笋脯勸加飧

已酉二月廿一日爲清明日風雨凄然舟泊

東林西澣步過伯璇徵君高齋焚香淪茗

出示燕文貴秋山蕭寺圖展玩良久因寫
是日所賦絕句其上

野棠花落過清明春事匆匆夢裏驚倚棹微吟沙
際路半江烟雨暮潮生

壬寅仲冬寫竹枝贈潘友復詩其上

赤壁磯頭萬里秋月明寒竹思悠悠二喬消息今
何似尚憶風流人姓周

辛亥秋寫竹梢并詩奉贈次宋徵士

今朝姚合吟詩句道我休糧帶瘦容寫贈湘江青

鳳尾相期往宿最高峯

至正三年癸未歲八月望日進道過余林下

爲言僦居蘇州城東有水竹之勝因想像
圖此并賦詩其上

僦得城東二畝居水光竹色照琴書晨起開軒驚
宿鳥詩成洗研沒游魚

樹石

已過上巳與清明風雨數朝今日晴修竹春柯苔
石畔一杯聊爲故人傾

辛亥春寫松亭圖并詩贈德嘉高士

華亭郭裏陳高士三泖九峯時一遊欲結松亭看
雲氣更招鳴鶴友浮丘

從善道契過笠澤以士雍高士此紙求寫竹

枝畫已并賦

隱士河陰半畝宮鈿山湖裏泊烟篷秋來鱸膾尊
羹美亦欲東乘萬里風

至正十三年二月晦日爲公遠茂才寫古木

竹石并賦

甫里宅邊曾繫舟滄江白鳥思悠悠憶得岸南雙
樹子雨餘青竹上牽牛

四月十七日寫筠石春樹并詩以贈叔平道

契

芝室丹房苔石清荒筠春樹影縱橫他時夜雨尋
幽約筍脯芹羞酒滿罌

乙未歲四月廿日過仲寶隱君宅因賦題松

泉畫幘

澗雨松風解宿醒虎頭宅裏坐忘形清詞擊筑聊

雲林集外詩

永日更倒君家雙玉瓶

題衛明絃洛神圖

凌波微步襪生塵誰見當時窈窕身能賦已輸曹
子建善圖惟數衛山人

辛亥二月廿九日留華亭南里潘君以仁宅
因懷去年此日與心遠同在餘不溪開玄

仙館

蕭蕭風竹和幽吟二月江邨春雨深東去山中此
時節隔溪桃李正陰陰

寫時梢并詩贈日章貞士

雨後空庭秋月明一枝窻影罨縱橫沈君雅有臨
池興蕭灑濡毫意自清

國寶照磨有平野軒在揚州城郭中今寓吳
十許年矣至正丙午九月十一日在開元
寺爲寫此圖并詩以贈

雪筠霜木影參差平野風烟望遠時回首十年吳
苑夢揚州依約鬢成絲

昨日承蔬笋不托之供獲清言永日別後與

元舉叔陽携琴過普陀精舍榻與盤礴林
影水光中而令子來始知從者散步韓墅
橋急遣一介往侯則從者興盡已返矣經
宿不面旦來雷雨大作想惟動靜輕安昨
見尊俎間韭芥蒿菜之屬秀色粲然今日
得雨必是苗芽怒長更佳也况蒙許送久
伺不見至戲作小詩促之

韭芥抽苗鋪翠玉曉經雷雨更敷腴莫嗔措大眼
孔小乞取先生一餉餘

七日訪徐良輔十三日至七寶泉上及暮舟

還畊雲軒

來看城西十月山桂花風起碧巖間扁舟夜過溪
東宿七寶泉頭日暮還
桂樹窓閒卧看雲風吹花落紫綸巾偶來山屨餌
蒼朮又向江波采白蘋

中秋月下歡飲

鳴鳳岡頭秋月明一樽能爲故人傾月林滿地青
蘋影琪樹飄香露氣清

中秋夜月明勝常年良夫與景和携酒至畊
雲軒酣飲及二更乃就寢十六日夜陰雲
半天宇月光或隱或見十七日夜月已不
如中秋月色朗澈十八日暮雨作至十九
日不止因賦

八月山居秋廓廓西風逗冷侵踈箔烏銜青影暮
飛還細雨空庭桂花落

題坦率子畫

何處溪山好卜居武夷不住卽匡廬蓬萊堯率元

非遠雲錦箱中貝葉書

寫竹枝贈成之隱君

鍊嘯樓前江雨晴一枝修竹近檐楹酒酣更待織
織月噴薄簫聲似玉笙

寫竹石贈錢自銘

瑤芳樓下曾留宿因見明琅舊日圖錢起能詩多
逸思爲渠吟嘯不能孤

貞居道士往常熟山中訪王君章高士予因
寫梧竹秀石奉仲素孝廉

青桐陰下一株石迴棹來看雪未消展圖彷彿雲
林影肯向燈前玩楚腰

題朱澤民小景

朱君詩畫今稱絕片一斷縑人寶藏小筆松巖聊
爾爾道寧格律晚堂堂

畫

澗道流泉曲曲通白雲窓牖護簾櫳汀花如雪歸
舟晚南渚幽人未易逢

題趙彥徵小畫

文敏公孫清且賢陶泓楮穎過年年子由命也成
蘆蒲坐對漚波一惘然

平

太平爛熳遊三日林下狂吟石上眠浩蕩春風芳
草綠梅花雪滿白雲泉

病中九日懷山園三首

江邨九月木樨風不與山園景物同還憶澗西行
采菊茱萸交綴入杯紅

病骨峻嶒山影瘦敦敦擁褐坐忘言當年親舊携

壺處應有寒泉滿石尊

登高多在九龍山湖水蒼茫白鳥還醉拂松蘿臨
石溜黃花楓葉莫斑斑

題曹幼文雪林圖

窪盈軒在雪林齋啜茗幽吟見雅懷一閱舊圖如
隔世世奚遺我老形骸

自題畫

山郭幽居正向陽喬林古木鬱蒼蒼刻藤百幅誰
能置爲壩亂枝蔽日長

爲秦山嵐靄贈仲章沈君次張伯雨韻

露草雨苔青不乾牀頭澗水夏生寒傅經長史揮
毫處只作當時舊宅看

江渚茅屋雜興四絕奉寄雲浦理問兼似良

夫隱士

我自無心何慢勤愛憎加我亦從人青山不改如
如體雪後陽生依舊春

五月陰風特地寒闔閭浦口怯衣單飢啼野哭浮
邨落我本無愁也廢餐

虞趙虹光貫壁奎碧梧端合鳳來棲春泥滑滑江
天永更著荒榛叫竹雞

眼底繁華一旦空寥寥南北馬牛風鴻飛不與人
間事山自白雲江自東

題高彥敬山水圖

房山青影浸湖波綠玉蒼烟冷蕩磨寶墨珠圖人
世滿水中照見百東坡

中秋偕徐良夫飲畊雲山居

酒渴茶甌沁露涼石牀雲臥冷侵裳團團碧樹懸

金粟月午風清夢寐香

烟雨中過石湖

烟雨山前度石湖一奩秋影玉平鋪何須更剪松
江水好染空青畫作圖

姑蘇城外短長橋烟雨空濛又晚潮載酒曾經此
行樂醉乘江月臥吹簫

愁不能醒已白頭滄江波上狎輕鷗鷗情與老初
無染一葉輕軀總是愁

懷畊漁大隱

山谷真堪埋百憂
月窓桂樹思綢繆
荷花浦口見山色
寄書汝亦憶儂不

八月廿一日出鳳岡

江上來尋西郭山
山人留我白雲間
風飄雲去他山雨
雲本無心亦未閒

寫竹梢寄畊雲

一枝秋玉迴吟風
寫入吳箋意逾工
遠寄碧山王錄事
獨行何用哭途窮

采薇

采薇巖岫宿層雲
迫隘悲爲世俗隣
郿塢銅山竟何似
金留未必不戕身

阿房宮

阿房遺址碧山垠
菹醢生民又幾秦
積恨不消秋草綠
行人指點話悲辛

訪古道首座因見呂志學詩篇

我愛學公名古道
于今古道久寥寥
淨名室裏無塵事
一見令人意也消

不見呂髯幾十年
想應兩髯也皤然
何當共住維

摩室剪燭哦詩聽雨眠

寫畫贈馬彥敬

高房山尚書清節雅尚爲本朝名臣諱克恭
字彥敬馬先生亦其國人亦字彥敬蓋司
馬慕藺之意也今旣爲作山居圖又詩以
贈之

清節尚書高彥敬馬翁同字亦懷貞漢廷詞賦相
如最司馬依依慕藺情

題顧定之竹

顧畫王詩兩竒絕風霜凜凜香清節師子林中古
佛心允矣無生亦無滅

連雨

二月雨聲從子月三江舟楫住吳江春愁不醒如
中酒浪着狂風撼客牕

畫溪山春霽圖

水影山光翠蕩磨春風波上聽漁歌垂垂烟柳籠
南岸好着輕舟一釣簑

余梓行雲林詩已二十有三年矣酷嗜其書

畫又不可多得每懸一幅橫一卷或從收
家及丹房禪榻見尺楮寸縑必鈔入携囊以
歸總貯一筠籠中藏諸密室今籠已盈溢矣
秋日夔開托館甥馮實伯手錄成編與酣未
已又檢毘陵錫山_七經水誌旁及隣邦雜記
又得如干_管顛曰雲林集外詩附于前刻之
後余前刻時馮甥纔七齡就外傳今季已立
工詩賦嗜古過於余_七頭顛如雪病_八
無力秋_啉不勝差大之慨隱湖毛_登

